


# ELOQUENTIÆ PRÆLUDIA.



PARS SECUNDA

Pro Classe

## RHETORICÆ.



MEDIOLANI, MDCCXX.

---

Typis Iosephi Pandulfi Malatestæ.  
*Superiorum permisso.*

# TRACTATUS

*Secundæ Partis.*

Rhetoricæ Artis Epitome.

De Elogijs.

De Argutijs.

De Impresijs.

De scribenda Historia.

---

Nonis Martij MDCCXX.

REIMPRIMATUR

*Fr. Ioseph. Maria Felix Ferrarini  
Ord. Præd. Sacra Theologia Magister,  
ac Commiss. S. Offitij Mediol.*

*Carolus Franciscus Curionus pro Eminentiss.,  
& Reuerendiss. D. D. Card. Archiep.*

*Federicus Cesatus pro Excellentissimo  
Senatu.*

3

Ad Studiosum Artis Rhetoricæ  
Adolescensentem .

**A**rchimedaum opus tentare me  
dices , qui Rhetoricæ magnitu-  
dinem per se amplissimam , tot  
insuper excellentium Præcep-  
torum accurata doctrina latissimè dif-  
fusam , exiguis paginis arctare velim ,  
vel potius Procustis in morem male  
mutilatam ad præfinitam arbitrio meo  
breuitatem contrahere . Verum quan-  
uis tot illustrium Virorum eruditionem  
eximiam , & laudem , & mirer , &  
venerer ; ea mihi semper insedit opi-  
nio , nullos melius humanis ingenijs  
consuluisse , quàm qui Artes non ea-  
rum amplitudine , sed vitæ nostræ spa-  
tiji metiti , de his ita scripsere ; ut ne-  
que voluminum mole annos à lecturis  
exigerent , neque multitudine , ac dif-  
ficultate præceptionum discentes diu-  
tius distinerent . Huius quidem Orato-  
ria facultatis qui sinus omnes perscru-  
tari voluerit , quæque ad illam quoquo-  
modo attinent explicare ; tum omnium  
rationem præscribere , quæ dici possunt ,  
si Nestoreos etiam viuât annos , prius  
viuendi finem fecerit , quàm scribendi .  
At non tanto præceptorum apparatus  
indigere sentio Eloquentia primordia ,  
ultra quæ vix quidquam proprium ha-  
ber

A 2

4  
bet hac, quam Rhetoricam vocamus; immò ex his pleraque desumit ex penore alieno: Quid verò denique totum illud fore putas, quod Scholæ istius Tirocinio comparabis? Si Tullio fidem habes, (a) Rhetorica doctrina verborum est, Philosophiarum. Formam itaque habebis sine materia. Hac aliunde tibi querenda est. Vbi Rhetorem cum profectu audieris, à Dialectica, Philosophia Naturali, ac Morali, ab Historia, ab omnigena denique Eruditione cetera comparabis, quæ inchoatum his rudimentis Oratorem perficient; si assidua insuper accesserit scribendi, ac dicendi consuetudo. Ceterum pauca ista incipienti sufficient, à natura dato ingenio, studioque utenti. Hunc sanè qualemcunque laborem meum non ingratum, tibi fore hoc saltem nomine non diffido, quod eam secutus sum brevitatem, quæ minueret incommodum, utilitatem tamen afferret. Hanc unam in votis habeo, cuius cum fructum aliquem perceperis, satis magnum, ac praoptatum. Minerval hoc ipso mihi persolueris. Vale.



a Cic. in Oratore.

RHE.





## R H E T O R I C Æ A R T I S E P I T O M E .

*Quid sit Rhetorica, quid Rhetor,  
& Orator; quod huius  
Officium, ac finis.*

### CAPVT PRIMVM.



**R**HETORICA ( Latine  
Dictio, seu Oratoria,  
siue Eloquentia ) (a) *est*  
*ars benedicendi*. Dice-  
re, (b) Tullij sententia  
non est idem, ac lo-  
qui; hoc est quoquo-  
modo verba facere, sed copiose, &  
ornate differere; atque apte ad persua-  
dendum. Hæc summa est Eloquentiæ  
vis, summa Oratoris laus; quare Ari-  
stoteles Rhetoricam definiuit, *faculta-  
tem videndi, quid in quaque re sit ad  
persuadendum accommodatum*; quanuis  
hac definitione solam spectasse videtur  
inventionem.

A 3

Ali-

a Quintil. Instit. Orat. l. c. 14.

b Cic. in Oratore.

Aliqui Rhetoricam ab Eloquentia distinguunt; quòd illa sit Ars, quæ tradit benedicendi præcepta ; hæc. vsus eiusdem Artis. At si Græcè Rhetor ab eloquendo Latinè eloquens dictus est (vt notat Cicero in Oratore) non video, cur, quæ à Græcis Rhetorica dicitur, à Latinis Eloquentia dici non possit. Quòd si quis repugnet, litem conciliabis Epitheto, atque illam Eloquentiam docentem vocabis, hanc dicentem.

Idem inter Oratorem, ac Rhetorem discrimen affertur: quòd Rhetor propriè vocatur, qui dicendi Artem docet, Orator qui exercet, veras causas agendo; atque ita differt à Declamatore, qui fictas in Scholis causas agit.

Ex Definitione Rhetoricæ statim colligitur Oratoris Officium, & finis. Officium in qualibet Arte id est, quod præstare Artifex debet, ad suum finem obtinendum. Finis est id, cuius obtinendi gratia operatur. Officium igitur Oratoris est dicere appositè ad persuadendum: Finis est persuadere dicendo.

Persuadet autem Orator probando, delectando, flectendo. Probare necessitatis est, delectare suauitatis, flectere victoriæ.

*Quanam sit Rhetoricæ  
materia, & quo-  
tuplex.*

CAPVT SECVNDVM:

**M**ATERIA Rhetoricæ est omnis  
*Quæstio. QVÆSTIONIS* nomine  
intelligitur quidquid in disceptationem  
Oratoriam venire potest. Quamobrem  
vides, quàm amplos habeat fines Elo-  
quentia, cùm nihil sit omnino, de quo  
disputari dicendo non possit. Hinc est  
quòd aliqui apud Quintilianum *lib. 1.  
c. 21.* hanc artem *circuncurrentem* dixe-  
re: quòd excurrat in omnia; & Ora-  
torem Tullius ad dicendum de re omni  
voluit esse paratum, seque fatetur (a)  
non ex Rhetorum officinis, sed ex Aca-  
demiæ spatijs Oratorem extitisse.

Quæstio diuiditur in Infinitam, &  
Finitam. (b) Infinita, quæ dicitur etiam  
Thesis, Propositum, & Consultatio,  
generalis Quæstio est, quæ non certis  
alligatur personis, temporibus, locis  
&c. ex. gr. *Sit ne utilis Historia cognitio.*  
Finita, quæ vocatur Hypothesis, Con-  
trouersia, & Causa, est, quæ aliqua  
circumstantium designatione termina-

A 4

tur:

a Cic. in Oratore.

b In Partit. Orat., & in Topicis.

tur: ex. gr. *Sit nè utilis Principi cognitio historia.*

Plurimum confert ad vim, & copiam Orationis scire Hypothesim ad suam Thesim reuocare; quod facillè fiet, eximendo à circumstantibus Hypothesim, & finitam Propositionem ad vniuersalem, ac genericam referendo. Sic ad probandam hanc determinatam. *Bellum gerendum est in Christiana Religionis hostes*, ad generalem eam confugiam. *Bellum in hostes gerendum est.* At non temerè dilabendum in Thesim, nisi quando, & quantum res postulet, ne latius vagetur Oratio, & vix aliquando ad Hypothesim redeat. Vide quæ diximus in Loco à Genre, & Specie.

Quæstionum, quacunque de re sint; duo sunt genera: vnum cognitionis, alterum actionis. Quæstiones cognitionis sunt, quarum finis est scientia: vt: *An eloquentia magis à natura pendeat, quàm ab arte.* Actionis sunt, quæ aliquid agendum spectant: vt: *Sit ne paranda classis in piratas.*

Omnes igitur hæ Quæstiones Rhetoricæ materia sunt: quanuis magis proprium sit Oratoris Causas tractare, quàm Proposita; hoc est finitas potius, quàm infinitas Quæstiones. Causarum ad Oratorem spectantium tria sunt

sunt genera, Demonstratiuum, Deliberatiuum, & Iudiciale. Demonstratiuum versatur in Exornationibus, Laudibus, ac Vituperationibus. Deliberatiuum in Suasionibus, ac Dissuasionibus. Iudiciale in Accusationibus, ac Defensionibus.

*Quot, & quæ sint partes Rhetoricæ,  
& quenam ad comparandam  
Eloquentiam requirantur.*

### CAPVT TERTIVM.

**Q** Vinque sunt Rhetoricæ partes *INVENTIO, DISPOSITIO. ELOCVTIO, MEMORIA, & PRONVNTIATIO.*

(a) *INVENTIO* est excogitatio argumentorum, seu rationum, quibus Orator probet, quod proponit. *DISPOSITIO* est rerum inuentarum in ordinem distributio. *ELOCVTIO* est idoneorum verborum, ac sententiarum ad res inuentas explicandas accommodatio. *MEMORIA* est rerum, ac verborum firma perceptio. *PRONVNTIATIO* est ex rerum, verborumque dignitate vocis, & corporis moderatio.

His quinque partibus excellere debet perfectus Orator: quare ad hunc for-

A 5 man-

a Pr. Ad Herennium, & 1. de Inuent.

mandum tam multa requiruntur, quæ rarò, aut nunquam omnia summa in vnum conueniunt, vt apicem Eloquentiæ nullus assequi posse videatur. Vetus Quæstio est, plus ne ad hanc dicendi facultatem natura conferat, an doctrina: quam tamen quæstionem facilè soluit Horatiana sententia. *Alterius altera poscit opem*. Primùm quidem opus est fauentis Naturæ beneficentia, quæ opportuna tum animi, tum corporis bona futuro Oratori concesserit; quæ si desint, nullis acquiri præceptis possunt: hoc est acumen ingenij, & promptam, fidamque memoriam; quibus, ad actionis laudem, vocis felicitas, aptaque cum decore corporis habitudo accedat. Hæc si tibi largita fuerit Diuina clementia, natus es ad Eloquentiam, nondum instructus: adhuc alia quærenda sunt, quibus perficiantur Naturæ dotes. De his modo agimus, quæ ab humana pendent industria.

Tria sunt, quorum auxilijs Eloquentia comparatur. Ars, Exercitatio, & Imitatio: nisi fortè vnico Artis nomine omnia velis complecti; nam Exercitatio est Artis vsus, Imitatio est pars Artis. Immò Ars eadem imitatio Naturæ est; nec aliunde originem habuit Oratoria facultas, quàm ex obseruatione, & imitatione illorum, qui na-

turali Eloquentia præstantes normam, cæteris tradidere; atque ita prius exempla fuere, quàm præcepta; quanuis in his colligendis, ac seligendis multum profecerit eruditorum hominum cura, ut ex optimis absolutissimam Artem formaret.

*ARS est collecta ex animaduersione, & experientia, doctrina; quæ certam ostendit bene dicendi rationem.*

*EXERCITATIO est usus assiduus eorum, quæ ad artem spectant, vel comparandam, vel perficiendam, audiendo, legendo, meditando, scribendo. Horum enim assiduitas perficit ipsius artis opera, & parit facultatem quare Plinius usum appellauit optimum dicens magistrum. Epist. 29. lib. 6.*

*IMITATIO est sermonis nostri ad sermonem veterem apta conformatio.*  
(a) Hac nullus est expeditior ad Eloquentiam trames: longum quippe iter per præcepta, breuissimum per exempla.

Præcipit Fabius deligendum quidem ad imitationem vnum in ea facultate, quam sectamur, qui magis excellat, familiamque ducat, non tamen cæteros omnino excludendos; cùm non sit vnus Eloquentiæ vultus, nec omnia bona inueniatur in vno.

A 6

Tul-

a Inst. Lipsius in Inst. Epist. c. 11.

Tullius præcedat, summus inter Latinos Artis Oratoriæ magister, qui Elocutionis elegantiam, vbertatem, numerum, fluentemque Orationis contextum docebit; deinde similes alij adhibeantur, & optimi Veterum, à quibus Romanæ linguæ sinceritas, & Eloquentia solidior, velut ipsis manans è fontibus, hauriatur. Ex his, cæterisque lectione dignis Authoribus, & verborum sumenda copia est, & varietas Figurarum, & componendi ratio, tum ad exemplum virtutum omnium mens dirigenda. (a) Nam ea demum commendabilis, & utilis imitatio est, quæ meliorum vestigijs inhærens proprias facit alienas opes, ac suauissima temperie colligit, quæ dispersa laudantur in multis. Quare peccant imitatores inepti, qui solam Orationis cutem intuentes, assequi se laudem exemplaris arbitrantur, si verba tantùm sequantur, & numeros; aut prauo gustu deteriora secernunt, & si quæ sunt in Authoribus leuiores, & aliquando vitiosæ, in se audissimè deriuant. Hos cum Aristotelis, ac Platonis Auditoribus Plutarchus irideret, (b) qui vt se Magistris maximè conformarent, primi *balbutientem linguam*; incuruum alterius humerum imi-

a *Quintil. lib. 10. cap. 2.*

b *Plut. de audienda Poetica,*



imitari conabantur. Videnda igitur, ac probanda meliora, tum prudenter in rem propriam vertenda. Alij contra fures, & plagiarij, non delibant, sed vsurpant aliena, & quanuis primæ ætati indulgendum fit, si plura licentiùs à propositis exemplis excerpant, id non ita in adultis ferendum, ne alicño vivere assuescant, fuci veriùs, quàm apes. Neque serviles Authorum pedisequos laudo, qui cùm se vni, quem per omnia sequantur, addixere, minutissima quæque religiosius observant, quos meritò subsannat Horatius.

*O imitatores seruum pecus, ut mihi  
sæpe*

*Bilem, sæpe iocum vestri mouere,  
tumultus. Lib. 1. epist. ad Maccen-*  
*natem.*

Plura de imitatione egregiè Iustus Lipsius in Epistolica institutione c. 11. 12., & 13. Quinam pro diuerso styli genere præcipuè sint imitandi vide in Rhetore Galli lib. 1. cap. 4., vbi varios etiam imitandi modos inuenies.



## DE INVENTIONE,

seu de inueniendis Argumentis.

BIBLIOTECA NAZ.  
ROMA  
VITTORIO EMANUELE

## CAPVT QVARTVM.

**V**T aptè de quacunque re proposita dicere possit Orator, indiget Inventionis facultate. Primus verò inueniendi labor, ex Tullio, est excogitatio Argumenti.

*ARGVMENTVM* est ratio, causam probabilem reddens; seu probabile inuentum ad faciendam fidem, (a) quo confirmamus, quod proponimus; atque idem est, quod *medium terminum* Dialectici vocant.

Sed vt idonea excogitentur Argumenta, cùm hæc sint veluti spicula dirigenda in scopum, is priùs Oratori præfigendus est, & dignoscendus Causæ Status, seu constitutio Causæ.

*STATVS* est questio, qua ex prima Causarum conflictione nascitur (b) hoc est ex Intentione Accusatoris, seu Adversarij, & Depulsione Defensoris; ex. gr. Intentio Accusatoris est. *Roscius Patrem occidit.* Depulsio Defensoris est. *Roscius Patrem non occidit.* Ex vtraque nascitur Questio. *An*

Ro-

<sup>a</sup> Cic. in Partit. Orat.

<sup>b</sup> Quintil. lib. 3. c. 6.

*Roscius Patrem occiderit .*

Triplex ( vt Cicero docet ) Status est, Coniecturalis , Definitionis , & Qualitatis . In statu coniecturali quæritur , an res sit : vt : *An Deiotarus Cafari parauerit infidias* . In Statu Definitionis quæritur , quid res sit : vt : *Sit ne Patria hostis Antonius* . In Statu Qualitatis quæritur , qualis res sit : vt : *An utilis Reip. fuerit Manlij feueritas in filium* .

Aliqui Statum Iudicialibus tantum causis adscribunt . Tullius , Fabius , & alij ad omnes volunt Causas pertinere ; nam in Demonstratiuis etiam , ac Deliberatiuis inter diuersa sentientes excitari Quæstiones possunt . Ex. gr. *Fortior ne , an felicior fuerit Alexander . An praferenda sit vita gloria &c* . Plurima de Statibus tradidere veteres . Pleraque ni fallor , aptiora Iudicijs . De his Consule Quintilianum lib.3. c.6.

Cognito Causæ Statu , ad eam tractandam , & firmandam , vestiganda erunt Argumenta : confugiendo ad illorum fontes , hoc est Locos Rhetoricos , qui sunt , vt docuimus , Argumentorum sedes .

Argumenta , quæ desumuntur à Locis Intrinsecis , dicuntur Intrinseca , vel Insita ; quæ à Locis Extrinsecis , Extrinseca , seu Remota . Ita si probarem  
de-

deberi Principi obsequium, *quia Dei Minister est, ab eo datus ad regimen populorum*, Argumentum Intrinsecum esset, à Definitione. At si hoc idem confirmarem ea Taciti authoritate. *Principi rerum iudicium cælitus datum est, subditis obsequij gloria relicta.* (a) Argumentum extrinsecum esset, à Testimonio humano. Quomodo à singulis Locis eruantur Argumenta, clariùs exemplis patebit, quæ inferiùs dabo.

Hoc interim moneo, exquirendas quidem, non extorquendas rationes è Locis; sed habendum eorum delectum, è quibus Argumenta validiora, & ad rem probandam aptiora educantur; atque hæc à leuioribus, minùsque aptis secernenda, quod opus Iudicii est. Hinc aliqui (vt notat Quintilianus *lib. 3. cap. 3., & lib. 6. c. 6.*) Inventioni addidere Iudicium, tanquam Rhetoricæ partem ab alijs distinctam; at non minus ad Dispositionem, & Elocutionem, cæteraque Artis opera requiritur, quàm ad Inventionem; nec magis Arte traditur, quàm gustus, aut odor.

\*\*\* \*\*

a *Lib. 6. Annalium.*

*Quid.*

*Quid sit, & quotuplex Argumentatio.*

## CAPVT QVINTVM.

**A**RGVMENTATIO est Argumenti explicatio : pressam enim rationem, vimque in Argumento latentem educit, & languidum secus illius acumen vibrando dirigit, vt feriat. Do exemplum. Si dicas : Virtus est expetenda ; *quia gloriam affert* ; hoc est simplex Argumentum. En vt hoc idem explicet, & validius tractet Argumentatio.

Quod gloriam affert, est expetendum :  
Sed Virtus gloriam affert.

Ergo est expetenda.

Omnis igitur Oratoria Argumentationitur Argumento, seu ratione, & Locis desumpta, quæ vel vera sit, vel verisimilis : non enim necessarias exigit, & euidentes, quæ gignant scientiam per Philosophicam Demonstrationem ; non quòd his etiam vti non possit Orator, sed quòd illius proprium sit in persuasibilibus versari, fidemque tantum facere, & obtinere ab Auditoribus opinionis assensum ; quare satis est, si illius Argumentatio ex certis, & probabilibus fiat.

Pro

Pro certis habemus primùm, quæ sensibus percipiuntur, (a) ut quæ videmus, audimus, ac tangimus: ex. gr. *Solem lucere: ignem ardere &c.* Deinde illa, in quæ communi opinione consensum est, ut: *Præstandum esse maioribus obsequium*. Præterea quæ legibus cauta sunt, & recepta in mores. Denique manifesta iam, & aliunde probata, vel concessa.

Probabilia dicuntur; quæ plerumque ita eueniunt, ut: *Procliniorem esse ad voluptates adolescentiam*. Tum quæque verisimilia sunt, & ex circumstantibus, & coniecturis credibilia, ut: *Patræ eadis conscium esse, qui fugero visus est cum sicario*.

Duplex Argumentationis genus est, Syllogismus, Latine Ratiocinatio, & Inductio. (b) Ad hæc duo genera referuntur aliæ Argumentationum species. Ad Syllogismum Epicherema, Enthymema, Dilemma, Sorites: ad Inductionem Exemplum.

In his explicandis ita me geram, ut meminerim non instrui à me Dialecticum ad disputandi subtilitatem, sed recentem ab humanioribus literis adolescentem Eloquentiæ rudimentis imbui,

a *Quintil. lib. 5. c. 10.*

b *Arist. Rhet. lib. 1. c. 2. Topic. lib. 1. c. 10. Cic. de Inuent. lib. 1.*

bui , cui sufficit aliquas Argumentationes ad proposita exempla conficere . Immo vtilius fore arbitror , si Rhetoricis Ratiocinationibus amplificandis , & exornandis exerceatur , quàm si torquendis ad Logicorum leges Syllogismis immoretur : aliud enim est , quod ad Philosophos attinet , compressa manu , aliud , quod spectat ad Rhetores , explicata pugnare .

### *De Syllogismo :*

**SYLLOGISMVS** est argumentandi ratio , qua ex duabus Propositionibus , seu Enuntiationibus artificiosè dispositis tertiam colligit . Tribus itaque partibus constat . Prima dicitur à Logicis Maior , à Rhetoricis Propositum , seu Proposition . Secunda Minor , apud nos Sumptio , seu Assumptio . Tertia Conclusio , quæ à Cicerone Complexio , à Fabio Connexio vocatur . Hæ autem Enuntiationes ita sunt inter se connexæ , ut è primis duabus tertia deducatur .

In perfecto Syllogismo prima Proposition est aliqua vniuersalis Enuntiation , & quasi Thesis , à qua pender Assumptio , & Complexio : Assumptio continet Argumentum , seu rationem inuentam ad probandam Complexionem : Complexio est ipsa Proposition ,  
quam

quam Argumentatio probat. En exemplum.

**PROPOSITIO.** Quidquid est mutabile est incertum.

**ASSUMPTIO.** At diuitiæ sunt mutabiles.

**COMPLEXIO.** Ergo diuitiæ sunt incertæ.

Syllogismi artificium, variasque illius formas si nosse cupis, adi Rhetorem Galli lib. 5. cap. 5., & Ludouicum Carbonem de Oratoria, & Dialectica Inuentione lib. 3. c. 14., & sequentibus.

### *De Epicheremate.*

**EPICHEREMA**, quod aliqui Aggressionem appellant, est Oratoria Ratiocinatio, quæ solo numero partium à Logico Syllogismo difert; nam quandoque vel Propositioni, vel Assumptioni Rationem additis; aliquandò vtrisque, vt vel alterutra, vel vtraque indiget probatione; ideo modò quatuor, modò quinque partibus constat. Ex. gr.

Quod cruciat animum ingens supplicium est;

Quia torquet nobiliorem hominis partem.

At culpa cruciat animum;

Quia conscientiae stimulis ferit.

Ergo culpa ingens supplicium est.

Alij



Alij Epicheremata vocant Ratiocinationes, vnica Propositione conclusas; ex. gr. *Quisquamne fidat fallacibus fortuna bonis?* Quæ Propositio hanc in se continet Ratiocinationem.

Fallacibus bonis nemo fidere debet.

Sed fallacia sunt fortunæ bona.

Ergo nemo fidere debet fortunæ bonis.

*De Enthymemate.*

**ENTHYMEMA**, quod Commentum, seu Commentationem Fabius (a) interpretatur, est *Syllogismus imperfectus, seu mutila Ratiocinatio*. Si enim Syllogismo dematur vel Propositio, vel Assumptio, fiet Enthymema. Ex. gr.

*Ablata Propositione.*

Improbi suis cupiditatibus famulantur.

Ergo improbi sunt serui.

*Dempta Assumptione.*

Qui suis cupiditatibus famulantur serui sunt.

Ergo improbi sunt serui.

*De Dilemmate.*

**DILEMMA** est argumentatio duobus membris pugnantibus constans, quorum utrunque Aduersarium ferit, Cicero Complexionem vocat: duas enim complectitur Propositiones, quarum

rum utramvis concedas, in te pugnat  
Argumentatio; ex. gr.

Aut amicum amas, aut odisti,  
Si amas; cur lædis? Si non amas;  
non es ergo Amicus.

### De Sorite.

**SORTES** est Ratiocinatio pluribus  
Argumentis à se inuicem dependenti-  
bus constans: quare Tullius acerualem  
Syllogismum censuit à Latinis dici posse;  
nam plures Propositiones inter se con-  
nexas coaceruat, per quarum gradatio-  
nem deuenit ad aliquid probandum.  
Simili Argumentatione carpebat filium  
Themistocles, materna, paternaque  
indulgentia insolentiùs utentem; eum-  
que toti Græciæ imperare ita per iocum  
probabat. Ex Plutarcho in vita Themis-  
toclis.

Filius imperat Matri.

Mater imperat mihi.

Ego impero Atheniensibus.

Athenienses imperant toti Græciæ.

Ergo toti Græciæ imperat filius.

### De Inductione.

**INDUCTIO** est Argumentatio, qua  
à pluribus Propositionibus particularibus  
aliquid infert. Tribus modis fieri solet:  
Per exempla; Per similitudines; & per  
enumerationem.

Per

*Per exempla.*

Si M. Crassus, si Q. Metellus, si L. Sylla, si C. Marius, si Senatus, si Populus Romanus iure foederatos homines Ciuitate donauerunt, & Cn. Pompeius, L. Corneliū foederatum iure potuit Ciuitate donare. *Cic. pro Cornelio Balbo.*

*Per similitudines.*

Non ornata, diuesque nauis laudatur, sed firma, & velox; non gemmatus gladius, sed acutus; non formosa regula, sed recta. Ita non locuples, sed probus homo laudandus. *Hanc inductionem adhibet Seneca, sed fusiùs exornata Epist. 76.*

*Per enumerationem partium.*

Ver nimbis obnoxium est; Æstas feruet, Autumnus madet, Hyems alget. Nulla ergo Anni tempestas molestius, & incommodis vacat.

*Per enumerationem specierum.*

Magnam exigit diligentiam Grammatica, multum laboris ars Oratoria, plurimum studij Poetica &c., omnes igitur bonæ artes non nisi studio, labore, ac diligentia comparantur.

Valet Inductio non solum ad Argumentationem, verum etiam ad copiam, & ornatum Orationis. Ea tamen cautio sit, ne in prolixas nimis enumerationes feratur, aut aberret à scopo.

scopo ; nec enim laus est enumerare multa , sed afferre idonea , quæ rei propositæ conueniant . Inductionibus præsertim Similium , vtuntur frequentius Poetæ , frequentissimè Ouidius , quibus fortassè nimium indulgit .

*De exemplo .*

Exemplum hic non sumitur , vt in Locis , pro simplici commemoratione alicuius facti , sed pro quadam argumentandi forma , à superioribus distincta ; sicque definiri potest .

*EXEMPLVM est Argumentatio , quæ per aliquod particulare aliud simile probat ; quare pars Inductionis est , seu incohata Inductio , vt si dicas .*

Tiberius Gracchus mortem meruit , quòd Remp. turbaret .

Ergo Catilina Reip. perturbator mortem meretur .

Hanc eandem Argumentationem si plurium Exemplorum Enumeratione augeas , fiet Inductio .

Nudas hætenus Argumentationes proposui , quales Exempla desiderant , quæ illorum artificium ostendunt . Verùm Oratoris est eas exornare , vt vim quidem suam retineant , sed artem tegant ; ne Oratio Dialogis , & Dialecticis Disputationibus similis videatur . Quomodo tractandæ sint infra videbimus , cùm de Confirmatione agemus .

*Argumentorum, & Argumentationum  
Exempla à locis deducta.*

CAPVT SEXTVM.

*A DEFINITIONE.*

**M**oderatio cupiditatum est maxima Virtus. Sed temperantia est moderatio cupiditatum. Ergo Temperantia est maxima virtus.

*A NOTATIONE.*

Vir dicitur à Virtute. Verè igitur Vir solùm dicendus Virtute præstans.

*A CONIVGATIS.*

Qui prudenter non agit prudens non est. Sed audax prudenter non agit. Non est igitur prudens.

*AE ENUMERATIONE.*

*PARTIVM.*

Debilis Infantia est, Pueritia cæca, Adolescentia incauta, Virilitas laboriosa, senectus ægra. Ergo tota hominis vita misera est.

*A GENERE AD SPECIEM.*

Omnes ingenuæ Artes in magno pretio sunt habendæ. Ergo etiam Poësis.

*A SPECIEBVS AD GENVS.*

Non est vtile, nec honestum, nec delectabile irasci. Non est igitur bonum.

*A SIMILI.*

Idem fermè Auaro contingit, quod Hydropi. Nunquam is bibendo sitim extinguit, nunquam ille habendo cupiditatem.

*A DISSIMILI.*

Quàm dissimilem brutis creauit hominem Deus! Illa reclinauit in terram; hunc erexit in Cœlum. Illorum est infima, & peritura sectari; huius est Cœlestia atque æterna spectare.

*A CONTRARIIS.*

Pax nusquàm terrarum est. Ergo vbique bellum.

*A PRIVATIVIS.*

Tenebras improbi quærunt. Ergo lucem odere.

*A RELATIS.*

Dominus nobis, & Pater Deus est. Illum ergo sequamur serui, & filij.

*A CONTRADICENTIBVS.*

Ostentator sapiens non est. Falsò igitur sapientem se iactat.

*A REPVGNANTIBVS.*

Fugit hostis conspectum: ad omnem umbram trepidat &c. Quis igitur magnanimum illum putet?

*A CAUSA EFFICIENTE.*

Sapientissimus est rerum opifex Deus. Omnia igitur sapientissimè ab illo condita sunt.

*A MATERIALI.*

Fragili constas argilla . Quid ergo fortem te iactas ?

*A FORMA INTRINSECA.*

Animum rationis compotem habemus . Dedecet igitur nos à ratione aberrare .

*A FORMA EXTRINSECA.*

Mira est in imagine proportio partium , mira colorum suauitas &c. Ergo eleganter picta .

*A CAUSA FINALI.*

Non viuit homo , vt edat ; sed edit , vt viuat . Indecorum igitur est abdomini studere .

*AB EFFECTIS.*

Ebrietas mentem habet at , & vitiat sensus . Animo igitur , & corpori noxia est .

*AB ANTECEDENTIBVS.*

Arbor animata est . Ergo viuit .

Natus es mortalis . Ergo moriturus .

*A CONSEQUENTIBVS.*

Opus absoluit . Ergo ante inceperat .

Hostes vicit . Ergo pugnavit .

*A PARI.*

Quotquot Artis Oratoriæ laude clauere diu legendo , scribendo , lucubrando defudarunt . Pari ergo contentione tibi paranda est Ars illa .

*A MAIORI AD MINVS.*

Peccantes Angelos non tulit impune  
 Diuina Iustitia. Multò igitur minùs  
 vilissimum homuncionem feret Cælo  
 temerè insultantem.

*A MINORI AD MAIVS.*

Terrent nos transeuntia mala. Quan-  
 tò magis terrere debent æterna?

*A LOCIS EXTRINSECIS.*

In sacrilegum prædonem, & expila-  
 torem templorum, clamat publicus ru-  
 mor, clamant oculati, iuratique testes,  
 clamat extorta quæstionibus facinorum  
 confessio, clamant leges, & iudicia  
 maiorum, quæ supremo damnandum  
 supplicio decernunt. Quis ergo censeat  
 dimittendum?

*DE DISPOSITIONE PARTIVM  
 ORATIONIS.*

*Quid sit Oratio, quot, & qua  
 illius partes.*

*CAPVT SEPTIMVM.*


**O**RATIO est copiosus, elegans, gra-  
 uisque sermo, ad persuadendum  
 accommodatus. Quauis autem omnis  
 locutio dici Oratio possit, vnius tamen  
 Oratoris locutioni, tanquam proprium  
 con-



conuenire Orationis nomen Cicero in Oratore docet .

Quatuor sunt communes Orationis partes : Exordium , Propositio , Confirmatio , & Peroratio , seu Epilogus . Communes has partes Aristoteles vocat , (a) quòd his communiter Oratio constet . Ex his duæ tantum sunt necessariae , Propositio scilicet , & Confirmatio . Vt enim Orationem conficias , necesse est , vt saltem primò proponas , quid probare dicendo velis , tum illud confirmes .

Narratio præterea , & Confutatio inter partes Orationis enumerantur . Sed Narratio non est communis omnibus Orationibus , cùm propriè pertineat ad Iudiciales , in quibus locum plerunque habet post Exordium . Confutatio , cùm adhibenda est , Confirmationi subiicitur ; vnamq; cum illa Orationis partem constituit , quàm Contentionem vocant . Iam singulas explicemus .



## D E E X O R D I O .

*Quid sit, & quotuplex Exordium.*

## CAPVT OCTAVVM.

**E**XORDIVM est Orationis initium, & quasi Procœmium Actionis. Dixi quasi Procœmium, hoc enim nomine pro Exordio vsi sunt Græci, siue quòd significet cantus præludium, quale iusto modulamini præmittere citharædi solent, siue ( vt alijs placet ) (a) quòd Procœmium idem sit, ac ante ingressum, vt vestibulum ante ianuam domus.

Duplex est Exordij genus: alterum iustum, ac legitimum, alterum ex abrupto.

*Exordium iustum, ac legitimum est illud, quod Auditorum animos preparat ad audiendum, eos beneuolos, attentos, dociles reddendo.*

Beneuolos Auditores sibi conciliat Orator, si eorum, siue maiorum virtutes, ac merita commendet; si suum in eos obsequium, amorem, curamque communis boni testetur; si Aduersariorum causam eleuet, eosque reddat Auditoribus inuisos.

Attentos facit, si de magnis rebus, iu-

a *Quintil. lib. 4. c. 9.*

iucundis, nouis, aut ad audientium vtilitatem, aut ad Remp. spectantibus, dicturum se esse præmonstret, ac si breuitatem polliceatur.

Dociles reddit; si breuiter, apertè, ac distinctè, qua de re sit dicturus, exponat.

Egregiè Cicero Auditorum beneuolentiam captat ab ipsa eorum beneuolentia, suoque in Remp. studio Orat. 4. in Catilinam. *Video P. C. in me omnium vestrum ora, atque oculos esse conuersos &c.* Post reditum in Senatu. *Si P. C. pro vestris immortalibus in me &c.* Post reditum ad Quirites. *Quod precatus à loue Optimo Maximo &c.*

Attentionem conciliat proposita causæ grauitate pro Deiotaro. *Cum in omnibus causis grauioribus &c.* Pro Domo sua. *Cum multa diuinitus Pontifices &c.*, quod si ullotempore magna causa &c. Pro C. Rabirio. *Et si Quirites non est mea consuetudinis &c.* Sic enim existimare debetis, Quirites, post hominum memoriam rem nullam maiorem &c.

Docilitatem parat, clarè proponendo, ac diuidendo ea, de quibus dicturus est pro P. Quintio. *Quæ res in Ciuitate due plurimum possunt &c.* *Dabo operam, ut à principio, res quemadmodum gesta, & contracta sit, cognos-*

gnoscat, & inferius. Ostendam primum causam fuisse, cur &c. Pro Sexto Roscio. Credo ego vos Iudices mirari &c.; Atque ut facilius intelligere possitis &c. tum infra. Totam causam Iudices explicemus. Pro P. Sextio. Si quis antea Iudices mirabatur &c. Sed quoniam singulis criminibus ceteri responderunt, dicam ego de omni statu P. Sextij.

Diuiditur Exordium iustum, ac legitimum in Principium, & Insinuationem.

**PRINCIPIUM** est Exordium, quod statim apertis rationibus Auditores beneuolos, attentos, dociles facit. **INSINUATIO** est artificiosa verborum, sententiarumque circuitio, qua sensim Orator in Auditorum animos irrepit, quare idem occultè præstat, quod apertè Principium.

Vtimur insinuatione, cum causa nobis iniquior est; cum de re acturi sumus, quæ turpis, vel minùs decora videatur, vel insolita, vel ardua, siue ab Auditorum opinione remota. Cæterum cum causa honesta est, nec abhorrrens ab Audientium sensu, insinuatione non eget.

Cicero pro Archia Poeta insolito dicendi genere vsurus, præter consuetudinem fori, multa que allaturus extra

Cau-

Causam de studijs literarum, insinuationem præmittit. *Sed ne cui vestrum mirum esse videatur &c.*

Cæsar apud Salustium in Coniuratione Catilinæ sententiam suam in Senatu dicturus, quæ ad seruandam Coniuratorum vitam spectabat, cum turpior causa videretur, ita per insinuationem exorsus est. *Omnes homines P. C., qui de rebus dubijs consultant, ab odio, amicitia, ira, atque, misericordia vacuos esse decet &c.*

*EXORDIVM* ex abrupto est repentinus in causam ingressus, sine præparatione animorum, quare acephalum, hoc est sine capite, ab Aristotele vocatur. Hoc utitur Orator, cum Causa vehementiores exigit affectus, ut doloris, indignationis, lætitiæ; atq; ideo fit per validiores Figuras, per Apostrophem, Deprecationem, Exclamationem, Licentiam. Nota sunt exempla Tullij, in Catilinam prima. *Quousque tandem abutere Catilina patientia nostra? In eundem secunda. Tandem aliquando Quirites L. Catilinam furem audacia &c., & in Pisonem. Iamne vides bellua, iamne sentis? &c.*

Apud Liuium lib. 6. Camillus militum animos, auctis hostium copijs perturbatos, excitaturus, ex abrupto concionem exorditur. *Qua tristitia, mi-*

*lites, hæc, qua insolita cunctatio est? hostem, an me, an vos ignoratis?*

Ibidem Manilius Plebem in Magistratus accendens. *Quousque tandem ignorabitis vires vestras, quas natura ne belluas quidem ignorare voluit? Numerate saltem, quot sitis, quot aduersarios habeatis.*

Aliquando etiam Orator statim causam aggreditur, sine vilo Exordio, illius summam apertè proponens, idque maximè in secundis Actionibus, in paruis, notis, aut frequentibus Causis, aut in temporis angustia: ita Cicero pro A. Cluentio *Animaduerti, Iudices, omnem accusatoris Orationem in duas diuisam esse partes, & sexta in Verrem. Venio nunc ad istius, quemadmodum ipse appellat, studium: ut amici eius, morbum, & insaniam: ut Siculi, latrocinium &c.*

## DE FONTIBVS EXORDIORVM.

*Sine vnde sumi possint Exordia.*

### CAPVT NONVM.

**E**X omnibus Locis Exordia deduci possunt, maximè intrinsecis: quare plures eorum sunt fontes; at præcipuos aliquot ostendere satis erit, alios innuere.

*A GENERE*, seu à *Thesi* ad *Hypothesim* facilis est exordiendi ratio: ut si strenui alicuius Bellatoris virtutem laudaturus, à commendanda generatim bellica virtute sumas initium.

*A DIVISIONE*, siue *DISTRIBUTIONE partium*, quæ fit, cum pluribus enumeratis, quæ vel in laudem, vel in vituperationem dicenda occurrunt, vnum eligit Orator, de quo dicat. Ut si multis in Exordio consideratis, quæ Patriam felicem æquè reddunt, ac illustrem, nihil tamen ad illius decus, ac præsidium præstantius esse statuas, quàm integerrimi Senatus grauitatem, ac sapientiam.

*AB ADIUNCTIS rerum, personarum, locorum, vel temporum*. Ex his plerunq; Tullius desumit Exordia, quod in illius Orationibus obseruabis. Latinus Pacatus Panegyricum suum Theodosio dictum ab Adiunctis Personæ laudandæ, ac laudantis, & Auditorum, loci etiam, ac temporis, elegantissimè exorditur.

Si quis vnquam fuit, Imp. Auguste, qui te præsentè dicturus ante trepidauerit, cum profectò me esse, & ipse sentio, & his, qui consilium tuum participant, videri posse video. Nam cum te semper ultra omnes retrò Principes laudari oportuerit, nunc porrò

ultra, quàm aliàs prædicatus es, in ea Vrbe conueniat dicendo celebrari, cuius & libertatem armatus asseruisti; & auxisti dignitatem rogatus; quo tandem modo consequi Maiestatem vtriusque vestrum Oratione mea potero? Hoc præcipuè in tempore, quo ambo ita mutuò creuistis, vt nec tu fueris adhuc maior, nec illa felicior. Huc accedit auditor Senatus, cui cum difficilè sit pro amore, quo in te præditus est, de te satisfieri, tum difficiliùs pro ingenta, atque hæreditaria orandi facultate, non esse fastidio rudem hunc, & incultum transalpini sermonis horrorem; præsertim cùm absurdæ, sinistraque iactantiæ possit videri, his ostentare facundiam, quam de Deorum fonte manantem in nostros vsque vsus deriuatio fera traduxit &c.

Huc ea spectant Exordia, quæ à præsepsi aliquo euentu sumuntur, vt ex tempore nata videri possint; quæ multum habent gratiæ, augentque famam ingenij. (a) Ita si habenda sit Oratio gratulatoria in Principis aduentu, exorta repentina serenitate, hinc duci poterit initium; quasi verò Cælum ipsum communem eo die lætitiæ suo consensu probarit. Cicero pro Milone dicturus, cùm præter morem dispositos

a *Quintil. lib. 4. cap. 1.*



positos in foro, & circum vicina templa, milites armatos videret, ab illius nouitatis consideratione Orationem exorsus est. *Et si vereor Iudices &c.*

*A CONTRARIO* deducuntur Exordia, prius proponendo, quasi per quandam præoccupationem, sententiam contrariam, eamque refellendo, vt nostram statuamus. Ita si Principis seueritatem defendendam suscipias; exordiri poteris ab Imperantium facilitate, morumque suauitate commendanda, quæ beneuolentiam populorum conciliat, blandumque est animorum illicium. At nimiam eam dulcedinem noxiam esse ostendes, grauesque bono regimini, publicæque tranquillitati clades frequentissimè parere; cum sensim trahatur in contemptum languens authoritas, & indulgentia dominantis foueat malorum audaciam, proinde tutius esse concludes Imperij ministrum adhibere seueritatem, quæ populorum frænum est, ac tutela Maiestatis.

A simili etiam, à dissimili, à comparisonem, ab opinione Auditorum, à Consuetudine aliqua, à graui Sententia, ab Historia, à Fabula, à proposita Quæstione insigni erui possunt Orationum initia. Sed non omnibus Causis omnia conueniunt, quarum species (vt cum Quintiliano loquar) con-

sequi

sequi omnes non possumus : quare singulis consilium ex propria ratione nascetur .

Varios exordiendi modos pro diuersitate Causarum vide in Rhetore Galli *lib. 4. cap. 6.* , & sequentibus . Consule Quintilianum *lib. 4. cap. 1.* , & Hermogenem *lib. 1. de Inuentione* .

*Observanda pro conficiendis  
Exordijs .*

## CAPVT DECIMVM. .

**P**ermagni momenti est, quod Tullius (a) peritissimus Orationis artifex suo docet exemplo . Omnibus, inquit, rebus consideratis, tum deniq; id, quod primùm est dicendum, postremò soleo cogitare, quò utar Exordio; nam si quando id primùm inuenire volui, nullum mihi occurrit, nisi aut exile, aut nugatorium, aut vulgare, atque commune . Idcirco tota causa pertentata, atque perspecta, Locis omnibus inuentis, atq; instructis, considerandum est, quo principio sit vtendum; sic & facilè reperietur; nec extrinsecus aliundè quærendum erit, at ex ipsis Causæ visceribus sumendum; hoc est ex rebus quæ pertinent ad causam .

Quin;

a *Cic. de Oratore lib. 2.*

Quintiliani ( a ) quoque perutile monitum est , vt dicturus intueatur quid , apud quem , pro quo , contra quem , quo tempore , quo loco , quo rerum statu , qua vulgi fama , dicendum sit , quid Iudicem sentire credibile sit , quidque obtinere dicendo velit Orator . Sic ipsa illum natura eò ducet , vt sciat , quid primò dicendum sit .

Hæc Tullij , & Quintiliani monita in Orationibus præcipuè Generis Iudicialis seruanda sunt : hæ siquidem accuratiora poscunt Exordia ; quæ causæ maximè cohæreant , ad eamque pertractandam viam sternant ; neque ad pompam , sed ad motum animorum instructa , plusque artis habeant , quàm ostendant .

In Genere Deliberatiuo minùs necessarium Exordium est , idque breuius esse debere Fabius docet , ( b ) ac veluti quoddam caput tantum , & initium , quod Oratoris mentem , & ea , de quibus dicturus accedit , aperiat : nec diligentius elaboratum videatur ; præparati etenim artificij suspicio fidem Orationi , & Oratori adimit authoritatem .

In Demonstratiuo Genere liberiora Exordia sunt ; eaque sentit Aristoteles longè

a *Quintil. lib. 4. cap. 1.*

b *Idem lib. 3. cap. 8.*

(a) longè à materia , & vndè libeat , deduci posse ; dum tamen aptè cadant , & in fine connexionem habeant cum re propofita , de qua Oratio habenda est . His omnis conuenit ornatus , dum absit inanistumor , & ostentatio ; nihil enim æquè Auditorem ab initio demeretur , ac Orationis , & Oratoris modestia . Tale denique præcæm sit , vt decorem fronte præferat , non fucum ; neque nimia promittat ; laudabilius enim est à modicis initijs assurgere Orationem , quàm cœptis ingentibus deficere .

Vniuersè illud Tullij seruetur . Omne principium aut rei totius , quæ agitur , significationem habere debet , aut aditum ad causam , & communitiorem , aut quoddam ornamentum , ac dignitatem . Sed oportet , vt ædibus , ac templis vestibula , & aditus , sic Causis principia pro portione rerum præponere . Non ergo frustra , nec temerè fiat Exordium : (b) at muneribus suis præstandis aptum sit , Causæque conueniens ; non commune , quod in quantilibet partem verti possit ; non tritum , ac vulgare , nec nimis longè petatum .

*Exor-*

*a Arist. Rhet. lib. 3. c. 14.*

*b Cic de Oratore lib. 2.*

*Exordij mensura, & artificium.*

CAPVT VNDECIMVM.

**D**E Exordij magnitudine nihil certum definiri potest. Hoc vnum statuit Fabius, vt modus Principij sit pro Causa, nam breuius simplices, longius graues, perplexæ, suspectæque, & quæ turpes videntur desiderant: (a) Nimia certè prolixitas, vbique ingrata, hic etiam noxia est; nam longioris. Orationis expectatione statim Auditorem deterret; Cæterum idem Fabius eos ridendos putat, qui velut leges procemijs omnibus dederunt, vt intra quatuor sensus terminarentur. Hermogenes tamen *lib. 1. de inuentione*, quem alij sequuntur, aliquam rationem tradit, qua perfectum Exordium texi possit, his quatuor partibus constans.

Prima sit Propositio, Secunda Ratio, Tertia Redditio, seu Assumptio, Quarta Conclusio, seu Comprobatio, cui quandoque ratio annectitur.

Propositio primam Exordij sententiam explicat, quæ desumpta sit, vel ab Adiunctis rerum, vel personarum, aut sanè aliquo modo ad Orationis ar-

gr

a *Quint. lib. 4. cap. 1.*

gumentum referatur. Ratio est causa, quæ redditur Propositionis, hæcque aliquando alijs rationibus confirmatur, & amplificatur. Assumptio est quædam Complexio deducta ex Propositione, & Ratione. Conclusio est Redditionis causa, quæ Exordij, summam colligit, & aditum aperit ad dicenda. Huiusmodi exemplum affert Hermogenes.

**PROPOSITIO.** Quanta ob vectigalium gravitatem mala patiantur. Insulæ coloni, neminem vestrum, Athenienses, arbitror ignorare.

**RATIO.** Cum enim soluendo impares charissimos filios vendere cogantur, res tanta ignota vobis esse non potest.

**ASSUMPTIO.** Quamobrem equum est, atque ad vestram prudentiam attinet, ac dignitatem; ut gravissima, quibus opprimuntur, onera minuatis.

**CONCLUSIO.** Non enim levis nomini vestro labes impendet, si patiamini populos infelices tam impia calamitate laborare.

Idem fermè artificium inuenies in Exordio Orationis pro lege Manilia, & in Principio Oratoris ad Brutum.

Verum cum totidem semper constare partibus, nec eadem ratione texi possit,

possit, aut debeat Exordium, admodum incerta est ea methodus, ab Hermogene tradita; illamque potius ad explicanda Exordiorum artificia nosse iuuat, quàm veluti præscriptam omnibus regulam obseruare.

### *De Narratione.*

## CAPVT DVODECIMVM:

**N**ARRATIO est rerum explicatio, & quadam quasi sedes, ac fundamentum constituenda fidei, (a) Causam enim, & quæ ad eam pertinent explicat, à quarum explicatione pendet Confirmatio.

Hæc ea Narratio est, quæ à Tullio Ciuilis dicitur, & propriè conuenit Iudicialibus Causis. At neque semper in his adhibetur: nam breuiores quædam Propositionem potius habent, quàm Narrationem; (b) neque, si res aliundè nota est, nec dubium, quid gestum sit, narrare oportet.

Generis Demonstratiui Oratio Narrationem, tanquam partem ab alijs distinctam, non habet; cùm tota plerumque versetur in enarrandis, & exornandis alicuius factis.

Genus

a *Cic. in Part. Orat.*

b *Quintil. l. 4. c. 2. Cic. de Oratore lib. 2.*

Genus quoque deliberatiuum huiusmodi Narratione non eget; nisi fortè de publica aliqua deliberatione agatur, deque re graui, vel minùs nota, quam expediat Auditores edoceri, vt quid deliberandum sit, Orator ostendat. Ita Cicero in Oratione pro lege Manilia post Exordium vsus est Narratione, qua imminentis belli grauitatem exponit, vt Pompeium deligendum esse Imperatorem persuadeat.

Vt plurimum Exordio succedere Narratio solet: quanuis aliquando ad refellenda, quæ ab Aduersarijs obiecta fuerint, liberum Oratori sit aliquam Confutationem Narrationi præmittere; quod egit Cicero pro Milone, statim post Exordium confutare aggressus, quæ à Clodianis obijciebantur. Sed antequam ad eam Orationem venio, quæ est propria nostra Questionis, videntur ea esse refutanda, quæ in Senatu saepe ab inimicis, ab improbis saepe iactata sunt &c., hinc transit ad Narrationem. Quod quò facilius argumentis perspicere possitis, rem gestam vobis dum breuiter expono, quaso diligentè attendite. P. Clodius cum statuisset omni scelere in pratura vexare Remp. &c.

Cùm obesse potest integra, & sincera gestæ rei Narratio, tunc Tullius docet



ocet membratim eius partes disper-  
endas in Causam, & ad vnamquam-  
ue rationem accommodandam, ut  
ulneri prestò medicamentum fit, &  
dium statim defensio mitiget. Hac  
rte in narrando utatur Orator, ut  
omnia vertat in rem suam; aduersan-  
ia, quæ præteriri poterunt, præte-  
eundo, aut infirmando; quæ Causæ  
fauent, diligenter, & enodatè nar-  
rando.

Sæpius Narrationi præmittitur ali-  
qua Prænarratio, siue præparatio ad  
Narrationem. Opportuna certè ad  
illam transitio post Exordium adhi-  
benda; à qua tamen abesse vult Fabius  
affectatam argutiam, quæ fallat Au-  
dientes, ac transitum cælet. (a) Qua-  
propter, ut non abruptè cadere in  
Narrationem, ita non obscure tran-  
scendere est optimum. Cic. in Ora-  
tione pro lege Manilia sic ab Exordio  
ad Narrationem transit. *Atque ut  
inde Oratio mea profiscatur, unde  
hac omnis Causa ducitur; bellum gra-  
ue, & periculosum vestris vectigali-  
bus, atque socijs à duobus potentissimis  
Regibus infertur. Et pro Roscio Ame-  
rino. Atque ut faciliùs intelligere  
possitis, Indices, ea quæ facta sunt in-  
digniora esse, quàm hæc sunt, quæ di-  
cimus,*

a Quintil. lib. 4. c. 1.

*simus, ab initiores quemadmodum gesta sit vobis exponemus &c.*

Sed non minùs inter cæteras Orationis partes, quàm inter Narrationem, & Exordium, esse debet Transitionum nexus, quarum Indicem habes in prima parte post Figuras.

Quatuor Narrationis virtutes, quas alibi explicuimus, huic etiam conueniunt; sed hanc maximè Tullius vult esse probabilem, & perspicuam; nec historico, sed propè quotidiano sermone explicatam dilucidè; non tamen prorsus inornatam, ne indocta sit. (a) Quæ Figuræ ad eam illustrandam, suauemque reddendam valeant iam vidimus in Tractatu de Narratione.

Quintilianus omni, qua potest, gratia, & venere exornandam Narrationem sentit; semper tamen spectata rei, quæ exponitur, natura: caret enim cæteris lenocinijs expositio; & nisi commendetur hac venustate, iaceat necesse est. (b) Aliquando etiam affectibus vtendum; eùm præsertim de re agitur miseranda, inusitata, atroci. Plures valde Patheticas Narrationes habet Cicero maximè in Verrina 7. Talis est illa, qua subiicit oculis nauarchorum supplicium, quos immanissimus

a *Cic. in Oratore.*

b *Quintil. lib. 4. c. 2.*

mus Verres iniuste damnauerat .

Includuntur in carcerem condemnati : supplicium constituitur in illos , sumitur de miseris parentibus nauarchorum . Prohibentur adire ad filios suos , prohibentur liberis suis cibum , vestitumque ferre . Patres hi , quos videtis , iacebant in limine ; matresque miseræ pernoctabant ad ostium carceris , ab extremo complexu liberum exclusæ ; quæ nihil aliud orabant , nisi ut filiorum extremum spiritum excipere sibi liceret . Aderat ianitor carceris , carnifex Prætoris , mors , terrorque sociorum , & ciuium lictor Sextius , cui ex omni gemitu , doloreque certa merces comparabatur . Ut adeas tantum dabis : ut cibum tibi intrò ferre liceat , tantum : nemo recusabat . Quid , ut vno ictu securis afferam mortem filio tuo , quid dabis ? ne diu crucietur ? ne sæpius feriat ? ne cum sensu doloris aliquo , aut cruciatu spiritus auferatur ? etiam ob hanc causam pecunia lictori dabatur . O magnum atque intolerandum dolorem ! o grauem , acerbamque fortunam ! non vitam liberum , sed mortis celeritatem redimere cogebantur parentes &c.

Non est , cur plura tibi afferam Narrationum exempla ; cum his affluant Ciceronis Orationes .

Sub.

Subdunt aliqui Narrationi Digressionem, seu Egressionem. *Est autem DIGRESSIO aliena rei, sed ad utilitatem Cause pertinentis, extra ordinem excurrrens tractatio.* Verum hoc expatiandi genus (vt Fabius ait) non iam post Narrationem, quàm alibi locum habere potest; (a) cum res postulat, aut certè permittit; atque adhibetur, ad illustrandam, & ornandam Orationem, aut ad animos Auditorum recreandos, & excitandos. Plura sunt, quæ per totam Causam varios habent excursus; vt laus hominum, commendatio virtutum, vitiorum vituperatio, locorum descriptio, rerum gestarum, & quandoque Fabularum expositio. At caueat prudens Orator, ne frequentior sit, aut prolixior Digressio, vel à proposito aliena; nec solum opportunè digrediat, verum etiam aptè redeat, vnde diuerterat. Cicero pro L. Cornelio Balbo digreditur in Pompeij Laudes. Actione 6. in Verrem diuertit in Eryphiles Fabulam; atque ibidem inferius in veterem Siculorum religionem erga Cererem, & Proserpinam, cuius raptum etiam describit, vbi cum longior futura esset Digressio, hac vititur præparatione.

*Nimum mihi diu videor in uno*

ge.

3. Quint, lib. 4. c. 3.

*genere versari criminum. Sentio, Indices, occurrendum esse fatietati aurium, animorumque vestrorum &c., tum denique ad rem suam ita redit. Non obtundam diutius aures vestras. Iamdudum vereor, ne Oratio mea aliena ab iudiciorum ratione, & quotidiana dicendi consuetudine esse videatur.*

*De Propositione.*

CAPVT DECIMVM TERTIVM.

**P**ROPOSITIO est brevis rei tractanda comprehensio. Hanc aliqui volunt extremam esse clausulam Exordij, nec partem ab eo distinctam: Fabius, & alij Narrationis, aut Confirmationis initium; nec semper necessariam esse, immò quandoque omittendam. (a) Nec dissentio, si loquuntur de Propositione, quæ in Causis Iudicialibus Narrationi subiicitur, quæ tunc omitti potest, cum statum Causæ satis explicuit Narratio. At in alijs Generibus pro Narratione Propositio est, siue referatur ad Exordij finem, siue ad Confirmationis principium. Nulla certè Oratio haberi potest, nisi prius Orator, qua de re dicturus sit, proponat; alioquin cæcus, & ignarus quò tendat,

C

a Quintil, lib. 4 c. 4.

dat, Andabatarum more pugnabit.

Debet itaque Propositio paucis, apertisque verbis explicare, atque omnia summam complecti, quæ in Oratione tractanda erunt. Aliquando simplex, atque indiuisa est; aliquando in partes distributa, quæ ternarium plerunque numerum non excedunt. Recta verò partitio totam Orationem illustrat, plurimumque confert ad seruandum ordinem; atque ad Auditorem docilem, attentumque reddendum: vt contra multiplex, obscura, nimiumque minuta distributio confusionem, ac tædium parit.

Cicero Philippica 7. primò simplicem Propositionem præmittit. *Ego ille, dicam sapius, pacis semper laudator, semper author, pacem cum M. Antonio esse nolo.* Deinde vtitur partitione. *Cur igitur pacem nolo? Quia turpis est, quia periculosa; quia esse non potest. Qua dum explico P. C. peto à vobis &c.*

Propositionum inuentionem arte tradi posse Fabius negat; cùm ingenium potiùs, & vsus, & imitatio ad eas valeant inueniendas. Cæterùm ex natura, & adiunctis rerum desumuntur, circa quas versatur Oratio.

In Genere Iudiciali Propositionem  
sug-

suggerit ipsa Causa, cuius statum explicare debet. In Deliberatiuo, & Exornatiuo Propositiones aliquid ab Arte venustatis habere possunt, quæ reddantur Auditoribus gratiores. Hæc plausibilem maximè Propositionem efficiunt. (a)

**PARADOXVM**: ex. gr. sit hæc Propositio probanda. *Gloriosa est clementia in victos*. Hæc nihil hætenus nouum habet, nihil mirabile, quo plausum mereatur. Mirabilis eadem videbitur ad Paradoxum traducta, si dices. *Nulla maior victoris gloria, quàm ipsam vicisse clementia victoriam*. Iisdem fermè verbis Cæsarem Tullius laudat in Oratione pro M. Marcello. *Ipsam victoriam vicisse videris, cum ea ipsa, quæ illa adepta erat, victis remisisti*. Eleganti Paradoxo, vsus est D. Io: Chrysostomus, (b) qui Orationem habiturus ad populum Antiochenum, quæ ostenderet, vtilem esse beneficentiam in pauperes, hoc ita proposuit. *Eleemosina ars est omnium artium questuosissima; quod idem est, ac si diceres. Quæ largimur pauperi, lucramur*.

**ANTITHESIS**, seu **CONTRAPOSITVM**: cùm scilicet oppositis

C 2

con-

a Paulus Aresius de Arte concion.  
lib. 1. c. 9. b Tomo 5. hom. 33.



conflata videtur Propositio, quæ inter se pugnent. Ex. gr. *Tenax avaritia inops opulentia est. Filium odit, qui nimis amat. Nihil aliud est longior vita, quam mors prolixior. Dicere poteras. Misera avaritia est, cui opes nulli sunt vsui. Filio nocet nimius parentis amor. Infelix est longior vita. Sed quantò maiorem gratiam illæ Antitheses habent?*

**COMPARATIO** : ex. gr. *Regnum magis tuetur populorum amor, quam terror armorum. Certior est in aduersis, quam in prosperis fides. Si Comparationes adimas, minus utique laudis hæ Propositiones habebunt, si dicas. Amor populorum Regnum tuetur. Fides in prosperis incerta est.*

**ANTONOMASIA**. Sic D. Carolum absolutissimum numeris omnibus *Præsulem* : D. Ferdinandum Castellæ Regem Christianum Principem propones. Si strenuus aliquis Heros laudandus, non fabulosum *Alcidem* ; Si Romana præstans eloquentia Orator. *Latinum Isocratem ostendes.*

**ALLEGORIA**, seu **METAPHORA**. Ita de Deipara Virgine dicturo facile occurret *Nostre Salutis Aurora, vel Iris Pacis nuntia, vel Cynosura in huius mortalitatis Oceano fluctuantibus affulgens. De D. Theresia Divini*  
amo.



*amoris Aetna.* De D. Rosa Limana,  
Virgine, si nomen spectes, & miram  
vitæ austeritatem æquè, ac sanctita-  
tem. *Florentin vepribus Rosa.*

Verùm hæc translata multum ha-  
bent pompæ, nec minus periculi. Nec  
omnibus æquè placent Metaphoricæ  
Propositiones, doctis maximè, graui-  
busque viris; nisi qua conuenit, arte  
tractentur, quod omnium non est. Id  
enim vim ingenij, & copiam Eruditio-  
nis requirit, quæ si desint, euenit sapè,  
vt Metaphoræ asciscantur, quæ Perso-  
narum, rerumque dignitati non res-  
pondeant, vt Oratio ab argumento  
deflectat, vel ad frigida, & inepta  
dilabatur.

Alia insuper Schemata, quæ fa-  
ciunt Orationem argutam, elegantio-  
res reddere Propositiones possunt. At  
quis omnes horum formas colligat?  
cùm ipsa materiæ diuersitas diuersas  
excitet species, atque acuat ingenia, vt  
pro rerum opportunitate noua inue-  
niant, quæ nunquam Ars præmon-  
strauit.

Illud firmum sit; in deligendis Pro-  
positionibus non tam spectanda, quæ  
placeant, quàm quæ conueniant, &  
probari commodè possint; ne cùm  
*amphora institui cœperit, currente rota  
vrceus exeat.* Nec eos imitetur Græ-

cos Orator, qui mira inscriptionum felicitate, propter quas, ut ait Plinius (a) vadimonium deferri possit, libros commendauere lectoris, cæterum intus meris inanijs plenos. Omnino buccæ noscenda est mensura suæ. (b)

*De Confirmatione.*

CAPVT DECIMVMQVARTVM.

**C**ONFIRMATIO, seu Contentio, est pars Orationis, quæ argumentando nostræ Causæ fidem, & authoritatem, & firmamentum adiungit, (c) breuius, est rei propositæ probatio.

Hæc tandem Oratio est. Præmissæ hæctenus partes paucis admodum verbis suppleri sæpissime possunt, vnica scilicet Propositione. Hic tota vis dicendi est; hic labor, hic pugna; cuius victoria pendet ab idoneo Argumentorum viû, & ordine.

Optimus, & acceptissimus ordo hic est; (d) ut validiora præcedant; quæ leuiora fuerint, in mediam turbam conijciantur, præstantissima in extremo ordine collocentur; quanuis & à minimis crescere possint, ut ratio Causæ

a In Praefatione Naturalis hist.

b Iuuen. Sat. 11. c Cic. de Inuent. lib. 1.

d Idem de Orat. lib. 2.

se postulabit : nunquam tamen à potentissimis ad leuissima decrescat Oratio.

Quæ firmiora sunt argumenta, fusiùs explicanda : infirmiora, congreganda sunt ; vt mutuo roboventur auxilio, & si valere non possunt, vt magna, valeant vt multa. (a) Id quoque spectandum, vt varietatem habeat Argumentatio, quam afferunt variæ illius formæ. Rarò apertum Enthimema, rariùs integrum Syllogismum adhibere solent Oratores. Frequentiùs naturalem partium ordinem mutant ; modò Assumptionem, modò Complexionem præmittunt, siue probationem Assumptionis, vel Complexionis. Aliquando singularum Propositionum rationes afferunt, aliquando omittunt ; modò Argumentationem Conclusionem absolunt, modò hanc deducendam Auditoribus relinquunt.

Neque Dialecticorum more certandum : illorum enim est disputare, & loqui ; Oratorum autem dicere, & ornare. (b) Vestiendæ itaque opportunis Amplificationibus Argumentationes, & Figuris exornandæ. Minoris ponderis Argumenta nuda vibrentur : grauiora illustriori cultu tractentur ; cum

C 4

omnia

a *Quintil. lib. 5. c. 12.*b *Cic. in Orat.*

omnia ex Fabio admittant ornamenta, ea tamen lege, vt hæc impedimento non sint, nec afferant obscuritatem, neque vim Argumentationis retundant. (a)

Amplificatæ, & ornatæ Argumentationis luculentissimum exemplum habes in Oratione pro lege Manilia, cuius confirmatio tota fermè hoc vno nititur Syllogismo.

Qui præstat scientia rei militaris, virtute, autoritate, felicitate, summus est Imperator.

Atqui Pompeius his omnibus præstat.

Ergo est summus Imperator; ac proinde præ cæteris ad bellum contra Mithridatem gerendum eligendus.

Incipit Syllogismi Propositio ab illis verbis: *Ego enim sic existimo in summo Imperatore &c.* Tum sequitur Assumptio. *Quis igitur hoc homine unquam scientior fuit &c.* Hæc latissimè funditur singulis partibus amplificatis, & confirmatis vsque ad Complexionem. *Quare, cum & bellum ita necessarium sit &c.*



## De Confutatione.

## CAPVT DECIMVMQVINTVM.

**C**ONFUTATIO, seu Refutatio, vel Reprehensio, est pars Contentio-  
nis, quæ Cause aduersantia dissoluit.  
Quauis in distributione partium Ora-  
tionis post Confirmationem collocetur,  
non semper eundem locum tenere de-  
bet, cùm illius dispositio sit Causæ ac-  
commodanda. Si agimus, nostra con-  
firmanda sunt primùm, tum quæ nostris  
opponuntur, refutanda. Si responde-  
mus, priùs incipiendum est à Refuta-  
tione. *Quintil. lib. 5. c. 13.*

Non ex alijs Locis ratio Argumento-  
rum pro Confutatione peti potest,  
quàm pro Confirmatione; nec verbo-  
rum, aut sententiarum, & Figurarum  
alia conditio est.

In refellendis Aduersariorum Argu-  
mentis eorum ordo (si commodè fieri  
potest) inuertendus; vt mediocria  
priùs dissoluenda proponantur, fortiora  
collocentur in medio: in finem imbe-  
cilliora reijciantur.

Confutari possunt, quæ obijciuntur,  
aut illa negando, nisi ad eò manifesta  
sint, vt negari nequeant; aut osten-  
dendo dubia esse, vel minùs probabi-  
lia,

lia, sine leuiora: vel in Aduersarios retorquendo. Nonnunquam veteratoria digressionem vis Argumenti eluditur, facetijs quoque rerum grauitas eleuatur, ac trahitur ad risum. Ita festiuè Tullius in Oratione pro L. Murena iocatur in Iuris Ciuilis peritiam, quam S. Sulpicius florebat, & in Stoicam M. Catonis Philosophiam, atque aduersantem vtriusque auctoritatem ludendo imminuit. Vide quæ diximus de Diminutione.

Confutationi plurimùm seruiunt Adiuncta Personæ, loci, temporis &c. Quæ factum antecedunt, comitantur, subsequuntur, omnia denique circumstantia perpendenda; examinanda quoque malignitas æmulorum, vt inde capita Confutationis desumantur. Tandem ipsæ Aduersariorum rationes responsionem suggerent: nam quibus ex Locis aliqua res confirmari potest, iisdem potest ex Locis infirmari. (a) Cicero pro Roscio ab Adiunctis Personæ, & ab atrocitate facti ostendit, probabile non esse parricidium ab ipso fuisse commissum.

Patrem occidit Sex. Roscius? Qui homo? Adolescentulus corruptus, & ab hominibus nequam inductus? Annos natus magis quadraginta. Vetus  
sci-

a Cic. de Inuent. lib. 2.

scilicet ficarius, homo audax, & saepe in cæde versatus? At hoc ab Accusatore ne dici quidem auditis &c.

*De Peroratione.*

CAPVT DECIMVMSEXTVM:

**P**ERORATIO est exitus, & determinatio totius Orationis, (a) dicitur etiam Conclusio, & Epilogus. Duas partes habet, Enumerationem. Græcè Anacephaleosim, & Amplificationem.

**E**NUMERATIO est brevis rerum præcipuarum collectio. Non ergo tota Oratio reuoluenda, sed summa tantum, grauioraque capita colligenda. Quæ autem enumeranda videntur, cum pondere aliquo dicenda sunt, & aptis excitanda sententijs, & Figuris utique varianda; alioquin nihil est recta illa repetitione odiosius. (b) Utimur autem Enumeratione, cum vel reficienda est Auditorum memoria, ubi fuerit Oratio prolixior, vel cum maiorem vim habitura est Causa, si tota simul ante oculos ponatur.

**A**MPLIFICATIO est vehemens quedam Argumentatio, ad motum

C. 6

ani-

a Idem de Inuent. lib. 1., & in Partit. Orat. b Quintil. lib. 6, cap. 1.



*animorum instituta.* (a) Siue est facti ; vel rei Exaggeratio , per quam Auditorum commouentur affectus . Adhibetur quidem in reliquo etiam Orationis cursu Amplificatio , de qua alibi plura diximus : at illa docendi causa fit , hæc commouendi . Et quāuis Exordium , & cæteræ partes affectus aliquos admittant , leniores tamen , & breuiores ; Peroratio in his validiùs excitandis omnes Eloquentiæ vires exercet . Hic proprius augendi locus : hic tota pandere possumus vela : hic verbis , atque sententijs vti licet magnificis , atque ornatis , tum grauioribus , atque vehementioribus Figuris ; cuiusmodi sunt Apostrophe , Deprecatio , Profopopœia &c.

*De Affectibus .*

CAPVT DECIMVMSEPTIMVM.

**D**E mouendorum Affectuum Arte scripsere complura doctissimi Viri : sed operosa , diffusaque præcepta , & petita à Morali Philosophia de humani animi motibus disputationes Tiocinium istud non capit . Pauca tantum aduertenda ex instituto meo summam excerpam , quorum facili-  
lior ,

a *Cic. in Partit.*



lior, atque vtilior cognitio sit ijs præsertim, quibus ea nondum est Eloquentiæ vis, & authoritas, qua valeant aliorum animis imperare; satisque est, si leuiori aliquo conatu mouere discant affectus, vt ijsdem expugnandis præludant.

Aduerte itaque primò quemlibet humani animi affectum aliquo bono, vel malo moueri. Nihil enim aliud est affectus, *quàm animi commotio, ex opinione boni, vel mali exorta.*

Proposito aliquo bono, vel honesto, vel vtili, vel delectabili mouetur *AMOR*, natura propensus in bonum, vt bonum: quòd si bonum est absens, oritur *DESIDERIVM*; si venturum, *SPES*; si præsens *GAVDIVM*, seu *LÆTITIA*. Sic amamus Pacem, vt bonam, desideramus absentem, speramus futuram, ea reddita, præsentique gaudemus.

Malo mouetur *ODIVM*, *IRA*, *TRISTITIA*, *TIMOR*. *ODIVM* in malum, vt infestum, vel inuisum insurgit. *IRA* ad malum præsens depellendum exardescit. *TRISTITIA* de malo præsentis dolet. *TIMOR* venturum formidat. Ita odimus improbos, vel nobis inimicos; irascimur inferentibus iniuriam, ad quam depellendam excitamur; tristamur bo-

norum, vel amicorum iactura; time-  
mus ob aliquod impendens discrimen.

**DESPERATIO** ex mali auertendi,  
vel acquirendi boni diffidentia nasci-  
tur. Sic præpotentis aduersarij vio-  
lencia oppressus desperat Causæ victo-  
riam. Ex alieni mali consideratione,  
quod immerenti aduenerit, **MISERI-  
CORDIA**, seu **COMMISERATIO**  
suboritur; hinc eorum miseremur, quos  
fortunis iniuste spoliatos videmus.  
**CLEMENTIA** malum auertit, quod  
Ira minatur. Hinc læsus, iratusque  
Princeps mitigato precibus iniuriæ do-  
lore dat reo supplici veniam. Longum  
esse ire per singulos Affectus, quorum  
varia sunt nomina, multiplex apud  
Authores distinctio: sed ad primores,  
quos recensui, reliqui referuntur, v  
**EMULATIO** ad **DESIDERIVM**,  
**ADMIRATIO** ad **LÆTITIAM**,  
**VERECVNDIA**, & **REVERENTIA**  
ad **TIMOREM**, **INDIGNATIO** ad  
**IRAM**, **INVIDIA** ad **ODIVM**.

Mouentur igitur Affectus proposito  
eo bono, vel malo, quod proprium est  
cuiusque inuitamentum; neminem  
verò esse arbitror, qui facile non intel-  
ligat **GAVDIVM** rebus iucundis,  
**TRISTITIAM** mæstis, **MISERICOR-  
DIAM** miserandis excitari; nec iniu-  
ria, & contemptu; sed animi demis-  
sione,

sione, deprecatione, atque Orationis illecebris *MANSVETVDINEM* flecti : *DESIDERIVM* non damno, & incommodo ; sed explicata optabilis boni præstantia, & vtilitate moueri.

Vehementiorum Affectuum commotiones, aut lenioribus temperantur, aut contrarijs infringuntur. *IRA*, & *ODIVM*, *COMMISERATIONE*, & *CLEMENTIA* leniuntur. *TRISTITIA*, *TIMOR*, *DESPERATIO* *SPE* melioris euentus mitigantur. Intemperans *GAVDIVM* timore amitendi boni compescitur.

Aduerte secundo, considerandum prius esse Causæ statum, & finem, quem dicendo spectas, vt ad eum obtinendum aptos animorum motus adhibeas. Exornatio, ac Laudatio *GAVDIVM*, & *ADMIRATIONEM*; Maiorum Reprehensio, ac Vituperatio *INDIGNATIONEM*, ac *ODIVM* requirit; Funebris Oratio *TRISTITIAM*. In Suasionibus *SPEM*, ac *DESIDERIVM*, in Dissuasionibus *TIMOREM*, ac *DESPERATIONEM* excitabis. *IRÆ*, ac *ODII* commotionem exigit Accusatio, *COMMISERATIONIS* Defensio. Sed frustra tentabis animorum motum, nisi argumenta præcesserint, quæ propositæ rei fecerint fidem.

Ad-

Aduerte tertio, res ipsas satis valere ad mouendos affectus, quorum tamen fuerint capaces, dum ea tractentur. *Energia*, vt non solum audiri, sed & oculis cerni videantur. Nam si ex.gr. Sanctorum Innocentium stragem proponas, quid ni facile moueantur Auditorum animi ad odium in Herodem, ad pietatem in cæsos infantes si lacrymabilem eam lanienam oculis subijcias? Truculentos milites non tam ferro, quàm Regiæ cupiditatis furore armatos, in imbellem fœminarum, & lactentium pusionum gregem sæuientes: vix primùm editos in lucem parvus, aut cum matribus confossos, aut abstractos ab vberibus, in frustra discissos; mistas cum morientium sanguine superstitum lacrymas, miseram orbitatem plorantium; sparsa toto Regno funera, & vndique resonantes parentum eiulatus, infelicissimam fœcunditatem damnantium &c.

Magnam itaque vim hîc habent Adiuncta personarum, & rerum: hæc enim explicata efficiunt, vt quasi, quæ dicuntur, præsentia spectet Auditor, efficacius moueatur. His utitur egregiè Cicero tum in alijs Perorarotionibus, quibus excellit, tum maximè pro L. Murena, quem Consulem designatam contendebant Accusatores, vt

Am-

Ambitus reum, non modò empte  
Consulatu exturbandum, sed etiam  
multandum exilio.

Quæ cùm ita sint, Iudices, primùm  
Reip. causa, qua nulla res cuiquam  
potior debet esse, vos pro mea summa,  
& vobis cognita in Remp. diligentia  
moneo &c., & pro Milone.

Quid restat nisi, vt orem, obtesterque  
vos, Iudices, vt eam misericordiam  
tribuatis fortissimo viro &c.

Aduerte quartò, accommodandam  
esse Affectibus Orationem: molliores  
enim commotiones, vt amoris, & Com-  
miserationis lene dicendi genus, mi-  
tioresque Figuras desiderant. Vehemen-  
tiores Affectus, vt Indignationis, &  
Odij acriorem exigunt Orationem,  
quæ casim, ac membratim feratur,  
multa per Congeriem torrentis in mo-  
rem voluat, crebris Interrogationibus,  
Repetitionibus, alijsque validioribus  
Figuris vtatur. Sed parùm omnia pro-  
derunt, nisi ardeat Orator, vt alios  
accendat; & nisi quos in alijs excitare  
motus volet, in se ipso impressos, &  
inustus verbis, sententijs, voce, vultu  
ostendat. (a) Summa circa mouendos  
Affectus (vt Fabius sentit) in hoc posita  
est, vt moueamur ipsi: nam & luctus,  
& iræ, & indignationis aliquando ri-  
di-

dicula fuerit imitatio; si verba, vultumque tantum, non etiam animum, accommodauerimus. (a) Tullius quidem fatetur, se non tam ingenio, quam dolore affectum, ut in excitanda miseratione excellere videretur. (b) Verum non omnis Causa grauiores motus admittit, ut idem monet; nam neque paruis in rebus adhibendæ sunt hæ dicendi faces, neque ita animatis hominibus, ut nihil ad eorum mentes Oratione flectendas proficere possimus; ne aut irrisione, aut odio digni putemur, si aut Tragedias agamus in nugis, aut conuellere adoriamur ea, quæ non possint commoueri. Non omnis præterea Orator quibuscunque Affectibus excitandis idoneus est; cum id præter Eloquentiæ præstantiam, idoneam etiam ad exprimendas, & imprimendas commotiones, naturam, tum flexilem pro earum diuersitate vocem requirat. Adde plurimum valere ad mouendos animos authoritatem dicentis. Hinc apud Virgilium furentes etiam seditione populi, dum *furer arma ministrat*, *Tum pietate grauem, ac meritis si forte virum quem*  
*Conspexere, silent, arrectisq; auribus astant.*  
*Ille regit dictis animos, & pectora mulcet.*  
 1. *Aeneid.*

Inde

a Quintil. lib. 6. c. 2. b Cic. in Oratore

Inde est, quòd illi minùs apti sunt ad grauiores Causas pertractandas, ac multitudinem vehementiori aliquo motu seriò flectendam, quos nondum ætas, ac meritum, vel fama commendat. Plura de mouendis Affectibus apud Aristotelem leges lib. 2. Artis Rhetor., apud Tullium lib. 2. de Oratore, & apud Quintilianum lib. 6. c. 2.

*Post Inuentionem, ac Dispositionem partium Orationis, de Elocutione agendum nunc esset; at cum in prima Parte tradiderim, quæ ad illam spectant, veluti prima Eloquentiæ Preludia, pauca tantum, quæ supererant, hoc loco subiiciam.*

*De Triplici genere dicendi.*

## CAPVT DECIMVMOCTAVVM.

**T**Ria sunt genera dicendi. *TENVE*, *MEDIOCRE*, ac *SVBLIME*: (a)

*TENVE*, quod & subtile, & acutum vocatur, submissum, ac humile est, verbisque vñtatissimis quotidianam loquendi consuetudinem imitatur. Negligit Periodici numeri, & concinnitatis curam; ita quidem, vt non ingratam indicet negligentiam hominis, qui  
de

a Cicero in Oratore.



de re potiùs , quàm de verbis laboret . Sermone utitur puro , & Latino ; sed plano , ac dilucido . Grauiiores Amplificationes , illustriores Figuras , tum verborum , tum sententiarum deuitat ; translationes tantùm familiares , & notiores admittit , non audaces , & à communi vsu remotas ; acutas , crebrasque sententias vibrat , interdum & sales . At quanuis dicendi tenuitas , & subtilitas imitabilis existimanti videatur , non tam facilis est experienti , multum enim artis habet callidissima simplicitatis imitatio ; ideo à summis etiam Oratoribus quæsitā ; quòd probabilem faciat Orationem . Hoc genus ad res potiùs explicandas , quàm exornandas valet , aptumque est ad docendum , ac probandum . Conuenit maximè familiaribus Epistolis , amœnis Narrationibus , ac tenuioribus Causis . Huiusmodi dicendi genere vsus est Cicero in Oratione pro A. Cecinna , quæ totā fermè in explicandis , distinguendis , ac definiendis rebus consistit .

*MEDIOCRE*, ac temperatum vberius est , atque aliquantò robustius tenui , inferius autem sublimi ; nec illius acumine utitur , nec fulmine istius , plusque suauitatis habet , quàm virium . Placidum , ac sedatum vno tenore in dicendo fluit ; ac verborum , ac senten-



tentiarum luminibus distinguitur, & elegantioribus translatis, omnesque adhibet Orationis ornatus. Accommodatum est ad delectandum, ad exhortationes, ad eruditas disputationes, atque ad scribendas Historias. Huic Generi adscribuntur Tullij Orationes pro Lege Manilia, pro Archia Poeta, post reditum ad Quirites, & in Senatu, & pro M. Marcello.

*SVBLIME*, quod vehemens, & amplum dicitur, validiores vires habet, cum pari ornatu, & copia. Huius est exaggerando, & amplificando Orationem attollere, atque efficacibus ad-mouendos affectus Figuris in quanlibet partem Auditores non vertere modò, sed quasi violenter impellere. Hinc Fabius mediocre genus lucido amni comparat, qui virentibus vtrinque sylvis inumbratus leniter fluat; sublime istud, ac vehemens torrenti, qui saxa deuoluit, & pontem indignatur, & ripas sibi facit, secumque rapit vel contra nitentes. (a) Excellit in flectendis animis hoc genus, eoque res magnæ tractantur, & causæ grauiores. Affert in exemplum Tullius Orationem suam pro C. Rabirio, in qua (vt ipse testatur) cum ageretur de Maiestate tuenda, in omni genere Amplificationis exarsit.

Ex

Excellet igitur, qui tribus his dicendi generibus præstabit Orator: quanuis in singulis quosdam, æquè in omnibus perpaucos floruisse Cicero affirmet; immò neminem adeò eloquentem vel fuisse, vel fore sentiat Brutus. Eximiæ verò prudentiæ, atque artis est eam triplicem varietatem moderari; vt enim non omnes eadem vestis, ita non omnia decet eadem ratio dicendi. Parua submissam postulant, mediocria temperatam, magna sublimem. Nec diuersæ solum Orationes, quarum non eadem materia est, at eiusdem Orationis partes aliæ alia forma tractandæ; atque, vt res feret, modò subtiliter, modò temperatè, modò grauitè dicendum; vt videre licet in Actionibus contra Verrem, pro Cluentio, pro L. Cornelio Balbo, & alijs &c.

Sed est Eloquentiæ, sicut reliquarum rerum fundamentum, Sapientia. Vt enim in vita, sic in Oratione, nihil est difficilius, quàm, quid deceat videre. Nam nec semper, nec apud omnes, nec contra omnes, nec pro omnibus nec omnibus, nec vbique eodem modo dicendum. Quare sagaci iudicio est opus, vt perspiciat Orator, quid expediat, quid rebus, personis, loco, ac temporì conueniat, ijsque Orationem accommodet, ac seruet in omnibus Decorum.

**Hæc**

Hæc eadem triplex dicendi ratio variè admodum tractatur. In sublimi enim genere alijs ampla est sententiarum gravitas, maiestasque verborum; alijs aspera, ac tristis Oratio: alijs vberior copia, & vis affectuum. In tenui quidam subtiles, pressi, & limati; in eodem genere alij callidi, sed impoliti, & consultò rudium similes, & imperitorum; alij faceti, & leuiter ornati. Quare multiplex est Orationis forma, & mira styli diuersitas, cuius colligi species vix possunt; cum & naturæ variæ, & voluntates multum inter se distantia effecerint genera dicendi; nec elocutione minùs differamus, quàm vultu.

Aliter quoque dicendi genera diuiduntur in Asiaticum, Atticum, & Rhodium, spectata Orationis copia, paritate, & mediocritate. Asiaticum profluens, diffusum, ac redundans opimum, ac adipale, siue (vt alij legimulunt) adipatum Cicero vocat. Atticum pressum, & castigatum. Rhodium inter vtrunque medium. Alij pressum dicendi genus Laconicum vocant: Atticum elegans, venustum, suaue, hinc Attici sales, Atticus lepos; & Xenophon ob iucunditatem sermonis dictus Attica Musa. Tullius certè Atticum vocat salsum, salubre, incor-

rup-

ruptum; quod omnes Eloquentiæ partes attingat. Varia dicendi genera vide apud Tullium in Oratore, & Quintilianum lib. 12. cap. 10.

*De tribus Orationum Generibus,  
& primò.*

*De Demonstratiuo.*

## CAPVT DECIMVMNONVM.

**G**ENVS DEMONSTRATIVVM, seu Exornatiuum, in laudando, ac vituperando positum Græcè Epidicticum nominatur; quòd quasi ad inspicendum delectationis causa comparatum est. (a) Tempus præteritum respicit, & præsens, non futurum; nec enim adhuc laudari, aut vituperari futura possunt. Cæterùm Genus amplum est, ac varium, quanuis pompæ aptius, quàm pugnae, & ad alendam Eloquentiam, nec solum ad benè dicendum, sed etiam ad honestè viuendum, Tullij testimonio, perutile: cùm virtutum laudem, vitiorumque vituperatione ad eas inuiter, ab his deterreat. Quare illius finis est, cùm laudat, honestas; cùm vituperat, odium turpitudinis.

Materia itaque Generis Demonstratiui

a Cic, in Orat., & in Partit. Orat.,

tiui est quidquid laudari potest , vel vituperari , sed præcipuè Virtus , & Vitium , quæ plurimùm spectat ; immò à meliori sui parte Laudatiuum , & Panegyricum dicitur , quòd frequentius ad celebres præstantium Virorum commendationes adhibetur . Gallus (a) & alij plura præscribunt de ratione laudandi personas , facta , virtutes , scientias , artes , Vrbes , rerumque species diuersas . Ego verò , qui compendia sequor , Antonijs sententiæ subscribo : (b) Non omnia ( inquit ) quæcunque loquimur mihi videntur ad artem , & præcepta esse reuocanda . Ex his enim fontibus , vnde omnia ornatè dicendi præcepta sumuntur , licebit etiam laudationem ornare , neque illa elementa desiderare , quæ vt nemo tradat , quis est qui nesciat , quæ sint in homine laudanda ? nempe bona fortunæ , animi , corporis , virtutes & gesta . Hæc , & quæ sint eius generis facillè videbit qui volet laudare quenpiam , & qui vituperare , contraria .

Scio quidem necessariam esse Oratori Virtutum , Vitiorumque cognitionem , sine qua nec bonum Virum propriè , & copiosè laudari , nec improbum notari satis insigniter atque asperè pos-

D

se

a *Rhet. l. 1. à cap. 14. ad 22.*

b *Apud Cicer. lib. 2. de Oratore.*

se Cicero docet . Sed hæc Rhetorica Artis Epitome perfectum Oratorem non format ; quem non solum Philosophiæ moralis , sed etiam Dialecticæ , Physicæ , tum Iuris Ciuilis , ac Historiæ , Diuinarum , & Humanarum rerum peritum esse vult idem Cicero . Hæc autem omnia quis vnquam putet Eloquentiæ incunabilis includenda ? De Virtutibus , ac Vitijs vide Aristotelem in Moralibus , Tullium in Partitionibus , & lib. 2. de Inuent. , & Galli Rhetorem loco superius citato .

Exornatiua Oratio vi Argumentorum non vtitur , ad delectandum magis , leniterque tractandos animi motus , quàm ad fidem faciendam , resque confirmandas , accommodata . Non enim illius est dubia firmare , sed ea , quæ certa , aut pro certis posita sunt , augere , ac ornare . Liberum est Oratori Exordium vndecunque desumere , vt alibi diximus , argumento tamen conueniens . Vide quæ de Exordio , & de propositione habentur Cap. 10. , & 13.

Confirmatio tota ferè Narrationibus , & Amplificationibus constat . In exornanda vita , factisq; exponendis vel seruanda erit ætatum , ac temporum series ; vel facta illustriora præmittenda , & amplificanda , cæteris pressius collectis ; vel ad certa Virtutum Capi-



ta reuocanda ; præsertim cùm multa suppetunt, quod plurimum conducit ad Orationis ordinem, & modum tenendum, ne singulis immorando prolixior fiat.

Peroratio non graues habebit commotiones ; sed aut admirationem exci-  
fabit, aut accendet ad imitationem  
Virtutis, vel breui meritorum eius, qui  
laudatur, enumeratione gratam illo-  
rum memoriam, ac reuerentiam, Au-  
ditorum animis imprimet ; vel alia,  
quam opportuniorem viderit prudens  
Orator, claudendæ Orationis forma  
utetur.

Vituperatio eadem fermè ratione,  
qua Laudatio, disponetur, ac tractabi-  
tur : sed Peroratio indignationem in-  
eum, qui vituperatur, aut potius Vitij  
detestationem continebit.

Nullum autem Genus est, quo ma-  
gis Oratio splendeat, seque magis osten-  
tent ingenia. Florida itaque, ornata, &  
variata Figuris, numerosa, & affluens,  
sententijs arguta, verbis sonans, eru-  
dita, & prorsus ad aurium voluptatem,  
ac plausum composita est Epidictica  
Elocutio.

Illustriores huius Generis Orationes  
sunt.

**GRATVLATORIÆ**, seu **EPIN-  
CIA**, quibus utimur in quouis læto,  
D. 2. fau-

faustoq; euentu, vt in celebranda victoria, in magistratum instauratione, in Præsulum inauguratione; in Principum aduentu, in tradendis laureis &c. Huc referri possunt *EPITHALAMIA*, seu nuptiales Orationes, quæ felix coniugium sponsis, familiæ, populis gratulantur, & Coniugum, Maiorumq; laudes continent, fausta omina, spemque clarissimæ sobolis. Affines sunt *GENETHLIACÆ*; quæ in die natali habentur siue cùm recens natus est Infans, vel cùm annua recurrit eius diei commemoratio.

*EVCHARISTICÆ*, seu Gratiarum actiones, quibus ad grati animi significationem accepta beneficia celebramus.

*FVNEBRES*, quibus illustrium Virorum mortem deploramus, vitam, virtutesque laudamus. Extinctum Crassum grauissimè deflet, ac laudat Cicero in principio libri 3. de Oratore. Idem in Philippica 14. circa finem egregiè commendat Martiæ Legionis milites, qui pro Rep. pugnantes in Antonium, generosa morte gloriam meruerant immortalem.

De varijs huiusmodi Orationum speciebus plura dabit Galli Rhetor. lib. 2. à capite 29. ad 32. Multa de singulis præscribi possunt; at magis proderunt  
 exem-



exempla. Peruolue Panegyricos veterum Oratorum, præsertim Plinij secundi ad Traianum, & Latini Pacati ad Theodosium. Ibidem habes luculentam Aufonij Gratiarum actionem pro Consulatu ad Gratianum, & Marmertini Genethliacum in die natali Maximiani Augusti.

Nec desunt apud Tullium exempla: Oratio pro M. Marcello, prima post reditum ad Quirites, & altera post reditum in Senatu, sunt Gratiarum actiones.

Oratio pro Lege Manilia, & pro Archia Poeta, magna ex parte in laudando versantur.

Si quæris Vituperationes facile occurrent. Lege Orationem in Pisonem, primam in Catilinam, secundam, & quartam in Antonium, & ex Verrinis pleraque.

*De Genere Deliberativo.*

CAPVT VIGESIMVM.

**G**ENVS DELIBERATIVVM, siue Suasorium, vel Concionatorium, est, quod in consultatione positum Suasionem habet, vel Dissuasionem. Spectat futurum tempus: nam de futuris tantum Deliberatio fit. Suasionis finis

est utilitas aliqua consequenda: Dissuasione damnum aliquod euitandum. Materia huius Generis est quicquid suaderi potest, vel dissuaderi.

Suasione Argumenta sumuntur ab Utili, ab Honesto, à Possibili, & Facili, à Necessario, & Iucundo.

Ab Utili suademus; exponendo commoda, & emolumenta, quæ ab eo, quod suademus, prouenient.

Ab Honesto, demonstrando rem esse cum Virtute, & Gloria coniunctam.

A Possibili (quæ vox, cum dura videatur, ut notat Quintilianus, solamen apud Latinos est) (a) proponendo adiumenta, & opportunitates, quæ ad rem obtinendam valeant.

A Facili; ostendendo sine magno, aut sine ullo labore, sumptu, molestia, quàm breuissimo tempore confici posse, quod dicimus. (b)

A Necessario; probando, non aliter fieri posse. Duplex autem necessitas est: alia simplex, & absoluta, quæ nulla vi mutari potest: ita necessarium est mortale corpus aliquando interire; alia cum adiunctione aliqua, seu conditione: ita necessaria sunt arma, si pugnare velis in hostem. Cum simplex

a Quintil. lib. 3. cap. 8.

b Cic. lib. 2. de Inuent.

plex erit necessitas, non erit, cur multa dicamus, cùm eam nulla ratione lenire possimus: cùm autem ita necesse erit, ut aliquid effugere, aut adipisci velimus, tum adiunctio illa, quid habeat utilitatis, aut honestatis, erit considerandum.

A Iucundo suademus; explicando, quæ sint in re delectabilia.

At non quælibet Suasio ex omnibus his capitibus Argumenta sumet, sed ea tantùm adhibebit, quæ Causa feret. Accommodanda præterea est non ad veritatem solùm, sed etiam ad opiniones eorum, qui audiunt, Oratio. (a) Nam indocti, & agrestes anteferunt semper Utilitatem Honestati. Sapientes, Nobilesque Viri rebus omnibus Dignitatem anteponunt. Quare apud homines bene institutos plurimum de Laude, & Honestate dicemus: rudibus & imperitis Utilitates proponemus, aut eos Necessitate urgebimus, vel malorum, ac ignominie timore: non enim tam honesta expetunt, quàm turpia deuitant; nec ullus est adeò agrestis, quem non, si ipsa minus Honestas, contumelia tamen, & dedecus magnopere moueant. Quare iuuabit à contrario ostendere, quæ ventura sint mala; quæ secutura turpitudine, nisi

D 4

recta

a Idem in Partit. Orat.

recta suadenti acquiescant.

Cautè Alexander pugnaturus in Persas varia Oratione milites alloquebatur pro varijs eorum ingenijs. (a) Macedones, gloriæ nimirum cupidos, tot bellorum in Europa victores, ad subigendam Asiam, atq; vltima Orientis, non ipsius magis, quàm suo ductu profectos, inueteratæ virtutis admonebat. Græcis illatas Græciæ à Persis clades memorabat. Illyrios verò, & Thracas rapto viuere assuetos, aciem hostium auro, purpuraque fulgentem intueri iubebat, prædam, non arma gestantem.

Dissuasio eadem præcepta seruat, quæ Suasio; sed oppositis vtitur argumentis: hoc est ab inutili, & Pernicioso, à Turpi, ab Impossibili, (b) ac Difficili, ab Iniucundo; ab omnibus denique periculis, incommodis, molestijs, quæ auertere animos possint.

Euthymon apud Q. Curtium lib. 5. socijs Græcis, quos Persæ captiuos varijs suppliciorum generibus deformauerant, reditum in Patriam dissuasit à Turpi, ab Iniucundo, à Difficili. A Turpi: quod iniusta corporibus suis calamitatis, & ignominiae stigmata indecorum esset Græciæ ostentare. Ab

Iniu-

a *Q. Curtius lib. 3.*

b *Impossibile ex Quintil. lib. 5. cap. 10.*

Iniucundo, quòd ingrati suis futuri essent, inutiles, deformes, ac propè hominum monstra; nemo enim fideliter diligit, quem fastidit; nam & calamitas querula, & superba felicitas. A Difficili; quòd longissimè abessent à Patria, nec itinerum incommoda ferre iam possent, senes, ac debiles.

Hi qui modo ad opem petendam ex tenebris, & carcere procedere erubui-  
mus, vt nunc simplicitas nostra est, supplicia, quorum nos pudeat magis, an pœniteat, incertum est, ostentare Græciæ, velut latum spectaculum, cupimus. Atqui optimè misérias ferunt qui abscondunt: nec vlla est tam familiaris infelicibus Patria, quàm solitudo, & status prioris obliuio &c.

Denique tam ad suadendum, quàm dissuadendum magna vis est in Exemplis, quorum vsum Tullius commendat, nec vlli magis materiæ conuenire Fabius ait, cum plerunque videantur respondere futura præteritis, habeaturque experimentum veluti quoddam rationis testimonium. (a)

Cicero pro Lege Manilia Maiorum Exemplo suadet bellum esse in Mithridatem acerrimè gerendum, qui grauissimis damnis, ac iniurijs Romanos, & Socios læserat.

D 5

Maio-

*a Quintil. lib. 3. cap. 8.*

Maiores vestri sæpe mercatoribus , ac Nauticularijs incuriosius tractatis bella gesserunt : vos tot Ciuium Romanorum millibus vno nuntio , atque vno tempore necatis , quo tandem animo esse debetis ? Legati , quod erant appellati superbijs , Corinthum Patres vestri , totius Græcæ lumen , extinctam esse voluerunt : Voseum Regem inultum esse patiemi , qui Legatum Populi Romani Consularem vinculis , ac verberibus , atque omni supplicio excruciatum necauit ? &c.

Oratio in Genere Deliberatiuo breuiora postulat Exordia , nec exigit plerunque Narrationem , vt superius diximus . Propositio dilucida sit , cum distincta Partitione . Contentio rationes afferet ad rem suadendam , vel dissuadendam ex opportunis Locis , quos ante numerauimus , desumptas ; & si quæ obstant , oppositis argumentis , & exemplis refellet . Peroratio paucis colliget ex antedictis , quid sit deliberandum , quidque sentiat Orator . In Suasione spem , ac desiderium excitabit , vel Emulationem , aut Commiserationem , vt exigit rerum conditio ; in Dissuasione Timoris , aut Pudoris motus adhibebit .

Tota autem Oratio simplex , & grauis , & sententijs debet ornatior esse ,  
quàm



quàm verbis . In Sapientium hominum confessu minori apparatu agendum , atque ex Tullij monito , ingenij , ostentationisque suspicio vitanda. (a)Concio ad populum capit omnem vim Orationis , & varietatem , grauitatemque desiderat . Non omnium tamen est de maximis rebus explicare consilium suum , sed præstantis , doctique , ac disertis Viri , vt mente prouidere , auctoritate probare , Oratione persuadere possit .

Ad hoc Genus pertinet Oratio *CONSOLATORIA* , quæ ad leniendum in acerbo aliquo casu dolorem , animosque in aduersa firmandos adhibetur .

*HORTATORIA* , quæ validior Suasio est cum maiori Affectuum motu .

*DEHORTATORIA* , quæ conuenit cum *DISSVASORIA* .

*CONCILIATORIA* , quæ in sedandis animis , componendisque dissidijs versatur .

Huc refer *COMMENDATIONES* , *MONITIONES* , *POSTVLTATIONES* , seu *PETITIONES* , quarum frequens in Epistolis vsus est , vt suo loco diximus ; *SVASIONES* denique omnes , ac *DISSVASIONES* .

Suasoria est Oratio Tullij pro Lege

D 6

Ma-

a Cic. lib. 20, de Oratore .

Manilia . 2. de Lege Agraria Dissuasoria est . 4. in Catilinam Hortatoria ad P. C. vt Coniuratos plectant .

*De Genere Iudiciali .*

CAPVT VIGESIMVM PRIMVM .

**G**ENVS IUDICIALE est illud , quod in controuersia positum Accusationem habet , vel Defensionem . Respicit præteritum tempus ; non enim adducuntur in Iudicium nisi iam facta : illius finis ( ex Tullio ) est æquitas . Accusator pœnam accusati spectat : Defensor absolutionem illius , quem defendit . Materia huius Generis est quidquid in forensẽ controuersiam reuocari potest .

Triumphauit olim Iudiciale Genus , & Artis Oratoriæ summam sibi gloriam vendicauit . Sed iam pridem exulauit à foro , & à veris Causis , in quibus de fortunis , & de capite decernebatur , ad fictas transijt Declamationum contentiones : quare nihil propè sui nobis reliquit , præter impressa veterum Oratorum scriptis Eloquentiæ vestigia , & magni nominis vmbra .

Argumenta huius Generis desumuntur præcipuè ab omnibus illis Adiunctis Quis , Quid , Vbi &c. , & à Locis

Ex-



Extrinfecis. Ad forenfes præterea  
Caufas tractandas Iuris Ciuilis fcientia  
requiritur, quam ideo neceffariam  
Oratori Tullius affirmat.

Pro Difpofitione Iudicialis Oratio-  
nis confule præcedentia Capita de fin-  
gulis Orationis partibus, in quibus quæ  
maximè huc fpectant inuenies. Elo-  
cutio in hoc genere varia eft pro Cau-  
farum dignitate, ac varietate rerum.

Ad Genus Iudiciale pertinet *ACCV-  
SATIO*, *DEFENSIO*, & *INVECTI-  
VA*; quæ eft mordax Oratio in Per-  
fonas, at potius in vitia; & fit tantum  
ad vituperandum uſurpetur, fpectat  
ad Genus Demonstratiuum, fi ad ac-  
cuſandum, nihil aliud eft, quàm acrior  
*Accuſatio*. His adde *OBVI RGATIO-  
NEM*, ſive *REPREHENſIONEM*  
ob aliquod crimen: *EXPOſTVLA-  
TIONEM*, ſeu Conqueſtionem de ac-  
cepta iniuria: *EXPROBRATIONEM*  
ingrati animi: *COMMINATIONEM*  
ad inferendum malorum timorem, ob  
patrata ſcelera, & *DEPRECATIO-  
NEM*, ad impetrandam reis veniam;  
quarum exempla in concionibus T. Li-  
uij, & Q. Curtij plura inuenies.

Habes in T. Liuiio lib. 2. ab Vrbe  
condita *EXPROBRATIONEM* Ve-  
turiz ad filium Coriolanum, Roma-  
nis bellum inferentem. Aliam lib. 9.

EX-

**EXPROBRATIONEM** Claudij Pontij Samnitium Imperatoris contra Romanos. Eodem libro **ACCUSATIONEM** P. Sempronij Trib. Pleb. contra Appium Claudium. Libro 22. **INVECTIVAM** Ruffi Minutij in Q. Fabium lib. 26. **DEFENSIONEM** M. Marcelli ad P. C. in Syracusanos Oratores. Lib. 28. **OBIVRGATIONEM** P. Scipionis ad milites, qui falsò nuntiata illius morte seditionem mouerant.

In Q. Curtio lib. 6. **DEFENSIONEM** Philotæ lib. 8. **INVECTIVAM** Hermolai in Alexandrum lib. 10. **OBIVRGATIONEM** Alexandri in Macedones tumultuantes &c.

Iudiciales Tullij Orationes non estur secernam, cùm plerunque in accusando, vel defendendo versentur. Aduerte autem hæc tria Genera sæpe misceri: quare spectandus est Orationis finis. Si enim ex. gr. laudat, vt suadeat, spectabit ad Genus Deliberatiuum; si vituperat, vt accuset, ad Iudiciale.



*Methodus cuiusque Orationis  
texendæ.*

CAPVT VLTIMVM.

**P**rimò in feligenda Propositione vires tuas consules, & videbis *quid ferre recusent, quid valeant humeri*; nec tam noua quæres, quàm Personis, rebus, loco, ac tempori consentanea. Si propositio pluribus partibus constet, distinctam Partitionem adijcies.

Secundò considerabis, in quo Genere sit Oratio. In Demonstratiuo non valde tibi laborandum erit de inueniendis Argumentis, at potiùs de redigendis in certum ordinem factis, vt monui cap. 19. In alijs Generibus excogitandæ erunt rationes, seu Argumenta, quibus singulæ Propositionis partes probentur, percurrendo Locos, primò intrinsecos, hinc etiam extrinsecos. His inuentis quandam velut Orationis Ichnographiam hac fermè ratione describes.

**PROPOSITIO.**

Danda est opera studijs literarum.

**PARTITIO.**

Quia sunt Honestæ, Vtiles, Delectabiles.

**CONFIRMATIO.**

*Honestæ.* Semper enim sunt cum  
glo-

Gloria coniunctæ , hominemque reddunt illustrem .

*Utiles* : nam componendis æquè moribus, ac expoliendis ingenijs profunt ; viam ad summos honores aperiunt, valent in Consilijs, in Tribunalibus, in Reip. administratione , in Religionis integritate tuenda &c. Id confirmari à contrario poterit, ostendendo, vbi literarum lumen defecerit, omnia cæca nocte inuolui, nullum iam esse animorum cultum, non curam æquitatis, non studium virtutum, diuinarumque pariter, & humanarum legum iura turpi obliuione deleri &c.

*Delectabiles* : optimam quippe recreant hominis partem dulcissima vitæ præsidia : in solitarijs etiam recessibus nobiscum versantur ; fidæ comites , nullisque mobiles casibus , vt ornant in prosperis , ita solantur in aduersis .

Tertiò paranda erit rerum Sylua ad Argumentationes ornandas , ac roborandas : quanuis Gallus (a) sentiat aliquando colligendam priùs Syluam esse ; tum ex ea Propositionem seligendam. Ad eorum itaque opera confugies, qui vel de rebus ijsdem, vel de varia eruditione tum sacra, tum profana scripsere. Hinc excerpes, quæ ad rem tuam videris aptiora; Sententias, Adagia,

gia, Apophtegmata ; Symbola, Similitudines, Historias, Fabulas. Hæc in exornandis, & amplificandis Argumentationibus, vt quæque magis opportuna erunt, suo loco distribues.

Quartò in tractandis Argumentationibus obseruabis, quæ diximus cap. 14. Prudentis vero iudicij erit videre, quæ magis Figuræ sententiarum, quæ schemata verborum cuique Argumentationi vestiendæ, vique maiori explicandæ conueniant, & quinam mouendi sint affectus.

Quintò tandem singulas Orationis partes aggredieris ; omnibusque iam perspectis, tum statues, vnde sumas Exordium; quam tibi ad Narrationem, si adhibenda sit, siue ad Confirmationem, viam sternas ; quibus Orationis nexibus ab vna Argumentatione gradum facias ad aliam ; qua Peroratione utaris.

Sed antequam stylo manum admoveas, proderit egregij alicuius Authoris Orationem prælegere, non solum ad imitandum artificium, sed etiam ad elocutionis dignitatem excitandam. Neque ex iis esse te velim, qui calamum potius exercent, quàm ingenium ; immò & ingenium iudicio reges, huiusq; consilio decernes, quid, qua ratione dicendum. Tum scripta reuocabis ad

examen : superbi enim , aut inconsulti , est animi , optima credere quæcunque statim effundat : cum nostra nos fallant , in primo impetu scribendi multa excidant incautis , plura fugiant , plurima , dum nascuntur , placeant , quæ postmodum accuratius inspecta , nisi præposterus nostri amor blandiatur , seuerè damnamus . Scribes igitur quàm diligentissimè , & scripta reddes incudi ; præsertim si ea scribas , quæ non solum audienda sint , sed etiam edantur legenda . Nam quanuis Fabius eandem esse dicat bene dicendi , & bene scribendi rationem , (a) nemo negauerit ea , quæ dicuntur , plurimùm Oratoris actione commendari , cuius gratia destituitur scripta , & muta Oratio : aurium præterea , quæ in transitu iudicant , non tam acutam esse censuram , exactius oculorum cum mora iudicium . Adde pronuntiatam Orationem à multis quidem audiri posse ; paginis commissam ab omnibus legi : tum latè sparsam , ac ituram in posteros , ubique patere , ac perpetuò superesse legentium sententijs obnoxiam .

At siue tibi , siue multis , siue omnibus scribas , nihil sine diligentia sine emendatione perficies . Expedita , fluensque sine vlla litura scriptio boni scribæ  
laus

a *Quintil. lib. 12. c. 10.*

laus est, non ita boni scriptoris, qui sæpe stylum vertit, atque adhibet limam. Et quanvis noxia sit operi superstitiosa cunctatio, perniciosior est festina temeritas.

*Summa hac est rei. Citò scribendo non fit, ut bene scribatur; bene scribendo fit, ut citò. (a)*

*De postremis duabus Rhetorica partibus ne me consulas. Memoriam gratulari tibi possum, vel optare, non dare. Pronuntiationem (nisi repugnent naturæ vitia, quæ arte corrigi non possint) observatione, atque exercitatione perficies. Quæ ad utranque attinent quare ab Authore ad Herennium lib. 3. Artificia memoria vide apud Quintilianum lib. 11. cap. 2. apud eundem multa de Pronuntiatione inuenies, eodem lib. cap. 3. plura apud Ludouicum Granatensem lib. 6. Ecclesiastica Rhetorica, de qua scripsit absolutissimum opus, dignissimum lectu, & sacris maxime Oratoribus accommodatum.*



DB

a Idem lib. 10. cap. 3.

*Quid sit Elogium, & quæ illius  
materia.*

## CAPVT PRIMVM.



**E**LOGII nomen, quod à Græcia manauit in Latium, idem significat, ac honestus sermo, prædicatio, recordatio, testificatio. Varias huius vocis significationes, vsusque diuersos vide in Thesauro Linguae Latinæ, & in Epigraphica Boldonij lib. 1.

Nihil aliud est **ELOGIUM**, (a) quàm solutum Epigramma, sicut Epigramma strictum numeris Elogium; quod probat ipsa nominis Notatio: nam Epigramma, Græca vos, Latinè Inscriptio est; hinc rem vtranque veteres utroque nomine vicissim appellarunt.

Definiri potest **ELOGIUM** breuis, & arguta Oratio ad rerum notitiam tradendam, memoriamue seruandam, vel ad exornationem scripta. Dicitur breuis, & arguta Oratio; nam pressum, acutumque amat characterem, & à

pro-  
à Gallus de epigr. cap. 1. Scaliger. de  
Arte Poetica lib. 1. cap. 56.



prolixitate abhorret : quare distinguitur ab Historicis Narrationibus, fusisq; Orationibus, ac Poematis. *Ad rerum notitiam tradendam, seruandamue memoriam*. Is enim præcipuus est finis propter quem inuentum fuit Elogium, *vel ad exornationem scripta*. Nam interdum non solùm ad res edocendas, sed exornandas, ad laudandum, vel vituperandum adhibetur. Atque ita Definitio complectitur omnia Elogiorum genera, quæ postmodum videbimus.

Materia, circa quam versatur Elogium, est res omnis; nihil enim est, de quo scribi non possit. Lata, tristia, parua, magna, iocosa, & seria Inscriptionibus argumentum præbent; nec solùm rectè factorum commendationes, at etiam exprobrationes flagitiorum.

Materia, in qua scribitur Elogium, varia est. Nihil verò Elogiastæ interest, an sculpatur in marmore, an cudatur in ære, an pingatur in tabulis, an paginis imprimatur. Artificum labor hic esto. Quare nihil ultra monendum hic superest; nisi fortè (quod quisque tamen, vel nemine admonente facile obseruabit) habendam esse rationem spatij, in quo contineri debet Elogium, ne mensuram excedat, sitque vel min-

rioribus, vel compendiaris elementis  
scribendum, vel mutilandum.

*Quotuplex sit Elogium.*

## CAPVT SECVNDVM.

**T**Riplex Elogiorum est genus; *POETICVM, HISTORICVM, & ORATORIVM.*

*ELOGIVM POETICVM*, vt ante innui, nihil ab Epigrammate differt, cuius præcepta tradere huius loci non est. Hæc habes in Semita Parnassi Capite 21., & sequ. Huiusmodi Elogio conueniunt omnes Elocutionis Poeticæ festiuitates, & colores. Metaphorarum tamen licentia non insaniat, nec ita turgescat, vt obscuritate laboret; summam enim laudem habet à præspicua breuitate, & acumine.

*ELOGIVM HISTORICVM*, (quod alij simplicem Inscriptionem vocant) est, quod sinceram continet rerum expositionem; fidemque spectat magis, quam pompam. Non fucatam itaq; Orationem sequitur, sed emendatam verborum proprietatem; purum est, ac nitidum, nec omnino tamen inelegans. Et claritatem quidem exigit, vt futurum posteris monumentum, verum cum dignitate coniunctam, graues etiam acu-  
tasque

tasque sententias, præsertim in fine; admittit. Huius generis sunt Epigraphæ, seu Inscriptiones, quæ publicis, aut priuatis Ædibus præfiguntur; quæ Columnis, Arcubus, Trophæis, Sepulcris inciduntur.

*ELOGIUM MORATORIUM*, siue, vt alijs placet, Encomiasticum, seu Exornatiuum, est quod non tantum in exponendis, sed exornandis, illustrandisque rebus versatur, Elegantiores Orationis cultum amat; figuratas, translatas, argutasque locutiones; variam Eruditionem, allusiones ad Historias, & Fabulas, sententias, ac Epiphonemata; atque hoc maximè ingeniorum aciem exercet. Huius notæ sunt, quæ in Diuorum, aut Heroum laudem scribuntur; quæ in Principum aduentu, solennibusque spectaculis exponuntur. Plura cuiusq; generis Exempla inferiùs colligentur.

*De stylo Elogiastico.*

### CAPVT TERTIVM.

**N**ON immorabor huc reuocandis Elocutionis virtutibus, quæ non tam Elogio, quàm cuiq; Orationi conueniunt; vt sit emendata, perspicua, & elegans. Absint quidem ab Elogio  
verba



verba impropria, barbara, & obsoleta; & quanuis quandoque licuerit ad specimen eruditionis antiquæ, vel ad excitandam admirationem, priscis verbis integrum Elogium texere, non passim tamen offundenda Inscriptionibus huiusmodi antiquitatis caligo, quam non magis intelligant recentiores, quàm si Euandri Matrem loquentem audirent. Eadem ratione ab ænigmaticis abstinendum; nisi quandoque ioci gratia ingeniosam aliquam Sphingem proponere libuerit, quæ legentium animos torqueat, ac sollicitet ad vestiganda, nec rarò in nugis etiam, mysteria.

Stylum concisum Elogium desiderat: fusas ideò, tornatasque periodos respuit, gaudet Laconismis, iisque dicendi formis, ac Figuris, quæ conferunt breuitati; cuiusmodi sunt Figure constructionis, quæ sunt per detractiorem. Frequens est Zeugma, cum vnicum Verbum, vel nomen ponitur pluribus clausulis commune; & Eclipsis, cum Verbum desideratur, siue aliqua alia dictio prætermittitur, quæ tamen facilè subintelligi possit. E Figuris verborum utilis est Disiunctio, seu Dissolutio, quæ coniunctiones tollit. Iuuat uti Participijs, Gerundijs, & Ablatiuis absolutis, Orationem contrahentibus.

At

At nihil æquè plenissima breuitate præstat, ac Emphasis, & exuberans sensu Metaphora.

Parentheses, quantum fieri possit, excludat Elogium; tum nexus inutiles Orationis, repetitiones, Epitheta inania, Synonima, & quidquid in Elocutione redundat, ac integro sensu, nec læso Elogij decore potest omitti.

Concisa tamen Elogij breuitas concinnitate non careat, à qua mirum est, quantum illi venustatis accedat, vt sæpe vel hac vna laude commendetur. Hanc afferunt Figuræ harmonicæ, à quibus numerosam fieri Orationem alibi vidimus, vt Similiter cadens, Similiter desinens, & Compar. Exemplo sit Romana Inscriptio in statuam æneam Sixti V.

Sixto V. Pont. Max.

Ob quietem publicam

Compressa licariorum, exulumq;  
licentia

Restitutam,

Annonæ inopiam subleuatam,  
Vrbem ædificijs, Vijs, Aquæductibus  
illustratam,

S. P. Q. R.

Suppressum hic vides per Eclipsim.  
Verbum posuit, vel erexit, seu posuerunt, enexerunt; quod quauis non explicet inscriptio, Statua docet; vnoq;

E

hoc

hoc Verbo omnia membra reguntur. Vides omissas non necessarias conjunctiones; Ablatiuo absoluto, ac Participijs adhibitis plura paucioribus dicta; membra similiter cadentia, & desinentia. Certè Historica, & simplex Inscriptio hæc est, non Figurarum luxu, non argutijs florens; at graui, dilucida, pressaque Elocutione, & concinnitate laudem meretur.

Repetitiones, quas ab Elogijs excludendas monui, eas esse intellige, quæ rem eandem, vel vocem frustra iterant. Cæterùm eas non improbo, quæ vel ad explicandam sententiam pertinent, vel habent vim aliquam Figuratæ locutionis, vt in sequenti exemplo.

*Mutata sæpe Respublica*

Nunquam vidit *mutatum* Catonem.

*Alijs* ad Cæsarem, *alijs* ad Pompeium

*Inclinantibus*

*Solus pro Patria stetit.*

Denique ostendit virum fortem

Posse *inuita* fortuna viuere,

*Inuita* mori. (a)

Ad variandam Elogij Elocutionem, & affectus, quos res ferent, mouendos, ad Patheticas Figuras confugies, quales sunt Interrogatio, Apostrophe, Prosopopœia, Exclamatio, Deprecatio, Imprecatio, quarum vsum in

Exem-

a *Sen. Moral. Epist. 104.*

Exemplis obseruabis. De Argutiarum luminibus, quibus illustratur Elogium, postremò agemus. Ad formandum Elogiasticum stylum frequentanda eorum Scriptorum lectio, qui secuti fuere concisum dicendi genus, & sententijs distinctum. Lege Salsitium, Lucium Florum, Senecam Moralem. Plinium Iuniorem, Q. Curtium, Latinum Patatum.

*De ratione scribendi Elogij.*

## CAPVT QVARTVM.

**P**RO Elogio Poetico scribendo certæ definiuntur leges à carmine. Historicum verò, ac Oratorium, quanuis numeris, non vinciantur, non ea tamen plerunque ratione scribuntur, qua solet Oratio soluta; sed modò breuioribus, modò longioribus versiculis, neque certa est eorum norma. Cauendum quidem, ne aut Elegiæ speciem habeant, aut Heroicæ, seu Lyricæ Poësis; nec sequeris exemplum, si antiquas Inscriptiones, deteriore sæculo natas, Rythmum imitantes inueneris, aut carmen prosæ Orationi miscentes; à quo prorsus abstinendum; nisi fortè aliquando contigerit breue aliquod hemistichium, vt argutè dictum afferre,

aut grauem celebris Poetæ sententiam.

Libuit aliquando Elogiaſtis vario ſchemate ludere, Inſcriptione ita diſpoſita, vt vel Pyramidem ſubiecta baſi, vel Columnam exprimeret. Quandoque ipſa tabula, in qua exaratur Elogium, ſiue hexagona, vel octogona, vel ouata, ſeu ambientibus parergis alibi laxior, alibi anguſtior variam, definit verſiculorum menſuram. Sæpè ſcribendi modum ſuggerit inciſorum, membrorumque concinnitas, vt docent præmiſſæ Inſcriptiones. At Elogij diſtribuendi modus denique arbitrio pendet, ac prudenti Authoris iudicio.

*De ſepulcrali Elogio.*

CAPVT QVINTVM.

**S**I Elogiorum materia ſpectetur, plurimæ ſunt eorum ſpecies, quæ triplici eo genere continentur, Poetici, Hiſtorici, ac Oratori. Sed omnium intra ſuum genus eadem ratio eſt. Aliqua tantùm colligam in ſepulcrali peculiaritèr obſeruanda, cuius frequentior vſus eſt, vt nihil morte frequentius. Hoc monumento ſolamur noſtrorum iacturam, eorumque nomen,



ac memoriam in seram posteritatem extendimus , quorum vitam producere non licuit ultra fines mortalitati præscriptos .

Diuiditur Elogium Sepulcrale in *CENOTAPHIVM*, & *EPITAPHIVM*. Vtrunque tam carmine , quàm soluta Oratione scribi potest . *CENOTAPHIVM* idem sonat, ac vacuum sepulcrum ; non enim inscribitur sepulcrali lapidi , quo tegitur cadaver , sed vel in funebri mole , vel in tumulis honorarijs : nam ad illustrium virorum honorem huiusmodi monumenta excitari consuevere : hinc de Alexandro Severo Lampridius . *Cenotaphium in Gallia , Romæ sepulcrum amplissimum meruit* . Hoc aliquantò liberius Epitaphio est , maiores Elocutionis ornatus , & argutias admittit ; latiùsque fertur in Mortui commendationem ; cùm sit potiùs vitæ commemoratio , quàm sepulturæ .

*EPITAPHIVM* idem significat , ac in sepulcro ; est enim inscriptum verum tumulo Elogium ad memoriam Sepul ti seruandam . Illius itaque dignitati conuenire debet : eiusdem nomen , & cognomen semel exprimit , ommissis titulis honoris , vt sunt illæ voces *Illustrissimus Dominus , Reuerendissimus &c.* insigniora munera , gesta , præci-

puas virtutes, ac laudes, nec eas quidem affectatas, aut quæ hyperbolem sapiant, paucis complectitur: ætatem pariter, ac annum, mensem, diem, quo decessit, explicare solet, nomenq; illius, qui monumentum posuit.

Serium, pressumq; stylum poscit, alienum à fabulis, & iocis; quanuis argutè, dum & grauitè dicta non respuat. Iocari quandoque in Epitaphio licet, cùm festiuioris est argumenti; vt si morionis alicuius, aut brutæ animantis tumulto inscribatur: nec desunt huiusmodi ingeniorum lusus. Cæterùm minimè censeo ludendum cum vmbis.

At quàm dispar est eorum conditio, qui sepulcris clauduntur, tam diuersa ratio sepulcralis Elogij. Aliquando magis dignitatem spectat, quàm dolorem, cùm in memorandis eximij Viri meritis versatur, ad excitandam illius admirationem, ac desiderium. Aliàs ad mouendos miserationis affectus, vel ad amorem, mæroremue testandum variis vtitur Figuris. Nunc per Prosopœiam Defunctum inducit, vel Deum, vel Superos, aut suos superstites, aut spectatores alloquentem. Modò vtitur Apostrophe ad eundem, modò sermonem ad mortem flectit, nunc ad Lectorem; Exclamationes quandoque, ac Deprecationes immiscet. At in expri-

men-

mendis affectibus amoris, & doloris ab intemperantia cauendum, ne in molliores ineptias labatur Elogium.

Omnino breuitas in sepulcralibus Epigraphis requiritur; quam seuerè secutos fuisse antiquos eorum docent monumenta: immò Tullio teste 2. de Legibus Epitaphium quatuor Heroicis versibus Plato definiuit: duplici sanè compendio; minore scilicet impensa sepulcri, & maiore commodo legentium, quos minimum Inscriptio retardaret, nec prolixitas auerteret à legendo. Sed non semper aut ambitio, aut meritum has patitur angustias; nec omnes eadem norma metiendi. Quauis pauciora sæpe verba prolixum æquant Elogium; & magni quandoque Viri celebre nomen omnem vincit commendationem. Hoc vno insigne fuit sepulcrum Annibalis apud Lybissam, cuius meminit Plinius de Viris Illustribus.

*ANNIBAL HIC SITVS EST.*

Quid breuius Perusino Epitaphio?

*OSSA BARTOLI.*

parcos tamen laconismos latius explicat fama, & marmore cætera præter nomen tacente, illum bellicæ Virtutis, hunc Iurisprudentiæ gloria prædicat immortalem.

His adde Inscriptiones Energia præ-

stantes, quæ diffusæ laudationis argumentū paucis inuoluunt, vt celebris illa, quæ Mediolani legitur ad D. Nazarij.

Io. Iacobus Magnus Triuultius,

Antonij Filius,

Qui nunquam quieuit, quiescit.

Tace.

Talem cecinit ad Pompeij tumulum

Adrianus Cæsar.

*Ossa viri Magni tenui quàm clausa  
sepulcro!*

Breuiiores pariter Epigraphas habent sepulcra, quæ sibi viuentes, ac posteris ponunt. Nemo enim laudum suarum buccinator esse debet, præsertim nondum absoluta vitæ fabula, cui bene peractæ plaudere superstitum erit. Quare satis est huiusmodi Elogijs docere legentem, quinam tumulum, & quibus condiderint. Quandoque additur aliqua sententia, vel ad mores pertinens, vel ad pietatem: ex. gr.

*Nascimur impares, pares morimur.*

*Mors aequat omnes.*

vel.

*Fui, non sum, estis, non eritis.*

*Nemo immortalis.*

*Aut e facris paginis.*

*Expecto, donec veniat immutatio mea.*

vel.

*Dum adhuc ordiner, succidis me &c.*

Mos

Mos antiquis fuit voces *illae Aue* plerunque in Epitaphij principio, & in fine *Vale* adhibere; Mortuum alloquendo; siue has literas S. T. T. L. hoc est *sit tibi terra lenis*; quasi verò ingens hoc esset vita carentibus leuamen, si minori pondere grauarentur. Nos verò sanctius, atque vtilius Diuinam exoramus Mortuorum animis clementiam, & quietis æternæ sedem precamur. Illi, notas eas Epitaphijs præfigebant. D. M. S. hoc est *dijis manibus sacrum*. Nos D. O. M. idest *Deo Optimo Maximo*. Quid significant alia dictionum compendia, literæque singulares, quæ in Antiquorum Inscriptionibus passim occurrunt, vide in Epigraphica Octauij Boldonij Theanensis Episcopi lib. 3. membro 14., & 15. Is olim in Congregatione, nostra floruit politioribus literis, omni que doctrina insignis, vt quæ supersunt opera testantur: at præ cæteris egregium volumen edidit, in quo totam Artem Elogiasticam, & Antiquitatis monumenta eruditissimis commentationibus illustrauit.

## FORMVLÆ SEPVLCHRALES.

## CAPVT SEXTVM.

**A** Nimæ Caia Oppiæ Felicis  
Matris dulcissimæ  
Aulus Niconius, & Sext. Niconius Filij  
Eo ordine, quo Natura permiserit,  
secuturi.

Matrî amantissimæ  
Filij deuincti maternis meritis  
Dedicauerunt

Patri B.M.(a)  
Hoc perenne doloris monumentum  
Mœstissimi filij  
P.P. (b)

Parenti charissimo  
Mæsta liberorum pietas  
Ad Mortui memoriam,  
luctusque sui solatium  
Posuit.

Filio vnico, & delicio suo,  
Pater contra votum.  
Ante me mors allequetur,  
Quàm tristes lacrymæ deserant.

Dul-  
a Benè merenti. b Posuerunt.

Dulcissimo filio.

Mater ad lacrymas relicta.

Hic situs est Ligurnus puer,  
Dolor parentum.

Heu mors inuida!

N. Parentum spes vnica

Vixit, si vixit, dies XV.

De vtero propè translatus ad tumulum.

Auete manes infantiles. Valete.

Portia,

Viua gaudium, mortua mariti gemitus

Hic sita est.

Lucretia,

Perpetuus Mariti dolor,

Hic iacet.

Flauia Plautilla septennis

Nil vnquam peccauit,

Nisi, quòd mortua est.

N. literarum gloria clarus

Mortem, quam obiit, elusit,

Pluribus ingenij sui monumentis

Æternùm superstes.

N. merito grauior, quàm senio,

Vitæ laudem inuidenda morte

cumulauit.

Vixit annos LXX.

Naturæ satis, Patriæ parum,

Gloriæ semper.



## ELOGIORVM EXEMPLA.

## CAPVT VLTIMVM.

**P**Oetica Elogia legenti non defunt,  
 si Martialem peruoluas, aliosque  
 Epigrammatum Scriptores. Vnum in-  
 terim præmitto, cui subdo solutam  
 Inscriptionem, hinc exornatum Elo-  
 gium, triplicis generis Exempla vnico  
 præbens argumento.

## POETICVM ELOGIUM.

*In fontem calidis aquis manantem,  
 qui ex Academia, Ciceronis villa, post  
 eius obitum, Antistio Vetere possidente,  
 salubris oculis erupit, Laureæ Tullij  
 eiusdem Ciceronis Liberti, Carmen.*

*Ex Plinio hist. natat. cap. 2.*

Quo tua Romanæ vindex clarissime  
 linguæ

Sylua loco, melius surgere iussa,  
 viret;

Atquæ Academiæ celebratam nomi-  
 ne villam

Nunc reparat cultu sub potiore  
 Vetus:

Hic etiam apparent lymphæ non  
 ante repertæ,

Lan-



Languida quæ infuso lumina rore  
leuant.

Nimirum locus ipse sui Ciceronis  
honori

Hoc dedit; hac fontes cùm patefe-  
cit ope.

Vt quoniam totum legitur sine fine  
per orbem,

Sint plures, oculis quæ medeantur,  
aquæ.

*Eiusdem Fontis.*

*I N S C R I P T I O.*

Celebrata studiosis Tullij recessibus  
Academia.

Domini quondam sui  
Adhuc seruit ingenio.

Salubres oculis aquas effundens

Ea lecturis proficit,

Quæ dedit legenda.

Nec minùs interest videre, quæ scripsit

Summus Orator,

Quàm præstitit audire, quæ dixit.

Iam promeritus aurium suffragia,

Nunc exigit oculorum officium.

Laurea Tullius Libertus,

Obstrictus Patroni meritis,

Memoriam veneratus

P.

*In eundem Fontem.*

## E L O G I U M.

Præsidem Fontis Nympham  
 Hic ne quære Spectator.  
 Pro loci Genio Suada est,  
 Quæ indolem suam  
 In Ciceronis Academiam transfudit  
 Hæc ut nunquam bonis non affluat,  
 Post effusū salutaris Eloquentiæ flumen,  
 Medicum fontem largitur:  
 Pari utrobique beneficio,  
 Ut ex eadem vena manasse credas.  
 Periclitantibus illud capitibus  
 Salutem attulerat;  
 Is laborantibus oculis affert.  
 Eiusdem utique pietatis est  
 Lumina tueri, ac lucem.  
 Tullium scrutaturus  
 Aciem prius hic repara.  
 Argus ille nemini patet luscioso:  
 Calentes aquas miraris?  
 Ciceronianæ facundię torrentē imitatur,  
 Quæ fluxit semper, friguit nunquam.  
 Eam si haurientibus indere posset  
 felix amnis,  
 Ditior esset Gange, præstantior  
 Aganippe.  
 Sitientibus tamen hunc haustum  
 Egregiè consuluit  
 Rei Literariæ, ne dum Romanæ,  
 Sa-

Sapientissimus Consul.

Vberrimos in libris fontes aperuit,  
Vnde Posterì Eloquentiam deriuarent.

Huius copiam si quæris,

Noſti quam ſcatebram adeas.

Surdus es, ſi Tullij famam non audis,  
Cæcus, niſi vides in ſcriptis ingenium.

## INSCRIPTIONES ANTIQVÆ.

*Pauca ex Veteribus affero Inſcriptionum exempla: harum enim ſylvas habes apud Gruterum, Suuertium, Schraderum, Boldonium, alioſque ſtudioſos Antiquitatis indagatores. Ab illis priſcæ ætatis reliquijs puritatem, & grauitatem Inſcriptionum diſces, à quibus normam ſumpſere optimi Recentiorum. Ab his venuſtatem diſces, floridumque, & argutum dicendi genus pro Elogijs præſertim Exornatiuis, quorum is non fuit apud Antiquos, qui apud nos, uſus.*

*Inſcriptio Marmoris Iuliano poſiti.*

Claudio Iuliano

Victori,

Ac Triumphatori

Semper Aug.

Domino Orbis

Terrarum,

B. (a) R. P. nato.

Alte-

a Bono Reipublicæ.

*Alterius Marmoris pro Tito  
Vespasiano.*

Imperator Titus Cæsar Vespasianus,  
Augustus, Pont.(a) M., Trib.P.V.,  
Cos. (b) VIII. P. P., Generis humani  
amor est,  
Desiderium etiam viuens.

~ ~ ~  
*Ædis Concordiæ instaurata.*

S. P. Q. R.

Ædem Concordiæ vetustate collapsam  
In meliorem faciem  
Opere, & cultu splendidiore  
Restituerunt.

~ ~ ~  
*Pontis supra Danubium à Traiano  
excitati.*

Prouidentia

Aug.

Verè Pontificis  
Virtus Romana  
Quid non domet?  
Sub iugum ecce  
Rapitur & Danubius.

~ ~ ~  
*Recentiorum Inscriptiones, & Elo-  
gia in marmoribus, & in libris affluunt:*

quare  
a Pontifex Maximus, Tribunus ple-  
bis quintum.

b Consul octavianum, Pater Patriæ,

*quare ne alienis frustra paginas impleam,  
aliqua potius ex proprijs affero, quæ pri-  
mum in manus venire scribenti, aliàs  
fortasse plura collecturus.*

## I N S C R I P T I O

*Ædícula, transfixa doloribus*

*Virgini Sacra.*

Languenti IESV Cruciatibus MARIE

Huc affer sinceræ pietatis lenimen.

Matrem solatus demereberis Filium.

Agnoscit illa, is probat,

Vterque exaudit

In tristibus suos:

Neuter vacuum fructu finit

Supplex obsequium.

Voti compos recedes,

Vbi accesseris particeps doloris.

## B I B L I O T H E C Æ.

Taciturnæ Sapientiæ domum,

Tanquam Pythagoræ Scholam,

Compressis labris ingredi,

Quisquis non aduenis hospes otiosus.

Gratuitam doctrinam hîc tradunt

Literæ liberales;

Quæ tamen, vt expertes vocis,

Non percipi, nisi à silentibus possunt,

Veni, vide, lege,

Sed tace.

Mutum decet versari cum Mortuis.

PHAR-

## P H A R M A C O P O L I I.

Sine Medæ præstigijs,  
 Quicunque seruandæ, vel instaurandæ  
 vitæ studes,  
 Habes hîc fospitale promptuarium;  
 Vnde integræ valetudinis præsidia  
 desumas,  
 Afflictæ subsidia.  
 Felix, si horum ope,  
 Felicior, si sine vsu valueris.

## V I L L Æ.

Non vobis aruorum inania Numina,  
 Sed Tibi, Deus pacis,  
 Sedem hanc amatæ quietis dicatâ volo.  
 Innocens hilaritas, voluptas honesta,  
 Vosque geniales Musæ,  
 Vos tantum contubernales accerso.  
 Fruere hîc tandem te ipso Anime.  
 Dudum viuimus alijs.  
 Adsint tamen, si velint, comitantibus  
 Gratijs Amici,  
 Quos modici lares ferant.  
 Tetricis, morosis, dicacibus  
 Clausum limen esto.  
 Procul hinc tricæ illustres:  
 valete fastus urbani.  
 Humilis hæc Statio curas non capit  
 ingentes.  
 Malo rusticam tranquillitatem,  
 Quàm superbum tumultum.

ZE-

**ZETÆ**, vulgò Alcoua,  
*in qua picta impendebat lectulo pueri  
 Iesu dormientis effigies, inscripto lem-  
 mate. Ego dormio, & cor meum vi-  
 gilat.*

Securos iam somnos cape ;  
 Vbi dormiens vigilat,  
 Qui non dormitat, cùm custodit :  
 At non prorsus somniculosum te vult  
 Magnus Excubitor.  
 Vide ne dormias in vtrunque aurem.  
 Vigil animus audiat,  
 Quæ loquitur Amantis cor insomne.  
 Vt euigiles ad eum, inuigilat tibi.  
 Perspicacissimum Custodem habes.  
 Clausis etiam oculis videt.  
 Semper omnibus vigilat ;  
 Non semper, nec omnibus dormit :

**ZETA** vox à Plinio iuniore lib. 2.  
 ep. 17. Et à Lampridio in Heliogabalo  
 adhibita, quanuis alij Diatam legima-  
 lint. Si quis vocem hanc respuat, ma-  
 gis latina, sed magis communi, cubicu-  
 lum dices pro zeta.



E P I T A P H I A,  
ET FVNEBRES INSCRIPTIONES

*In ade nostra Ticinensi Assumptæ  
Virgini sacra.*

IACOBVS MENOCHIVS,  
Magnum Iustitiæ Oraculum,  
In Pedemontana, Patauina,  
Ticinensi Cathedra,  
Tum Mediolani, cùm Senatorem,  
Mox Præsidem, & Regium ageret  
Consiliarium,  
Denique in Orbe vniuerso auditum  
Hic tacet.  
Consulenti tamen adhuc responderet,  
Si plura, quàm scripsit, dici possent.  
Obijt Anno Christiano MDCVII.  
Die X. Augusti  
Natus Annos LXXV.

*Ita legitur integrum in sepulcrali lapi-  
de Epitaphium Authore Claudio Achib-  
lino inscriptum; quanuis hoc idem multò  
breuius, valde quippe mutilatum, refe-  
ratur ab alijs.*

N... N...  
Integritate, Doctrina, Prudentia  
Eos domi, ac foris  
Promeritus honores,  
Qui



Qui non nisi summæ Virtuti debentur,  
Vitam, quam publicæ vtilitati  
addixerat,

Communi omnium Ordinum mærore,  
Intra sexagesimum annum  
absoluit.

Lugente præstantissimi Ciuis  
interitum Patria,

Orbatus optimo Parente Filius  
N. N.

Manfurum in feram posteritatem  
Sui doloris monumentum

P.



N. N.

Generosa secutus maiorum vestigia,  
Illustris militiæ tirocinium

A primis annis exorsus,

Per omnes fermè gradus

Ad summa euectus Imperia,

Cùm pàres bellis victorias numerasset,

Iam grauis annis, ac rude donatus,

Reuocata iterum ad cassidem

Emerita canitie,

Dum accingitur in hostem,

Arma posuit, & mortalitatis, exuias:

In postremo etiam conflictu

Eodem interritus animo,

Quo semper in acie.

Fortissimo Viro, dilectissimo Fratri

N. N.

N.

N. N.

Omnibus animi, & corporis dotibus  
 Ornatissimus Adolefcens,  
 Suorum solamen, Musarum amor,  
 Cùm annorum, studiorumque  
 Amœniori vere floreret,  
 Immatura morte præcisus  
 Hic iacet,

Filio,

Heu unico Filio!

Quem sperabant hæredem,  
 Ante se funeratum acerbo luctu  
 deflentes.

N. N., &amp; N. N.

Mæstissimi P. P.

N. N.

Parem Generis claritati nactus indolē,  
 Amplissimum gloriæ cursum  
 breui emensus,  
 Dubium reliquit,  
 Acie ne magis ingénij præstaret,  
 An morum candore,  
 Intra quintum lustrum  
 Iam Philosophica Legalique laurea  
 insignis,  
 Inelyto Iurisperitorum Collegio  
 adscriptus,  
 Vicerat meritis annos;  
 Ea, quam virtute anteuenterat,  
 Prolixiori ætate dignus;

Nisi

Nisi ad æternitatem festinasset.  
 Dum maxima quæque de se pollicetur,  
 Suis ereptus,  
 Spes optimas non tam præcidit,  
 quàm vicit,  
 Ad ea, quæ omne desiderium superant,  
 euocatus,  
 Anno à parta salute &c.

*In Templo nostro D. Alexandri.*

D.O.M.

GEORGIVS MARIA

TRIVULTIVS,

Magnæ Gentis titulis,

Suis, Suorumque meritis clarissimus,

Gratiam Principum,

Maximè LEOPOLDI CÆSARIS,

& ELEONORÆ AVGVSTÆ

Assectus commendatione virtutis,

Ex Clerico Regulari S. Pauli

Azoti Episcopus,

& Strigoniensis Ecclesiæ Suffraganeus(a)

Impigrè administrata ea Prouincia,

Pares magnis laboribus ærumnas

Perpeffus à Barbaris,

Inaugurato SERENISS. MO IOSEPHO

Pan-

(a) *In Epitaphio utendum censuimus  
 notiore vocabulo dignitatis. Caterum  
 Latine Auxiliarem Episcopum dici  
 potius, quàm Suffraganeum docet  
 Octavius Boldonius in sua Epigraphica  
 lib. 2.*

Pannoniæ Rege,  
 Cùm solenni Cæremoniæ  
 pro munere suo interfuisset,  
 Dum lætus eo publicæ felicitatis  
 incremento  
 Patriam reuisit,  
 Pontificias curas, & mortalitatis  
 ægritudines clausit;  
 Atque hîc pro voto  
 In suæ Congregationis gremio  
 conquieuit.  
 Anno Domini MDCLXXXVIII.  
 ætatis suæ LXII.

*Cùm eidem lugubri pompa iusta fierent,  
 circa funebrem molem sequentes  
 Inscriptiones pependere.*

## I.

Patriæ, Gentis, atque huius Ordinis  
 decus

Aliena regi tellure non debueras

GEORGI.

Satis te à nobis Germania,

Satis Pannonia curis ingentibus  
 distulerant.

Heu frustra expectant rediturum.

Consummato strenuè cursu

Fas fuerat domi requiem habere?

Optimum Ciuem, inclytum Filium

Patria recipit gremio,

Hic Mater condit in sinu.

## II.

## II.

Delusa es mors improba .

**GEORGII** animum habet sperata

Æternitas ,

Nos charos cineres habemus .

Ita partiris alijs , dum separas ;

Nil tibi reliquum est .

Ne mortuus quidem abest à nobis .

Charitatis vinculum acies tua  
non soluit .

Ipsò triumphat in funere

Fortior morte dilectio .

## III.

Illata à Barbaris damna ,

**Quæ** constantissimè Georgi pertuleras ,

Leniuerat ereptum superstitioni

Strigonium ,

Reddita Christo , & Cæsari

rebellis Prouincia .

Redimendæ Syriæ Pannonia

spem fecerat .

Hoc vnum erat vitæ solamen ,

Vt illuc referres Arcam

sinceræ Pietatis ,

Profanum Dagon auferres Azoto .

Dilato euentu terris excessisti ,

Vt exaudienda vota proximius

Deo narrares .

## ELOGIORVM EXEMPLA.

## CAPVT VLTIMVM.

**P**Oetica Elogia legenti non defunt,  
 si Martialem peruoluas, aliosque  
 Epigrammatum Scriptores. Vnum in-  
 terim præmitto, cui subdo solutam  
 Inscriptionem, hinc exornatum Elo-  
 gium, triplicis generis Exempla vnico  
 præbens argumento.

## POETICVM ELOGIVM.

*In fontem calidis aquis manantem,  
 qui ex Academia, Ciceronis villa, post  
 eius obitum, Antistio Vetere possidente,  
 salubris oculis erupit, Laureæ Tullij  
 eiusdem Ciceronis Liberti, Carmen.*

*Ex Plinio hist. natat. cap. 2.*

Quo tua Romanæ vindex clarissime  
 linguæ

Sylua loco, melius surgere iussa,  
 viret;

Atquæ Academiæ celebratam nomi-  
 ne villam

Nunc reparat cultu sub potiore  
 Vetus:

Hic etiam apparent lymphæ non  
 ante repertæ,

Lan-

Languida quæ infuso lumina rore  
leuant.

Nimirum locus ipse sui Ciceronis  
honori

Hoc dedit; hac fontes cùm patefe-  
cit ope.

Vt quoniam totum legitur sine fine  
per orbem,

Sint plures, oculis quæ medeantur,  
aquæ.

*Eiusdem Fontis.*

*I N S C R I P T I O.*

Celebrata studiosis Tullij recessibus  
Academia

Domini quondam sui  
Adhuc seruit ingenio.

Salubres oculis aquas effundens

Ea lecturis proficit,

Quæ dedit legenda.

Nec minùs interest videre, quæ scripsit

Summus Orator,

Quàm præstitit audire, quæ dixit.

Iam promeritus aurium suffragia,

Nunc exigit oculorum officium.

Laurea Tullius Libertus,

Obstrictus Patroni meritis,

Memoriam veneratus

P.

*In eundem Fontem.*

## E L O G I U M.

Præsidem Fontis Nympham

Hic ne quære Spectator.

Pro loci Genio Suada est,

Quæ indolem suam

In Ciceronis Academiam transfudit

Hæc ut nunquam bonis non affluat,

Post effusū salutaris Eloquentiæ flumen,

Medicum fontem largitur:

Pari utrobique beneficio,

Ut ex eadem vena manasse credas.

Periclitantibus illud capitibus

Salutem attulerat;

Is laborantibus oculis affert.

Eiusdem utique pietatis est

Lumina tueri, ac lucem.

Tullium scrutaturus

Aciem prius hic repara.

Argus ille nemini patet luscioso:

Calentes aquas miraris?

Ciceronianæ faciundie torrente imitatur,

Quæ fluxit semper, friguit nunquam.

Eam si haurientibus indere posset

felix amnis,

Ditior esset Gange, præstantior

Aganippe.

Sitientibus tamen hunc haustum

Egregiè consuluit

Rei Literariæ, ne dum Romanæ,

Sa-



Sapientissimus Consul.

Vberrimos in libris fontes aperuit,  
Vnde Posterì Eloquentiam deriuarent.

Huius copiam si quæris,

Noſti quam ſcatebram adeas.

Surdus es, ſi Tullij famam non audis,  
Cæcus, niſi vides in ſcriptis ingenium.

## INSCRIPTIONES ANTIQVÆ.

*Pauca ex Veteribus affero Inſcriptionum exempla: harum enim ſylvas habes apud Gruterum, Suuertium, Schraderum, Boldonium, alioſque ſtudioſos Antiquitatis indagatores. Ab illis priſcæ ætatis reliquijs puritatem, & grauitatem Inſcriptionum diſces, à quibus normam ſumpſere optimi Recentiorum. Ab his venuſtatem diſces, floridumque, & argutum dicendi genus pro Elogijs præſertim Exornatiuis, quorum is non fuit apud Antiquos, qui apud nos, uſus.*

*Inſcriptio Marmoris Iuliano poſiti.*

Claudio Iuliano

Victori,

Ac Triumphatori

Semper Aug.

Domino Orbis

Terrarum,

B. (a) R. P. nato.

Alte-

a Bono Reipublica.

*Alterius Marmoris pro Tito  
Vespasiano.*

Imperator Titus Cæsar Vespasianus,  
Augustus, Pont.(a) M., Trib.P.V.,  
Cof. (b) VIII. P. P., Generis humani  
amor est,  
Desiderium etiam viuens.

*Ædis Concordiæ instauratæ.*

S. P. Q. R.

Ædem Concordiæ vetustate collapsam  
In meliorem faciem  
Opere, & cultu splendidiore  
Restituerunt.

*Pontis supra Danubium à Traiano  
excitati.*

Providentia

Aug.

Verè Pontificis  
Virtus Romana  
Quid non domet?  
Sub iugum ecce  
Rapitur & Danubius.

*Recentiorum Inscriptiones, & Elo-  
gia in marmoribus, & in libris affluunt:*  
quare

a Pontifex Maximus, Tribunus ple-  
bis quintum.

b Consul octavianum, Pater Patriæ,

quare ne alienis frustra paginas impleam,  
 aliqua potius ex proprijs affero, quæ pri-  
 mum in manus venerè scribenti, aliàs  
 fortasse plura collecturus.

## I N S C R I P T I O

*Ædicula, transfixa doloribus  
 Virgini Sacra.*

Languenti IESV Cruciatibus MARIE

Huc affer sinceræ pietatis lenimen.

Matrem solatus demereberis Filium.

Agnoscit illa, is probat,

Vterque exaudit

In tristibus suos:

Neuter vacuum fructu finit

Supplex obsequium.

Voti compos recedes,

Vbi accesseris particeps doloris.

## B I B L I O T H E C A E.

Taciturnæ Sapientiæ domum,

Tanquam Pythagoræ Scholam,

Compressis labris ingredi,

Quisquis non aduenis hospes otiosus.

Gratuitam doctrinam hic tradunt

Literæ liberales;

Quæ tamen, vt expertes vocis,

Non percipi, nisi à silentibus possunt,

Veni, vide, lege,

Sed tace.

Mutum decet versari cum Mortuis.

PHAR-

## P H A R M A C O P O L I I.

Sine Medæ præstigijs,  
 Quicunque seruandæ, vel instaurandæ  
 vitæ studes,  
 Habes hîc hospitale promptuarium;  
 Vnde integræ valetudinis præsidia  
 desumas,  
 Afflictæ subsidia.  
 Felix, si horum ope,  
 Felicior, si sine vsu valueris.

## V I L L Æ.

Non vobis aruorum inania Numina,  
 Sed Tibi, Deus pacis,  
 Sedem hanc amatæ quietis dicatâ volo.  
 Innocens hilaritas, voluptas honesta,  
 Vosque geniales Musæ,  
 Vos tantum contubernales accerso.  
 Fruere hîc tandem te ipso Anime.  
 Dudum viuimus alijs.  
 Adsint tamen, si velint, comitantibus  
 Gratijs Amici,  
 Quos modici lares ferant.  
 Tetricis, morosis, dicacibus  
 Clausum limen esto.  
 Procul hinc tricæ illustres:  
 valete fastus urbani.  
 Humilis hæc Statio curas non capit  
 ingentes.  
 Malo rusticam tranquillitatem,  
 Quàm superbum tumultum.

ZE-

**ZETÆ**, vulgò Alcoua,  
*in qua picta impendebat lectulo pueri  
 Iesu dormientis effigies, inscripto lem-  
 mate. Ego dormio, & cor meum vi-  
 gilat.*

Securos iam somnos cape ;  
 Vbi dormiens vigilat,  
 Qui non dormitat, cùm custodit :  
 At non prorsus somniculosum te vult  
 Magnus Excubitor.  
 Vide ne dormias in vtranque aurem.  
 Vigil animus audiat,  
 Quæ loquitur Amantis cor insomne.  
 Vt euigiles ad eum, inuigilat tibi.  
 Perspicacissimum Custodem habes.  
 Clausis etiam oculis videt.  
 Semper omnibus vigilat ;  
 Non semper, nec omnibus dormit :

**ZETA** vox à Plinio iuniore lib. 2.  
 ep. 17. Et à Lampridio in Heliogabalo  
 adhibita, quanuis alij Diatam legima-  
 lint. Si quis vocem hanc respuat, ma-  
 gis latina, sed magis communi, cubicu-  
 lum dices pro zeta.

E P I T A P H I A ,  
ET FVNEBRES INSCRIPTIONES

*In ade nostra Ticinensi Assumptæ  
Virgini sacra .*

IACOBVS MENOCHIVS,  
Magnum Iustitiæ Oraculum,  
In Pedemontana, Patauina,  
Ticinensi Cathedra,  
Tum Mediolani, cùm Senatorem,  
Mox Præsidem, & Regium ageret  
Consiliarium,  
Denique in Orbe vniuerso auditum  
Hic tacet.  
Consulenti tamen adhuc responderet,  
Si plura, quàm scripsit, dici possent.  
Obijt Anno Christiano MDCVII.  
Die X. Augusti  
Natus Annos LXXV.

*Ita legitur integrum in sepulcrali lapi-  
de Epitaphium Authore Claudio Achil-  
lino inscriptum; quanuis hoc idem multò  
breuius, valde quippe mutilatum, refe-  
ratur ab alijs.*

N... N...  
Integritate, Doctrina, Prudentia  
Eos domi, ac foris  
Promeritus honores,  
Qui

Qui non nisi summæ Virtuti debentur,  
Vitam, quam publicæ vtilitati  
addixerat,

Communi omnium Ordinum mærore,  
Intra sexagesimum annum  
absoluit.

Lugente præstantissimi Ciuis  
interitum Patria,

Orbatus optimo Parente Filius  
N. N.

Mansurum in seram posteritatem  
Sui doloris monumentum

P.



N. N.

Generosa secutus maiorum vestigia,  
Illustris militiæ tirocinium

A primis annis exorsus,

Per omnes fermè gradus

Ad summa euectus Imperia,

Cùm pæres bellis victorias numerasset,

Iam grauis annis, ac rude donatus,

Reuocata iterum ad cassidem

Emerita canitie,

Dum accingitur in hostem,

Arma posuit, & mortalitatis, exuias:

In postremo etiam conflictu

Eodem interritus animo,

Quo semper in acie.

Fortissimo Viro, dilectissimo Fratri

N. N.

N.

N. N.

Omnibus animi, & corporis dotibus  
 Ornatissimus Adolefcens,  
 Suorum solamen, Musarum amor,  
 Cùm annorum, studiorumque  
 Amœniori vere floreret,  
 Immatura morte præcisus  
 Hic iacet,

Filio,

Heu vnico Filio!

Quem sperabant hæredem.  
 Ante se funeratum acerbo luctu  
 deflentes.

N.N., &amp; N.N.

Mæstissimi P. P.



N. N.

Parem Generis claritati nactus indolē,  
 Amplissimum gloriæ cursum  
 breui emensus,

Dubium reliquit,

Acie ne magis ingēnij præstaret,

An morum candore.

Intra quintum lustrum

Iam Philosophica Legalique laurea  
 insignis,

Inclyto Iurisperitorum Collegio  
 adscriptus,

Vicerat meritis annos;

Ea, quam virtute anteuenterat;

Prolixiori ætate dignus;

Nisi



Nisi ad æternitatem festinasset.  
 Dum maxima quæque de se pollicetur,  
 Suis ereptus,  
 Spes optimas non tam præcidit,  
 quàm vicit,  
 Ad ea, quæ omne desiderium superant,  
 euocatus,  
 Anno à parta salute &c.

*In Templo nostro D. Alexandri.*  
 D.O.M.

GEORGIUS MARIA  
 TRIVULTIVS,  
 Magnæ Gentis titulis,  
 Suis, Suorumque meritis clarissimus,  
 Gratiam Principum,  
 Maximè LEOPOLDI CÆSARIS,  
 & ELEONORÆ AVGVSTÆ  
 Assecutus commendatione virtutis,  
 Ex Clerico Regulari S. Pauli  
 Azoti Episcopus,  
 & Strigoniensis Ecclesiæ Suffraganeus(a)  
 Impigrè administrata ea Prouincia,  
 Pares magnis laboribus ærumnas  
 Perpeffus à Barbaris,  
 Inaugurato SERENISS. MO IOSEPHO  
 Pan-

(a) *In Epitaphio utendum censuimus  
 notiore vocabulo dignitatis. Caterum  
 Latine Auxiliarem Episcopum dici  
 potius, quàm Suffraganeum docet  
 Octavius Boldonius in sua Epigraphica  
 lib. 2.*

Pannoniæ Rege,  
 Cùm solenni Cæremoniæ  
 pro munere suo interfuisset,  
 Dum lætus eo publicæ felicitatis  
 incremento  
 Patriam reuisit,  
 Pontificias curas, & mortalitatis  
 ægritudines clausit;  
 Atque hîc pro voto  
 In suæ Congregationis gremio  
 conquieuit.  
 Anno Domini MDCLXXXVIII.  
 ætatis suæ LXII.

*Cùm eidem lugubri pompa iusta fierent,  
 circa funebrem molem sequentes  
 Inscriptiones pependere.*

## I.

Patriæ, Gentis, atque huius Ordinis  
 decus

Aliena regi tellure non debueras  
 GEORGI.

Satis te à nobis Germania,  
 Satis Pannonia curis ingentibus  
 distulerant.

Heu frustra expectant rediturum.

Consummato strenuè cursu

Fas fuerat domi requiem habere.

Optimum Ciuem, inclytum Filium

Patria recipit gremio,

Hîc Mater condit in sinu.

## II.

## II.

Delusa es mors improba .

**GEORGII** animum habet sperata  
Æternitas ,

Nos charos cineres habemus .

Ita partiris alijs , dum separas ;

Nil tibi reliquum est .

Ne mortuus quidem abest à nobis .

Charitatis vinculum acies tua  
non soluit .

Ipsò triumphat in funere

Fortior morte dilectio .

## III.

Illata à Barbaris damna ,

**Quæ** constantissimè Georgi pertuleras ,

Leniuerat ereptum superstitioni

Strigonium ,

Reddita Christo , & Cæsari

rebellis Prouincia .

Redimendæ Syriæ Pannonia

spem fecerat .

Hoc vnum erat vitæ solamen ,

Vt illuc referres Arcam

sinceræ Pietatis ,

Profanum Dagon auferres Azoto .

Dilato euentu terris excessisti ,

Vt exaudienda vota proximius

Deo narrares .

## IV.

Infelix Azotus ,  
 Quàm densa premeris nocte ?  
 Cumulat funestis vmbreis  
 mors tenebras tuas .  
 Nondum reddita luce  
 Non vides egregij Pastoris iacturam .  
 Dum ille vigil Custos consulit Cœlum .  
 Deficiente iam Luna ,  
 Gregi suo Solem vicinum sperat .  
 Sed dum tibi expectat Auroram ,  
 Heu trahitur in Occasum .  
 Nisi adhuc lugenda cæcitate laborares ,  
 Oculis omnibus hanc tuam  
 lugeres orbitatem .

*In Funere*

**P R I N C I P I S A N T O N I I  
 T H E O D O R I T R I V V L T I I .**

Adeste pallentes Veterum ceræ ,  
 Adeste TRIVULTIORVM  
 pullatæ imagines .  
 Atram omnino pompam exigit  
 hoc funus .  
**ANTONIO THEODORO  
 TRIVULTIO ,**  
 Magnorum Auorum Nepoti Maximo ,  
 Iusta soluuntur :  
 Hoc est inclytæ Gentis Propago  
 tota funeratur .

**Heu**

Heu inuidam mortem!

Ægrè tulit de tanto Stipite

nasci tot Heroes:

Ne vltra sobolesceret, radicitus auulsit.

Similes Maioribus fortes.

Daturum Herculis Filium

vt extingueret,

Infensi Leonis iras accendit.

Parum hoc fuerat,

Nisi Nemæo furori Nessæas

artes miscuisset.

Auitam gloriam strenuè

gestis aucturum,

Vbi vidit instrui ad arma,

Antequam prodiret in aciem,

insidijs inuasit.

Digna suo sanguine meditantem,

Nondum Patrem oppressit;

Ne triumpharet in posteris.

Proh falcem mortis auidissimam!

Quot vno ictu præclarissima

capita messuit!

Adeò non contenta in morituros

furere,

Sæuit etiam in nascituros.

Quicumque Patriæ decora extingui

dolendum putas,

Multiplex hîc habes doloris

argumentum

Quot lacrymas merentur

In Vnius Funere tot Funera!

*Poetica Epitaphia Martialis complura dabit. Alcimi lib. 1. Epist. 47. Glaucia lib. 6. 19. Pantagathi ibidem 33. Latini 9. 19. Philenis ibidem 20. Erotij 10. 54. & 5. 33. Paridis 11. 12. Scorpi 10. 47. Nobilis Matrona ibidem 58. Canaces 11. 56. Parentum Rabinij 10. 61. grauissimum quoque Cenotaphium de Pompeio, & filijs lib. 5. 101. His adde Lydia Canis Epitaphium lib. 11. 45. cui simile Barclaius Aldina catella cecinit libro. 2. Argenidis.*

## **ELOGIA ORATORIA, SEU EXORNATIVA.**

*In Tiberium Claudium.*

### **CLAVDIVS**

Mente pariter claudus, & pede,  
Vt capite, ac manu, ita nutauit  
ingenio.

Lingua, sed magis fide, Græcus,  
Cum vocibus Patriam mentiri vellet,  
Factis probauit;

Se de Senonum sanguine

Romæ cladibus testatus.

Hominis monstrum nemo natum putauit;

Vitium nemo bonus amauit;

Nemo sanus fleuit extinctum.

Pendente sæpius vita

Diutius iusserat Mathematicos:

Ne ultra falleret, Agrippina prouidit.

Se.

Sexaginta quatuor annis luctatus  
cum anima,

Nunquam meritus, ut tandiu  
crucietur,

Desijt viuere videri,

Quando, ne quæras.

Incohatum à natura, non absolutum,  
portentum,

Neque nascendi, neque moriendi  
certam habuit horam.

Vtraque lateat,

Dum liqueat Claudium non esse.

Vnum hoc æternum Roma celebrabit.

Neque periculum est, ne excidat.

Nemo felicitatis suæ obliuiscitur.

*Vide Senecam in Apocolocyntosi Clau-  
dij: depromptis enim illinc sententijs, &  
fermè verbis intextum Elogium. De  
vita moribus, ac morte Claudij consule  
Suetonium.*

**IN DOMITIANVM MVSCAS  
AVCVPANTEM.**

Præclarè Cæsar.

Probè calles artem Imperij.

Cùm sit impatiens consortis potestas,  
Solitudinem quæris;

Vtque sis affatim solus,

Ne muscam quidem esse pateris tecum.

Secreti participem magnæ mentes  
non ferunt.

Lethalis curiositas est tentare  
Principis arcana .

Hæc tutius ut lateant ,

Garrulas cautè submoues cubicularias,  
Quæ omnibus insusurrant .

Aut reor assentatrices Aulicas odisti,  
Quæ scalpunt aures .

Iustè ferrum stringis in fontes .

Maiestatis reæ sunt ,

Quotquot in penetrale Augustum  
Facto agmine irrumpunt .

Non ferenda est aperta in Dominum  
conspiratio .

Quoties tuis etiam peccant sub oculis ?

Quo non damnanda supplicio  
temeritas ,

Quæ sæpe ausa est adspargere  
Cæsari maculam ?

Nemo impunè insultat potenti .

Discite alieno periculo dicaces,  
Capitale esse mordere Principem .

Gratulor interim tibi Roma

Suauissimum Domitiani Principatum .

Quid ni melleum Cæsarem putem,  
In quem auidæ nectaris conuolant aues ?

Si vestrum est videre Quirites,  
Ne quid detrimenti capiat Respublica,

Cauete, ne tantam dulcedinem  
abliguriant .

Certè mellea res imperium est .

O quot sollicitat muscas tam dulce  
illicium !

Caue



**Caue** tu **Cæsar**, ne tuo aliquando  
sanguine fatientur .

**Perge** itaque sæuire in hostes .

**Vtinam** hac tantum cæde mucro  
tuus hebescat .

**Vereor**, ne ista sit in sitibundas cruoris  
feras æmulatio ,

**Ne** tu muscas oderis hirudo .

**Dij** faxint , ne aucupium istud  
fiat carnificinæ Tirocinium ,

**Moxque** libeat homines ita mactare ,  
vt muscas .

**Cæterum** digna Domitiano expeditio !

**Quantum** tibi gloriæ accedet ,

**Si** perdas genus inuisum ?

**Si** re bene gesta ,

**Vt** de **Cattis**, de **Muscis** etiâ triumphes ?

**Tum** non lauream , sed filicem .

**Ioui** **Capitolino** dicabis :

**Atque** , vt hætenus **Germanicus** ,

**Posthac** vocaberis

**Fama** gratiore **Muscarius** .



**DIVI FERDINANDI**

**CASTELLÆ REGIS**

**ELOGIVM.**

**FERDINANDVS**,

**Quæ** rarò conueniunt ,

**Cum** **Adolescentia** **Maiestatem**,

**Regnum** cum **Sanctitate**,

**Fortitudinem** cum **Pietate** sociauit .

Profusa in Diuinum cultum largitate  
Securitatem fortunis inuenit,  
Collocato in templis ærario.  
Religionis acerrimus assertor  
Non cum Deo diuifit, fed coniunxis  
imperium;  
Nufquam regnare Ferdinandum ratus,  
Nifi vbi Chriftus regnaret.  
Profcripta è fuis finibus Hærefi,  
Verfis in Barbaros armis,  
Eos tantum habuit hoftes,  
Quos habuit Cœlum infenfus.  
Prece prius, quàm ferro prælia exorſus,  
Antequam enſem cruentaret in acie,  
Diſtriſtis in ſe ipſum flagris  
Manum erudit ad pugnam:  
Æquè pius, ac fortis,  
Et cùm proprio ſanguine placaret  
exercituum Dominum,  
Et cùm illi offerret hoſilem.  
Fœderatus cum Rege Regum  
Quòcunque intulit bella,  
retulit palmas.  
Mariam veneratus in caſtris,  
In hoc ſigno ſe viciffe profeſſus eſt:  
Quouis Ancili, & Palladio  
Præſtantius in Daudica Turri  
præſidium naſtus.  
Ereptas Barbarico iugo Prouincias,  
Proſtigatis Maurorum umbris,  
Chriſtianæ libertati, lucique reſtituit.  
Traieſcturus in Africam  
Mon-

Monstrorum domitor pius Alcides ,  
Ante illam expeditionem ,  
transijt ad triumphum ,  
Euocatus ad astra .  
Satis nimirum stipendiorum  
iam fecerat ;  
Totidem promeritus coronas  
in Cælitum Regno ,  
Quot illi reddiderat colonias .



IN INFANTIS IESV  
LACRYMAS .

Qui miraris lacrymantem Dei Filium,  
Eundem intellige filium hominis  
Cum primùm descendit in terras ,  
Vernaculam didicit mortalium  
linguam .

Quis ibi vacet à fletu ,  
Vbi plorat risus Cælorum ?  
Causam quæris ?  
Corruptum opus suum deflet  
rerum Author ,  
Mala per nos omnia videns ,  
Qui cuncta vidit olim, qua fecerat,  
valde bona .

Sed bene est .

Vt vertat in gaudiū tristitiam nostram,  
Lacrymas suis oculis beat .  
Iam beatos quis neget esse , qui lugent ,

Cum liquescit ipsa Beatitas in luctum ?  
 Amantissimus causæ nostræ Patronus  
 Illam pupilla perorat :  
 Obmutescere non potest vel infans  
 Verbum .

Quandiu non suppetunt voces ,  
 Fletibus agit .

Quauis miro contractum Laconismo  
 Fluentem pro nobis adhibet  
 eloquentiam .

*Mediator Dei , & Hominum ,*  
 Explicata rorantibus oculis tride ,  
 Signum fœderis instaurat .

Solicitus Redemptor ,  
 Daturus olim sanguine pretium ,  
 Dat statim lacrymis arrham .

Bonus Agricola ,  
 Vt *Aridam* fœcundet ,  
 Geminat fontes , quibus reddat  
 irriguam .

Emollire interim ingrata hominum  
 sterilitas .

Ne fias *sicut terra sine aqua* ,  
 Repende lacrymis lacrymas .  
 Te ne miseret plorantis puelli ?  
 Deterges IESV fletum ,  
 Si absterferis flendi materiem .



*In pictam imaginem Christi Domini animam in Cruce agentis, supra solium Salomonis erectam, solaribus horologijs ita circumquaque dispositis, ut prominentes è Cruce clavi pro stylis essent horas indicantibus.*

## E L O G I U M.

*Authore P. D. Simplicio Gorla.*

Proh quàm avidum vitæ desiderium est,  
 Cuius horas ut protrahat nostra  
     Gnomonica,  
     Illo metitur filio,  
 Per quem fecit sæcula Pater.  
 Elatus in cathedram Crucis  
     Magister Christus,  
 Tanquam in folio Salomon  
 Nos disertissimè docet de Tempore.  
 Sanè cum tota huius natura sit labi,  
     Explicari aliter meliùs,  
 Quàm ab expirante non poterat.  
 Nouo titulo Tempus pretiosum est.  
     Ex iisdem fontibus exit,  
     Vnde Redemptoris sanguis  
     Orbi redimendo profluxit.  
 Liberalis in cæteris Christus  
     Solius temporis auarus est,  
 Quod habuit præfinitum à Patre  
 Illud ergo ne prodigant homines,  
     Horatim ipse distribuit.

Facundus Orator uti est,  
Temporis fugam

Quadrimestri periodo describit,  
De qua omnes admonitos volens

Astronomico , Babylonico ,  
Italico , Antiquo ,

Omni demum idiomate , & stylo  
proloquitur .

Hanc ut sistat salutis tuæ prospiciens,  
Manibus tenet , clavis figit :

Terebratis usque pedibus moratur ,  
Dum te Spectator expectat .

Quoniam tu lentus es ,

Ille , ut horas attemperet moris tuis ,  
Sic iubet progredi pedetentim .

At vel istam fiduciam time , si sapis .  
In tanta horarum serie .

Discernit Christus suam ,

Qua transeat ad Patrem de mundo ,  
Subticit tuam ,

Qua moriens transibis ad Iudicem .

*At quandiu exempla? Quasi horum  
copiam atas nostra desideret? Cum prater  
Veterum monumenta , tot egregia edide-  
rint recentiores . Lege elegantissima , &  
argutissima P. Aloysij Iuglaris , Emma-  
nuelis Thesauri , & aliorum Elogia . Op-  
timorum imitatio , perficiet , quod sola  
efficere precepta non possunt .*

133

**DE ARGVTIIS  
INVENIENDIS.**

*Quid sit, & quotuplex Argutia,  
& quinam illius  
fontes.*

**CAPVT PRIMVM.**



Atum ad rerum notitiam, ac posteritatis documentum Elogium, transijt etiam ad voluptatem ingenij, ac delicias legentium, accedente Argutiarum illecebra; quæ adeò plerosque rapit, vt hac vna cuiusque Inscriptionis pretium definiant. Contra seueriores alij, tetrici, Agelasti, quibus nunquam Charites arrisere, tanquam Eloquentiæ corruptelas damnant, & iuueniles ineptias. Ego neutris assentior; vtque puto non sanum illi gustum esse, cui sales desipiunt, ita corruptum æquè palatum arbitror, cui nihil sapere potest, nisi maximè salum.

Varijs appellantur nominibus Argutiæ; acumina, ioci, festiuitates, lepores, vrbانيتates, dicteria, multa dicta, vneres, scommata, cauillationes, sales; hoc est (vt loquitur Tullius 2. de

*Ora-*

Oratore) omnium sermonum condimenta. Quid ni placeant, & audientes, legentesque oblectent? Nemo tamen totam salibus instruit mensam: quare intelliges, his condiendam esse Orationem, non condendam; neque tantum de festiuis loquor, at de grauioribus etiam, quas Quintilianus l. 8. c. 3. Sententias vocat, lumina Orationis, & velut oculos quosdam Eloquentiæ: neque enim oculi esse toto corpore debent, ne cætera membra officium suum perdant.

Ad rem autem nostram parcius vteretur Argutijs Elogium Historicum, aliquantò liberaliùs Exornatiuum, licentiùs Poeticum. Sed Argutias non voco frigidas ineptias, plebeia dicteria, scurriles nugas; neque facetias, quæ Comicis fortassè conuenient, Elogiastæ licere puto, qui nisi versetur in ludicris, grauitatem maximè debet, Decorum sanè vbique, tueri.

*ARGVTIA* est breue dictum, aliqua specie nouitatis mirabile. Est inquam breue dictum; nam paucis verbis, interdum vnico, instar fulgetri vibratur; aliqua specie nouitatis mirabile; nam vel nouum, vel rarum aliquid, seu inexpectatum afferens, excitat admirationem. Atque in hoc genere maior laus ingeni consistere videtur in inueni-

nica.



nienda conuenientia rerum ; siue etiam verborum , non antea obseruata , vel saltem non ita obseruata . Quòd si ea conuenientia sit inter res magis inuicem distantes , tunc est magis mirabilis , & magis si inter contrarias ; tunc enim est magis noua ; quod inferiùs in exemplis à Metaphora obseruandum proponam .

Duplex Argutiarum est genus . Aliæ seriæ sunt , aliæ iocosæ . Serias voco graues , & moratas , qualis ea est Senecæ de Constantia Sapientis . *Genus vltionis est eripere ei , qui fecit , contumelia voluptatem .*

Eiusdem Senecæ de Clementia lib. 1. *Tam omnibus ignoscere crudelitas est , quàm nulli .*

Martialis lib. 10. Epigr. 22. de M. Antonio .

*Ampliat ætatis spatium sibi vir bonus :*

*Hoc est*

*Vinere , bis vita posse priore frui .*  
bis, primò rectè viuendo , secundo grata recordatione bene actæ vitæ .

Iocosas voco quotquot enititur festiuiùs ludens ingenium , quæ plus amoritatis habent , quàm ponderis . Talis ea fuit Ciceronis ; qui cùm Pansam , & Hircium arte Oratoria institueret , ab iisdem ad lautiozem cœnam vocatus *Hircium , inquit , & Pansam habeo dicendi*

*cendi discipulos , cœnandi magistros .*

Festiuè iocatus est Nero, in furacem feruum : *Nulli apud se plus fidei haberi* dicens : *nihil ei occlusum , neque obsignatum esse ;* nulla quippe tam cauta rerum custodia , quæ versuto latrunculo non pateret .

Lepidè ludit in candelabrum ligneum *Martialis lib. 14. 38.*

*Esse vides lignum : serues nisi lumina , fiet*

*De candelabro magna lucerna tibi .*

Iocosæ Argutiæ in plures diuiduntur species ; urbanas , venustas , salsas &c. , quas vide , si placet , apud Fabium de Risu : parui enim momenti est ad rem nostram harum distinctio . Neque semper vel purè seriæ sunt , vel iocosæ , at sæpe misto utroque genere iocoseriæ fiunt , ut nescias , plus ne grauitatis habeant , an festiuitatis .

Argutiarum vsum etiam apud Antiquos floruisse , nemo est adeò leuiter literis imbutus , qui nesciat . Quis enim ignorat ( ut alios taceam ) festiuissimum Plautum , acutissimum Martialem , & ipsum Principem Oratorem ? Quem salibus indulgisse utique docent argutè dicta , quibus Orationes inspersit , & quæ Plutarchus , Macrobius , alijque collegere . Idem tamen , & cum eo Quintilianus aut nullam , aut vix vllam esse

Argu-

Argutiarum artem sentire videntur, quod si qua nunc circumfertur, nemo putet prorsus nouam hanc esse, ac pri- scis ignotam, quanuis recentiores euo- carint in lucem: nam iidem Eloquen- tiæ magistri (a) Græcos, Latinosque citant, qui de hac olim scripsere, tum ipsi aliquas tradunt observationes ad inuentionem, vsumque Argutiarum. Verum in his denique vibrandis plus naturæ tribuunt, quam arti; sentientes nimirum non certam præscribi posse ijs acuminibus doctrinam, quæ sæpius erumpunt impetu ingenij, & facilius nascuntur, quam fiant.

Vt aliquam tamen argutè dicendi rationem Rhetoricæ Alumnis osten- dam, quos in ea præcipuos duces ha- bui, eosdem sequar, Tullium, & Fa- bium; nec in adytis Philosophiæ quæ- ram Argutiarum mysteria, sed ab ipsis Eloquentiæ Præludijs earum fontes de- ducam. Quosnam tandem? Tropos, Figuras, & omnes Argumentorum Locos; ex his enim (quod aliàs attigi) vis, & copia, & ornatus, omnisque su- pellex Orationis emanat.

Ex his igitur præcipua seligam ca- pita, Elogiorum Argutijs opportunio- ra, pluribus omissis, quæ potiùs ad  
fa-

a *Cic. 2. de Oratore, Quintil. lib. 6. c. 2.  
de Rifu.*

familiares iocos, & faceta colloquia pertinent; neque singula explicando, ne iam dicta, & nota repetam, sed exemplis illustrando; haud quidem ignarus multò plures inquiri posse Argutiarum fontes. *At si species omnes persequi velimus, nec modum reperiemus, & frustra laborabimus.* (a) Immò eùm omnia, quæ hac de re acutissimè eractantur, perlegeris, denique cum Aristotele. (*Lib. 30. Rhet. c. 10.*) senties, posse argutè dicere aut ingeniosi esse, aut exercitati; quorum alterum naturæ, alterum vsui debetur.

**FONTES ARGVTIARVM**  
*Exemplis illustrati.*

**T R O P I.**

**CAPVT SECVNDVM.**

**M**ETAPHORA cò magis arguta fiet, quo magis recedet ab vsu vulgari, plusque acuminis, ac nouitatis habebit. Argutam Metaphoram torfit Cornificius Poeta in timidos milites, qui feruente inter Augustum, & Antonium bello, quoties conferendæ manus essent, salutem pedibus quærebant; quare illos *galeatos lepores* appellauit.

Ad

a *Idem ibidem.*

Ad notandam eorum timiditatem satisfuisset *lepores* nuncupare ; sed illud Epithetum nouam , & mirabilem Metaphoram facit ; nam præter morem armatos inducit militari casside *lepusculos* . Acutè lusit Constantinus in Traianum , quem ob inscriptum passim publicis ædificijs nomen , *herbam parietariam* vocare consuevit . Vide quàm disparata sint nomen Traiani , & herba parietaria : vt non statim cuique pateat , in quo contueniant ; in hoc videlicet , quòd frequentissimè inhæreant parieti ; quanuis hæc sponte nata , illud arte incisum . Idem in plerisque Argutijs obseruabis quarum vis in discordi concordia sita est , quæ aliquo nexu remotissima colligit , vnitque discrepantia . Quare ingenij celeritate , ac sagacitate præstare debet Argutiarum indagator , vt vno velut impetu pluræ distantia percurrat , simulque illorum naturam , proprietates , relationes , oppositiones , similitudines , ac dissimilitudines deprehendat . Hinc meritò ab Italis dicuntur Argutiæ *Riflessi* ; hæc enim promptius inueniunt , quibus velox est mentis acies ad plura simul respicienda .

*ALLEGORIA* simplicem alioquæ Propositionem facillè reddit argutam . Si de Magdalena resipisciente dicas :

*An*

*Antea acta vita crimina deplorat: vulgare dictum erit, & expers acuminis. Idem si allegoricè vertas, emicabit Argutia. Ex. gr. Lumina, quibus ignes accenderat, liquat in fontes. Meliore iam flamma calet, qua pristina mergit incendia. Illinc imbres elicit, unde vibraverat faces.*

**METONYMIA** ponit argutè signa pro rebus signatis, causas pro effectis &c. Cic. pro M. Marcello. *Gladium, vagina vacuum in urbe non vidimus. Quos amisimus ciues, eos Martis vis percussit, non ira victoria.* Idem in Pisonem. *Obrepisti ad honores errore hominum, commendatione fumosarum imagines, quarum simile habes nihil, prater colorem.* D. Ambrosius de Eleazaro, qui cæsi elephanti mole pressus occubuit. *Cuius ruina inclusus magis, quam oppressus, suo est sepultus triumpho. i. materia, & causa triumphi.*

**ANTONOMASIA.** Ex. gr. indicacem. *Dentes acuit mordacissimus Theon. Nigrum venenum euomuit furens Lycambes.* In præstantem virum ab optimo institutore formatum. *Et belli, & pacis artibus claruit Chironi suo non impar Achilles.* Martial. ad Flaccum lib. 8. ep. 56. *Sint Mecanates non deerunt Flacco Marones. Mecanates, hoc est Principes Viri Poetarum.*  
aman-

amantes : *Marones*, scilicet egregij Poetæ.

**SYNECDOCHE.** Dictum Sullæ de Iulio Cæsare adhuc adolescentulo. *Cæsari multos Marios inesse*. .i. Marij ferocem animum, sed qui grauiora, quàm ille in Remp. moliretur. Seuerus pedibus æger, atque ideo à militibus despectus, cùm in seditionis authores animaduerti iuberet, hique veniam precarentur : *Tandem sentitis (inquit) caput imperare non pedes* : hoc est virum mente valentem, licet pedibus infirmum. *Spartianus in Seuero*.

**HYPERBOLE.** Festiuè Tiberius Apionem gloriosum Grammaticum *Cymbalum mundi* nuncupauit ; quasi verò per omnes terrarum fines magni nominis tinnitu personaret. Aufonius in Faustulum pumilionem. Ep. 115.

*Faustulus insidens formica, ut magno Elephanto*

*Decidit, & terra terga supina dedit.*

*Moxq; idem ad mortem est multatus calcibus eius ;*

*Perditus ut posset vix retinere animam.*

*Vix tamen est fatus : quid rides improbe linor ?*

*Quòd cecidi ? cecidit non aliter Phaeton.*

Mar.

Martialis ad Domitianum de illius Palatina domo. *Lib.8. Epigr.36.*

*Hac Auguste, tamen, qua vertice  
sidera pulsat,*

*Par domus est calo, sed minor est  
domino.*

**CATACHRESIS.** Furnius Cæsari Augusto gratias agens, cùm Patri Antonianas partes secuto veniam impetrasset. *Hanc unam* (ait) *Cæsar habeo iniuriam tuam: effecisti ut viverem, & morerer ingratus.* Iniuriam appellat maximum beneficium, cuius magnitudo effecerat, ut cùm gratiam referre non posset, videri cogeretur ingratus. Seneca de Consolatione ad Heluiam. luxum Romanorum carpens, *Ultra Phasim*, inquit, *capi volunt, quod ambitiosam popinam instruat.* Ambitiosam popinam, idest lautitijs refertam, ac dominorum non tam gulæ, quàm ambitioni seruientem. Diogenes Dionysiaca certamina, quæ in Bacchi honorem Athenienses profusiore sumptu, sed alioquin ridicula celebrabant, acutè appellavit *magna stultorum miracula*: ita specioso nomine abusus, ut illi pompa insigni abutebantur ad ineptias.

**IRONIA.** Seneca in Apocolocyntosi defuncto iam Claudio satyricam Naniam canens.

*De*



*Deflete virum, quo non alius  
Potuit citius dicere causas,  
Vna tantum parte audita,  
Sæpe & neutra.*

Martialis de incensa Theodori domo.  
*Lib. II. Epigr. 58.*

*Pierios Vatis Theodori flamma pe-  
nates*

*Abstulit. Hoc musis, hoc tibi Phæbe  
placet?*

*O scelus, o magnum facinus, crimenq;  
dorum;*

*Non arsit pariter quod domus, &  
dominus.*

vbi vides triplici schemate, hoc est Iro-  
nia, inexpectata illius solutione, &  
Alliteratione auctam Argutiam.

## FIGURÆ.

### CAPVT TERTIVM.

**A**NNOMINATIO, seu Alliteratio  
ex. gr. *Aurora dum diem parit,  
perit; dum oritur moritur. Delige,  
quem diligas. Arte pariter, ac Marte  
certandum.*

Afer Manlium quendam nimiùm  
in perorando discursantem non agere  
dixit, sed satagere. Pollio scriptis ab  
Augustus lacesitus. Ego, inquit, taceo:  
non enim facile est in eum scribere, qui  
po-

*potest proscribere.* Demosthenes dicturus in Harpalum, ab eodem pecunia corruptus simulavit anginam. Hinc vibratum in eum scomma. *Non angina, sed argentangina correptum fuisse Oratorem.*

Quid sit de Annominatione sentiendum alibi dixi. Levis quidem Argutia, quæ solis nititur verborum iocis, nisi rerum, ac sententiarum pondus accedat; nec frequentius adhibenda, præterquam in huiusmodi argumentis, quæ à nugis non abhorreant.

**ÆQUIVOCVM**, seu Ambiguum. Annominationi succedat. *Æquivocum* Verbum est, quod sensus diversos habens ancipiti significatione usurpatur. Vim autem verbi in aliud, atque cæteri accipiant, posse ducere, ex Tullio, ingeniosi esse videtur; quavis ambigua non adeò Quintiliano probentur, non quòd omnino excludenda putet, sed quia rarò bellè respondeant, nisi cum prorsus rebus ipsis addiuvantur. Hinc sanè plurimæ scatent Argutiae; neque contemnendæ, si adsit in his non tam eliciendis, quam eligendis, ingenio iudicium. Salso *Æquivoco* Martialis Epigramma 40. lib. 1. condiuit in Attalum, se rebus agendis occupatissimum ostentantem.

*Semper agis causas , & res agis Attale  
semper .*

*Est , non est , quod agas , Attale  
semper agis .*

*Si res , & causæ defunt , agis Attale  
mulas .*

*Attale , ne quid agas desit , agas  
animam .*

Toties repetitum verbum ago multiplicem sensum habet . *Agere causas* est perorare , dicere , agitare lites : *res agere* , facere , tractare negotia : *agere mulas* , ducere dossuaria illa iumenta , *animam agere* , mori . Sic itaque Martialis Attalum primò Causidicum , & negotiosum hominem , subinde mulionem ostendit ; otijdemum vitandi gratia ad extremum adigit vitæ discrimen .

Cicero Vatinium , quòd strumofum guttur haberet , ambiguo Epitheto ludens *tumidum dixit Oratorem* . Idem in Verrem *ius Verrinum æquiucoco* notat ; nequam videlicet , vt iusculum suillum . Acutum fuit æquiucocum in Matricidam Neronem Romæ vulgatum .

*Quis neget Anea natum de stirpe  
Neronem ?*

*Sustulit hic Matrem , sustulit ille  
Patrem .*

**SVSTENTATIO.** Martialis ad Lu-  
percum . *Lib. 6. Ep. 32.*

*Quod conuiuaris sine me tam saepe  
Luperce,*

*Inueni, noceam quæ ratione tibi.*

*Irascar, licet usque voces, mittasque,  
rogesque.*

*Quid facies? inquis. Quid faciam?  
veniam.*

Huc ea pertinent, quæ consistunt in *decipiendis expectationibus*, ut Cicero, & Fabius loquuntur; cum scilicet vel aliqua conditione addita, vel postrema parte Orationis sensum antecedentem in contrarium verimus, vel immutamus, aut aliquid subdimus inexpectatum. Ex. gr. in Alexandrum. *Verè magnus, si magnitudini suæ temperasset*, in Vitellium. *Cesarum omnium præstantissimus belluo.*

D. Hieronymus in Ruffinum. *Tantum habes Græci, Latinique sermonis peritiam, ut Græci te Latinum, & Latini te Græcum putent.*

Cic. pro Ligario ad Cæsarem.

*Qui nihil soles obliuisci, nisi iniurias*, idem Fabiæ Dolabellæ triginta se annos habere dictitanti: *Verum est*, inquit, *nam hoc iam viginti annis audio*, ita simulata primò Concessione acutiorem vibrat Argutiam, & dum subdita ratione confirmare videtur fœminæ dictum, arguit quinquagenariam.

Mar-

Martialis in Epitaphio Philænis.

*Lib. 9. Ep. 20.*

*Sit tibi terra lenis, mollique tegaris  
arena;*

*Ne tua non possint eruere ossa canes.*

**ANTITHESIS**, seu Contrapositionis exempla quære inferiùs in Loco ab Oppositis.

**PARADOXVM**, cùm fit dictum mirabile præter vulgi opinionem ex se proinde argutum est. Huius notæ illa sunt. (a) *Nihil infelicius eo, cui nihil unquam contigit aduersi. Melius est otiosum esse, quàm nihil agere. Tam deest auaro quod habet, quàm quod non habet.*

Paradoxi speciem refert Epitaphium, quod similis, Prætorianorum Præfectus sub Adriano Sepulcro suo iussit inscribi. *Ex Dione Cassio. In Adriano.*

*Similis hic iacet,*

*Cuius ætas quidem multorum  
annorum fuit,*

*Septem tamen duntaxat annis  
Vixit.*

nam totidem solùm in priuata quiete sibi vixerat.

**EMPHASIS**, seu sententia sensu exuberans. Martialis de Regulo, quem transeuntem ruens porticus non læserat.

*Lib. 1. Ep. 43.*

G 2

Quis

a Sen. lib. de Provid. c. 3.

*Quis curam neget esse te Deorum,  
Propter quem fuit innocens ruina?*

idem in Epitaphio Scorpi. L. 10. Ep. 47.

*Inuida quem Lachesis raptum triete-  
ride nona,*

*Dum numerat palmas, credidit esse  
senem.*

Huic addi potest *Noema*, Latine  
( vt Carbo interpretatur ). (a) Cogita-  
tio, quæ intelligendum relinquit, quod  
non dicit; siue, vt apud Tullium, &  
Fabium, suspicionem habet latentis  
acuminis. Vt cum Hortensius dicebat,  
*Se nunquam cum Matre, aut Sorore in  
gratiam rediisse*; quibus verbis intelli-  
gendum reliquit, se nunquam cum illis  
habuisse dissidium. Acute Martialis in  
Maronem. Lib. 11. Ep. 43.

*Nihil mihi das viuus: dicis post fata  
daturum.*

*Si non es stultus, scis Maro, quid  
cupiam.*

hoc est, si sapis, intelliges optabile  
mihi esse, vt ocyus moriaris, & soluas  
promissa.

**SENTENTIAE, ET EPIPHONE-  
MAT** A non aptius aliunde, quam è  
præsenti materia colliguntur: quare  
tuum erit hæc ex opportunitate dedu-  
cere.

Quid quòd ab insulsis quoque sales  
eruun-

a Carbo de Elocutione lib. 1. disp. 23.

eruantur? Huiusmodi sunt quæ Tullius, & Fabius *SVBABSVRDA* vocant, quæ speciem habent ineptiæ, sed latens acumen inuoluunt. Cicero cum Generum suum Lentulum statura breuiorem prælongo ense videret accinctum; *quis* (inquit) *alligauit Generum meum gladio?* Præposterè quidem dictum; sed falsè absurdum, ad notandam enormitatem gladij, & breuitatem accincti. Afer in frigidum Oratorem, sed nitidiori veste spectandum. *Homo est* (ait) *in agendis Causis optimè vestitus.* Quid quæso vesti cum Causis? At hoc idem prima fronte absurdum duplici ferit aculeo; nam & hominis leuitatem petit, & Oratoris ineptiam, qui veste potiùs præstaret, quàm arte.

His annecte *IMPOSSIBILIA*, seu quæ fieri non possunt. Apud Ausonium Echo ad Pictorem.

*Vane quid affectas faciem mihi ponere pictor,*

*Ignotamque oculis sollicitare Deam?*

*&c.*

*Auribus in vestris habito penetrabilis*

*Echo:*

*Et si vis similem pingere, pinges sonum.*

Quandoque argutè optamus, vt fieri possint, quæ minimè possunt.



Martialis de imagine M. Antonij.  
Lib. 10. Epist. 29.

*Ars utinam mores , animumque  
effingere posset.*

*Pulchrior in terris nulla tabella  
foret.*

Tandem plurimùm seruiunt Argutij Figuræ harmonicæ, quæ quanuis per se argutæ non sint, elegantissima tamen sunt acuminum instrumenta, & sæpe in Elogijs maximè Historicis venustate sua supplent Argutias. Sunt autem hæ Figuræ, vt aliàs docui, Similiter cadens, similiter desinens, & Compar; quibus Distributionem adde, quas non rarò collectas inuenies.

Latinus Pacatus oris dignitatem in Theodosio commendans. *Virtus tua meruit imperium; sed addidit forma suffragium. Illa prestatit, vt oporteret te Principem fieri; hac vt deceret: idem infra. Necesse erit, me vel tacentem publicam incommoda, vel loquentem, aut ingratum virtuti, aut onerosum esse pietati.*

Martialis de Domitiano. Lib. 9.  
Epist. 80.

*Templa Deis, mores populis dedit,  
otia ferro,*

*Astra suis, calo sidera, ferta  
Ioui.*



## LOCI INTRINSECI.

## CAPVT QVARTVM.

**A DEFINITIONE.** Non Logica. Definitio, quæ proprijs verbis explicat solam rei naturam, sed quæ translatis constat, vel continet Antitheses arguta est. Martialis eleganter definit Sirenes *Hilarem nauigantium pœnam, blandasque mortes, gaudiumque crudele*. Diogenes amorem otiosorum *negotium* vocat. Tiberius, cùm successorem Imperij Caligulam aleret, educare se dixit *Natricem Populo Romano*, & *Phaetontem orbi terrarum*. *Natrix* serpentis genus est.

**A NOTATIONE.** Dictum de Seuero Pertinaci, quòd immitis animi esset. *Imperator verè nominis sui: verè Pertinax, verè Seuerus*.

Ouidius ad Maximum. *De Ponto lib. 1. eleg. 2.*

*Maxime, qui tanti mensuram nominis imples.*

idem ad Charum. *Ibidem lib. 4. eleg. 13.*

*Ob mihi non dubios inter memorande sodales,*

*Qui, quodes, id verè, Chare, vocaris, aue.*

**A CONIVGATIS.** D. Hieronymus

ad Paulum Concordiensem D. Pauli  
Eremitæ vitam scribens. *Misimus te  
tibi ; idest Paulo seni Paulum senio-  
rem.*

Martialis in Zoilum. *Lib. 11. ep. 57.*

*Mentitur , qui te vitiosum Zoile di-  
cit .*

*Non vitiosus homo es Zoile , sed  
vitium .*

auget Argutiam Inopinatum ; per fic-  
tam enim Correctionem sententiam  
repentè in deterius vertit.

Cic. in Oratore ad Brutum. *Itaque  
efficis , ut cum gratia causa nil facias ,  
omnia tamen sint grata , quæ facis .*

*A SIMILI.* Ut quidquam mirabile  
Similitudo habeat, vel eruditione nita-  
tur, vel ad rem longiùs deriuetur. Eru-  
ditè Demades Atheniensis Orator Ma-  
cedonicum exercitum, Alexandro su-  
blato, *Cyclopi excecato* comparauit ;  
magnum scilicet corpus, sed lumine  
cassum. Acutè in ipsum Demadem  
cauillatus est Antipater ; nam cum ille  
insignis decoctor omnia, præter artem  
dicendi, perdidisset ; *Demadi*, ait, *ut  
caesis victimis, nihil superfuisse, præter  
linguam, & ventrem.* Pressius acumen  
habent Similitudines implicitæ, ut si de  
Nerone se ipsum iugulante dicas. *Hoc  
fato interire debuerat cruenta hirudo ;  
ut sanguinem, quem audivissimè biberat*

*uiuens, moriens enumeret. De Hærode Infantes trucidante. Quid ni sauiet Lupus in Agnos? De Senæ Poeta. Suauiora carmina modulatur canus Olor, ita Cicero postremam Crassî Orationem Cygneam vocat lib. 3. de Oratore.*

*A DISSIMILI. Martialis ad Cæsarem. Lib. 5. ep. 58.*

*Pro meritis Calum tantis Auguste dederunt*

*Alcida citò Dîj; sed tibi serò dabunt.*

*Dissimilitudinem in Similitudine inuenit Aufonius de Statua Rufi.*

*Rhetoris hac Rufi statua est: nil verius ipsa.*

*Ipsa adeò linguam non habet, & cerebrum.*

*Et riget, & surda est, & non videt: omnia Rufi.*

*Dissimile hoc unum; mollior ille fuit.*

*A LOCO TOTIVS, & PARTIVM.*

*Cicero cum Q. Fratris pusillæ staturæ hominis imaginem vidisset, ingentibus lineamentis pectore tenus pictam.*

*Frater meus dimidius maior est (ait), quàm totus. Cynicè Diogenes Myn-dios lusit; qui cùm paruum Oppidum incolerent, amplas, & magnificas portas extruxerant. Claudite portas, inquit, ne Ciuitas vestra egrediatur.*

Martialis in variè se tondentem.  
*Lib. 8. ep. 45.*

*Pars maxillarum tonsa est tibi, pars  
 tibi rasa est,*

*Pars vulsa est. Vnum quis putet  
 esse caput?*

*A CAUSIS*. Ex hoc loco desumun-  
 tur Argutiæ non tam veras rerum cau-  
 sas, quàm ingenio excogitatas, & præ-  
 ter opinionem afferendo. Interroganti  
 Physico Diogenem, quam ob causam  
 aurum palleret. *Quoniam* inquit plu-  
 rimos habet sibi insidiantes, quasi timor  
 insidiarum esset causa efficiens palloris  
 in auro.

Plinius de Vxore, & Sorore Traiani.  
*Ideo utraque mores eosdem, quia utraq;  
 mores tuos habet. Inde moderatio, inde  
 etiam perpetua securitas; neque enim  
 periclitabuntur esse priuata, qua non  
 desierunt, & infra. Hoc magis digna  
 sunt, qua in animis nostris, & sint, &  
 habeantur Augusta, quia non vocantur;*  
 huius enim summæ appellationis ho-  
 norem modestè recusauerant.



**A CAUSA MATERIALI,  
ET FORMALI.**

In Simulacrum Christi Domini  
è Cruce pendentis ex lapide  
magnete.

*O simillimam vero effigiem!*

*Mysticus lapis*

*Non tam arte magneticus est ,  
quàm pietate .*

*Exaltatus à terra omnia traxit  
ad se ipsum .*

*Ferri amantior Petra ,*

*Post clauos , & lanceam ,*

*Habes duriora corda , qua trahas :*

*Quicumque velificaris in Patriam ,*

*Ne fluctues incertus ,*

*Tutissimum hunc indicem consule .*

*Idem Cynosura est , & magnes .*

*In Diuæ M. Magdalensæ effigiem  
ex Electro .*

*Magdala , quæ squallens lacrymarum  
fuderat imbres ,*

*Heliadum lacrymis gemmea  
plorat adhuc .*

*Plura vide apud Marinum in Pinaco-  
theca inter Sculpturas .*

*In marmoreum Veritatis signum .*

*Dina tenax veri , cum sis pulcherrima ,  
cur te*

*Pannosam effinxit frigidus iste lapis ?*

G G Ncm-

*Nempe licet longè placeas, laudaris,  
& alges;*

*Et capiti, facta es saxea, saxa timens.*

**A CAUSA FINALI** frequentiores, & faciliores Argutiæ hauriuntur. Ex. gr. de Fortuna *Attollit*, ut depri-  
mat; profusius blanditur, ut gravius  
noceat. Seneca de C. Caligula. (a) *Quem  
mihi videtur rerum natura edidisse,  
ut ostenderet, quid summa vitia in  
summa fortuna possent.*

Ovidius de Ponto lib. 1. eleg. 2. ad  
Maximum, qui genus ducebat à Fabijs.

*Qui nasci ut posses, quanvis cecidere  
trecenti,*

*Non omnes Fabios abstulit una dies.*  
Idem de Augusti clementia. *Qui vincit  
semper, victis ut parcere possit.* Argutè  
causis adscribimus novos, aut repu-  
gnantes effectus, Ex. gr. *Sapius animum  
opulentia depauperat. In te unum con-  
stanter pugna: pacem parit hoc bellum.*  
*Vitiorum millecebras declinare tutius est,  
quàm expugnare; securiorem dat fuga  
victoriam.*

Claudianus de Phœnice.

*Parturiente rogo curis natura laborat;  
Æternam ne perdat auem.*

*Ofelix, haeresq; tui: quo solvimur omnes,  
Hoc tibi suppeditat vires: prabetur origo  
Per cinerem.*

**AB**

a *De Consolat. ad Helviam.*

**AB ADIVNCTIS.** Fœcundissima  
seges Argutiarum hinc nascitur, si vel  
inuicem, vel cum suis Subiectis com-  
parentur, spectata eorum conuenientia,  
vel repugnantia. Martialis Pannicum  
pungit dissentientibus Corporis, &  
Animi Adiunctis.

*Lib. 2. Epigr. 29.*

*Nunc tibi crura pilis, & sunt tibi  
pectora setis*

*Horrida; sed mens est Pannice  
vulsa tibi.*

**AB ADIVNCTO TEMPORIS**  
in Curionem ab ætatis excusatione sem-  
per exordientem Cicero lusit, eum  
dicens *quotidie facilius habere Proæ-  
mium*. Idem de breui Caninij Consu-  
latu, quem paucis tantum horis gesse-  
rat, ad Curium scribens ita ioca-  
tur. *Epist. fam. lib. 7. Ep. 30. Caninio  
Consule scito neminem prandisse. Ni-  
hil tamen eo Consule mali factum  
est: fuit enim mirifica vigilantia,  
qui suo toto Consulatu somnum non vi-  
derit.*

Martialis in commendationem Ner-  
uæ. *Lib. 12. Ep. 6.*

*Sub Principe duro*

*Temporibusque malis ausus es esse  
bonus.*

imperante quippe Domitiano tempora  
fuerant bonis iniquiora.

**AB**

**AB ADIVNCTO LOCI.** De puero  
Iesu in Præsepio iacente .

*Similem factum iumentis insipientibus  
hominem*

*Vt requirat factus homo Deus,*

*Descendit in stabulum :*

*Vtque ad se propius inuitet ,*

*Recubat in Præsepio .*

*Redi aliquando ad meliorem frugem  
avidum genus .*

*Hic triticum inuenies , dum curris  
ad paleas .*

**AB ADIVNCTIO MODI.** De Diuo  
Raymundo , qui scisso mortuæ matris  
latere in lucem eductus , vnde Nonna-  
tus audiit , hinc sacræ familiæ de Mer-  
cede redemptionis captiuorum adscrip-  
tus mira sanctitate floruit .

*Raymundus Nonnatus*

*Auspicatus à prodigijs vitam*

*Non terris natum se ostendit , sed calo .*

*Gratia obstetrice*

*Ante vincere didicit natura leges ,  
quàm viuere .*

*Primo lucis haustu mortem intuitus*

*Nihil ultra mortale in oculis habuit .*

*Impatientiam materni claustri  
ne mireris .*

*Ad redimendam properat captiuitatem .*

*Non tam corporum , quàm animorum ,*

*Procuranda libertati natus ;*

*Primū hoc Genitrici beneficiū impendit ,  
Quam*



*Quam solutam ergastulo mortalitatis  
Premittit in Patriam.*

*Nuntiabit illa Calestis Hierosolyma  
Ciuibus,*

*Surrexisse de latere,*

*Qui filios de longè reducat.*

**AB ANTECEDENTIBVS, ET  
CONSEQUENTIBVS.** Martialis de  
Diaulo Medico. Lib. 1. epist. 87.

*Nuper erat medicus, nunc est vespillo  
Diaulus.*

*Quod vespillo facit, fecerat, &  
medicus.*

*Ausonius de vetula Veneri speculum  
dicante.*

*At mihi nullus in hoc usus; quia  
cernere talem,*

*Qualis sum nolo; qualis eram,  
nequeo.*

*Augustus, cum Urbem magnificen-  
tius ornasset, gloriari solebat. Romam  
lateritiam accipi, marmoream reddo.*

**AB OPPOSITIS.** Quantumuis ab  
omnibus alijs Locis educantur Argu-  
tiæ, sæpius acumen ab Antithetis mu-  
tuantur, cum scilicet constare viden-  
tur Oppositis, siue hæc sint Contraria,  
siue Relatiua, seu Priuatiua, siue Con-  
tradicientia.

**A CONTRARIIS.** D. Petrus Chri-  
sologus Serm. 1. de duobus filijs, pro-  
digo, & frugi. *Est penes Patrem dulcis*

*conditio , libera servitus , absoluta custodia , timor latus , blanda ultio , paupertas dives , secura possessio .*

Martialis in varios mores habentem.  
*Lib. 12. Epist. 40.*

*Difficilis , facilis , incundus , acerbus  
es idem .*

*Nec possum tecum vivere , nec  
sine te .*

Ovidius *l. XI. Metam.* de Mida, qui  
assecutus à Baccho , ut quæque tangeret  
verterentur in aurum , infelicissimam  
hanc felicitatem serò damnauit, cum  
esuriens , & sitiens, dapes , & potum vi-  
dit in metallum rigere .

*Attonitus nouitate mali , diuesque ,  
miserque*

*Effugere optat. opes , & qua modò  
vouerat odit .*

*A RELATIVIS.* Dictum de Cali-  
gula. *Nec seruum meliorem ullum ,  
nec deteriozem Dominum fuisse :* nam in  
priuata vita mitis , & obsequentissimus  
Tiberio imperanti fuit, postmodum in  
imperio truculentus , & sæuus . Plinius  
in Panegirico Traiani. *Plerique Prin-  
cipes , cum essent Cuium Domini , liber-  
torum erant serui .* Ibidem eundem  
Traianum alloquens. *Ita egisti tribu-  
num , ut esse statim dux posses , nihilque  
discendum haberes tempore docendi .*

Ovidius de Liuia Augusti vxore ,  
*Esse*

*Esse pudicarum te Vestam Linia matrum ;*

*Ambiguum est nato dignior, an ne viro.*

Martialis in Ponticum præ nimia in alios obseruantia minùs amico fauentem . *Lib. 2. Ep. 27.*

*Non bene crede mihi seruo seruitur amico .*

*Sit liber, Dominus qui volet esse meus .*

**A PRIVATIVIS .** D. Hieronymus Didymum Alexandrinum , quanuis captum oculis, doctrina præstantem , *Cacum videntem* appellauit , quippe ingenij luce tenebras vicerat cæcitatìs . Ita Sanctorum obitum *Mortem vitalem* dices , & *immortalitatis exordium* : eosdem *mortuos viuentes* , qui licet vita functi , dum beata æternitate fruuntur, inuocantibus adsunt .

**ACONT RADICENTIBVS .** Ex.gr. *Obest , dum prodest , liberalitas illiberalis , quæ lucrum beneficijs querit . De bombyce . Iam vermis, nunc ales ; nec ales, nec vermis, idem , & alter , neuter est, vterque est .* Cato apud Ciceronem . (a) Scipionem dicere solitum refert, se nunquam minùs otiosum esse , quàm cum otiosus esset , nec minùs solum , quàm cum solus esset .

**A REPVGNANTIBVS .** Plinius de Traia-

a *Lib. 3. Officiorum .*

Traiani modestia. Cui nihil ad augendum fastigium superest, hic uno modo crescere potest, si se ipse submittat. Latinus Pacatus de Theodosio. Cum vicinum habeant permissa fastidium, nunquam iste mirantis explet oculos: magis, magisque visus expetitur, & (nouum dictu) praesens desideratur. Seneca de Alexandro Magno. Epist. 91. intelligere debebat falsum se gerere cognomen. Quis enim esse magnus in pusillo potest? In hoc scilicet exiguo terrarum ambitu.

Martial. Lib. 5. Epigr. 40.

*Extrafortunam est quidquid donatur amicis.*

*Quas dederis, solas semper habebis opes.*

A COMPARATIONE maiorum, minorum, vel parium. Senec. Epist. 89. in splendide gulosos. Infelices etiam, quod non intelligitis vos maiorem famem habere, quam ventrem. Idem in Apocolocyntosi. Prius inter Philosophos, quam inter horologia conueniet.

Ouidius de Tristibus.

*Cumque sit exilium, magis est mihi culpa, dolori;*

*Estque pati poenam, quam meruisse minus.*

Plinius Traiani sororem commendans. *Vt si quis eam uxori tua conferat,*

rat; dubitare cogatur, utrum sit efficacius ad rectè viuendum bene institui, aut feliciter nasci. Et paulò inferiùs. Idem utrique propositum, idem tenor vite, nihilque ex quo sentias duas esse. Martialis in Maximum. Lib. 2. Ep. 15.

*Capto tuam, pudet heu, sed capto  
Maxime cœnam.*

*Tu captas aliam: iam sumus ergo  
pares.*

Quandoque etiam eundem sibi ipsi comparamus. Ex. gr. de Cæsare. Nunquam se ipso minor æquè stylo præstitit, ac ense. Aut. Se ipso fortior, cum potestatem in hostes victoria fecisset, uti clementia maluit, quam vindicta.

## LOCI EXTRINSECI.

### CAPVT QVINTVM.

**E**Ruditæ à Locis extrinsecis emanant Argutiæ; sumuntur enim ab Historijs, Fabulis, Sententijs, seu dictis Veterum, & Adagijs.

#### ALLVSIONES AD HISTORIAS.

Sen. Epist. 122. in eos, qui crapulis, & somno, diei, noctisq; officia præuertunt. Sunt quidam in eadem urbe Antipodes, qui, (ut M. Cato ait) nec Orientem unquam solem viderunt, nec Occidentem. Martialis de Pumilione. Lib. 14. 181.



*Si solum spectes hominis caput, Hectora credas ;*

*Si stantem videas Astianaeta putes .*

*Hectora ingentem Virum, Astianaeta puellum .*

Idem festiuissimè de Plotia vetula.  
*Lib. 10. epig. 58.*

*Pyrrhæ filia, Nestoris nouerca,*

*Quam vidit Niobe puella canam ;*

*Laertes aniam senex vocauit,*

*Nutricem Priamus, socrum Thiestes .*

**ALLUSIONES AD FABULAS.**

Cicero in Diuinatione contra Verrem,  
*Sed repente è vestigio ex homine, tam-*  
*quam aliquo Circeo poculo, factus est*  
*Verres, ambiguum nomen Verres ;*  
nam & C. Verrem significat. Prætorem  
Sciciliæ, in quem agit Cicero, & suem :  
notissima verò est Fabula Circes, quæ  
venenatis potionibus homines in bruta  
vertebat .

Leonida in Menestratum pictorem  
ineptum . *Ex Anthologia Græc. lib. 2.*

*Deucalion à te, Phaetonque Mene-*  
*strate pictus,*

*Quonam sit pretio dignus uterque,*  
*rogas .*

*Munere nos utrunque suo dignabimur :*  
*ipfis*

*Est alter flammis dignus, & alter*  
*aquis .*

Deucalion scilicet diluuiò, Phaeton  
incendio . Ad

Ad Fabulam simul, & Historiam al-  
ludit aculeatum Romanorum dictum  
in Cæsarem Augustum, qui premente  
Vrbem annonæ penuria intempesti-  
uam Cœnam immodico sumptu in-  
struxerat in speciem Apollinis orna-  
tus, discumbentibus Deorum, ac Dea-  
rum habitu conuiuis. Postridie accla-  
matum est. *Frumentum omne Deos co-  
medisse, & Cæsarem esse planè Apolli-  
nem, sed Tortorem.* (a) Dij, Deæque  
Fabulæ inanes; at sine Fabula mentitè  
Deos conuiuæ, tantum vnica cœna ab-  
sumperant, quantum pluribus alendis  
Ciuiibus suffecisset. Subest insuper æqui-  
uocum in *Apolline Tortore*; nam, &  
hoc nomine Apollo quidam Marfyam  
excorians intelligitur, quem Romani  
colebant, & carpitur inhumanus Au-  
gustus, quasi Ciuium Tortor.

*ARGUTE VSVRPATA VETE-  
RVM DICTA.* Adrianus Cæsar in-  
Ælium Verum, quem successorem  
adoptauerat, non longæuum eum fore  
prælagiens Virgilianum carmen defle-  
xit, quo Anchises breuem Marcelli,  
Octauix filij, vitam Æneæ prædixit.

*Ostendent terris hunc tantum fata,  
nec ultra*

*Esse sinent. Lib. 6. Æneid.*

Quò verò in remotiorem sensum,  
aptè

a Suetonius in Augusto.

aptè tamen ad rem nostram, aliorum dicta deducimus, eò ingeniosior est Argutia. Cùm Eminentissimus Federicus Vicecomes, tum recens Mediolani Archiepiscopus, primùm celebri pompa exciperetur, & Eustorgianam Basilicam iniret (hæc olim Basilica Regum dicta, trium videlicet Magorum Sepulcro insignis) vt illinc solemnem de more Cæremoniam auspicaretur, inter cætera Symbola, & Epigraphas, quæ templum ornabant, pictus fuit Anguis (gentilitius idem Præsulis typus) tumulum ambiens, & in proximam dilabens aram, addito Virgiliano Carmine. *Amplexus placidè tumulum, lapsusque per aras: ex lib. V. Æneid.*, vbi Sacra faciente ad Paternum Sepulcrum *Æneâ Exijt adytis lubricus anguis ab imis &c.*

In lentum Debitorem, segnemque soluendo, facetus Creditor Ennianum Fabij Cunctatoris encomium vertit. *Cunctando restituit rem.*

In garrulum, & maximè gracilem. *Vox tantum, atque ossa supersunt.* Ex Ouid. 3. *Metam.* de Echo.

In Virum nugacem. *Tibi inconsumpta inuenta, Tu puer æternus.* Ex eodem lib. 4. *Metam.* De Baccho.

**ARGVTIÆ EX ADAGIIS.** Cùm Laberius Mimus à Cæsare PP. adscriptus



tus in Senatu sedem propè Tullium quæreret: *reciperem te* (is inquit) *nisi angustè sederemus*; ita & Laberium excludens, & Cæsarem notans, qui amplissimum Ordinem minùs dignis impleuerat. Sed acerrimè retorfit aculeum Mimus. *Demiror*, ait, *si sedes angustè, qui soleas duabus sedere sellis*. Æquiuocum subest; nam *duabus sedere sellis*, si proprium spectes verborum sensum, nihil aliud est, quàm duo subsellia occupare; acriori tamen significatione usurpatum Adagium, in eos dici solitum, qui dubiæ sunt fidei; qualis fuisse Cicero dicitur, diuersarum partium sectator, qui modò Pompcio, modò Cæsari adhæreret.

*In bibacem lusus à Paroemijs.*

In combibonum Senatu nemo est hoc iuniori Cicerone facundior, quem *foecundi Calices fecere disertum*. *Omnium horarum homo* amphoram habet pro clepsydra; neque timendum est, ne illi *hæreat aqua*. Græcam Philosophiam *doliari vita* professus nunquam tamen Democrito subscripsit, qui veritatem detrulit in puteum. Grator illi est *in vino veritas*. Hanc sibi vult liquidò constare, atque vt sincerius hauriat, in mero quærît, scelus ideo putat *ingulare Phalernum*. *Ægrè stantem* quid rides? *entheus* nutat. Iam si alloqui libeat, iura-

iurabis audire te responsa *de tripode*. Vide quantum acie valeat! Perspicacissimus *tria è duobus videt*. Oculatior Pentheo, & *Solem geminum, & duplices Thebas*, vel noctu cernit. Minimè quidem curiosus potator non quærit Consules in lagenis. Satis sibi consultum putat, si prospicit celeritate bibendi, ne quid *inter calicem cadat, supremæque labra*. In lucubrandâ ebrietate sæpissime pernoctans, nunquam tamen absumpsit *plus olei, quàm vini*. Frequentiùs redeuntem ad pocula ne arguas. Se bibisse non meminit: didicit quippè obliuiosum esse debere vrbani conuiuium. *Quis enim non odit memorem compotorem?* Quantum sapit hic Bacchi alumnus! Melius vtique sapiet, si pro vino bibat *helleborum*.

Collige interim ex allatis hætenus exemplis, Argutias, quæ à Paræmijs, aliorumue sententijs dicuntur, plerunque ab æquiuioco, vel diuersa ab Authoris mente significatione acumen habere. Si Veterum Adagia nosse cupis, peruolue, quod circumfertur, expuncto Authoris, seu Collectoris nomine, plenissimum opus, Græca, & Latina complectens, Pauli Mannuccij studio emendatum; in quo eruditè illorum origo, significatio, & vsus explicatur.

ARGUMENTATIONES  
ARGUTÆ.

## CAPVT VLTIMVM.

**S**Vper sunt vltimò Argutiæ, quæ Argumentationem inuoluunt; atque ideo arguta Enthymemata vocantur; quanuis apparentia sint, non vera Argumenta; nam fallacia magis, quàm ratione nituntur, nec tam verum inferunt, quàm pulchrum, ad veri speciem ingeniosè confictum; quare acuta Sophismata dici possunt. At huiusmodi Argumentationes ex iisdem denique fontibus desumuntur, à quibus reliquæ Argutiæ dimanant.

Martialis de Cæsaris Leone sapius apprehensum lepusculum dimittente.

*Lib. 1. ep. 13.*

*Vnde potest anidus capta leo parcere prædæ?*

*Sed tamen esse tuus dicitur; ergo potest.*

Ibi utique perspicis non veram causam afferri, quæ mittem Leonem effecerit, sed blandiente Cæsari Martialis ingenio eductam; quasi tanta esset Domini clementia, ut insolitam pietatem feræ quoque insinuare potuisset. Idem in Epitaphio Canaces, quæ os morbo

H

exe-

exedente eptennis obierat. Lib. II.  
Ep. 56.

*Sed mors vocis iter properavit claudere blanda,*

*Ne posset duras flectere voce Deas.*

hinc pariter vides causam finalem non veram adduci, sed acutè inuentam; veluti tanta fuisset puellæ gratia, vocisque suauitas, ut mors timeret, ne integro illius organo Parcas emolliret.

Cæsar adhuc prætextatus aculeato Dilemmate Lectorem punxit, verba ita legendo modulantem, ut canere videretur. *Si cantas, ait, malè cantas, si legis, cantas.* Argumento à minori ad maius Seneca lusit in vetulam Statiliam, (a) quæ inscribi sepulcro suo iussit, se nonaginta nouem annis vixisse. *Vides, inquit, aniculam gloriari senectute longa? quis illam ferre potuisset, si contigisset centesimum implere?* Ausonius de marmoreo Lucij monumento, quod ætas vitiauerat, corruptis nominis characteribus, Epigramma concludit Enthymemate à maiori ad minus.

*Miremur perijsse homines? monumenta fatiscunt.*

*Mors etiam saxi, nominibusque venit.*

minùs

a Sen. Epist. 77. Plin. hist. nat. l. 7. c. 48.

minis ergo mirandum est luteos homines mori, si moriuntur & marmora. *Mors saxi venit* dictum per Metaphoram, seu Catachresim, hoc est saxa quoque à temporis edacitate conteruntur.

Plura de inueniendis Argutijs hìc habes; At non satis erit inuenire, nisi rectè noueris explicare inuentas; nam vis maior acuminis à modo iaciendi pendet, cùm vna ratione vibratum feriat, altera frigeat. Variat maximè Argutiæ modum Figuræ varietas: nunc enim effertur per Interrogationem, nunc per Dubitationem, aliàs per Exclamationem; vel admirando, vel optando, vel miserando, aut comminando, aut imperando: modò per affirmationem, modò per negationem, aut vtranque vicissim; quorum omnium vsum imitatio, & exercitatio docebit.

Sed iam diu moramur in salibus, Et plura quidem scribenti occurrere, quàm compendio complecti statueram, vt in his fortasse nimius videri possim. At neque inutilem fore hanc operam, puto Elogia, & Epigrammata scribentibus profuturam. Tum etiam ostendere placuit, non esse Rhetori peregrinandum, vt Argutias inueniat; cùm tam multos habeat ab Arte sua illarum

fontes, qui largiùs fluent, si multiplex  
adfit eruditio. Cæterùm memineris  
præcipuos acuminum artifices esse in-  
genium, & vsum, optimam moderatri-  
cem prudentiam.

De Argutijs præter Ciceronem, &  
Quintilianum, aliosque antiquiores  
Latinos, & Græcos, e recentioribus  
Italis doctissimè scripsere Matthæus Pe-  
regrinus, & Emmanuel Thesaurus, cu-  
ius argutissimum opus per manus om-  
nium circumfertur inscriptum, *IL CA-  
NOCCHIALE ARISTOTELICO*.  
Dabit vberior illorum eruditio, quæ  
in hac ieiuna tractatiuncula deside-  
rabis,





DE SYMBOLIS HEROICIS,  
SEU IMPRESIIS.

**I**Nter illustriores ingenij foetus, quibus enituit recentior ætas, Heroica Symbola excellunt. Et quanuis ab ipsis rerum primordiis ducta quædam horum lineamenta repetantur, ab elapso tantum proximè Seculo coeperunt apud Italos arte florere, ac magis esse in pretio: cùm præstantes armis Viri erudito etiam Marte contenderent, & mente pariter laudem quærentes, ac manu, ut ense fortia gerere, ita insignito argutis Symbolis clypeo generosi animi consilia ostentare gauderent. Hinc indito nomine vocantur à Nostratibus *Imprese*; tametsi & ad alios iam usus, ad peculiarium virtutum commendationem, aut insectationem vitiorum, variosque hominum affectus exprimendos adhibentur. Eadem & Phrenoschemata Græco vocabulo, idest mentis imagines, Heroica Symbola, Figurata Epigrammata, & ut malunt complures, *Impresæ*, versa in Latinam Italica voce, appellantur; ut inde nomen habeant, unde leges habuere. Nihil interest quo nomine voces, dum rem calleas significatam per nomen.

Verùm in hac Arte Symbolica trac-

tanda ita Scriptores dissentiunt, ut multiplex opinionum diuersitas & copia præceptionum labyrinthis plerunque ambagibus implicet Ariadneo filo egentes. Aliqui acutissimis disputationibus rem istam agunt, & pugnantibus calamis digladiantes plura dissidia serunt, quam præcepta. Nonnulli antiquiora sequentes, quæ nondum vltima studia limauerant, nihil sibi non licere sentiunt, cuius exemplum inuenerint. Alij solam spectantes rei naturam, de qua etiam non leuia sunt inter Authores litigia, perfectiones non curant. Alij contra erecti ad apicem, Heroicum Symbolum aut perfectissimum volunt, aut nullum; tot verò, tamque seueras leges illi præscribunt, ut facilius Phœnicem inueneris, quam vnum numeris omnibus absolutum. Ego tamen iam ab initio professus me non Artium fastigia spectare, sed prima signare vestigia sensim ad altiora progressuris, non hos deducam per Quæstionum anfractus, non summa, nec ima sequar; at e plurium Scriptorum placitis, præsertim Iouij, Bargalij, ac Aresij, clariora, & magis accepta fecernam, quibus ad hæc Symbola condenda uti possint, qui primam illis admovent manum.

In afferendis autem exemplis non  
per-



perfectissima à me proponi profiteor, quorum copia non suppetit, sed singulis præceptis, & obseruationibus explicandis accommodata, quanuis aliqua ex parte deficient.

Cæterùm si quis absolutissimas horum Ideas, quæ (vt de Oratore suo Tullius ait) animo teneri possunt, non oculis cerni, vt voto conceperit, ita re fuerit aliquando feliciter assecutus, næ ille mirandum erit mortalibus ingenijs exemplum.

*Quid significet Symbolum,  
& quid sit.*

## CAPVT PRIMVM.



Symbolum idem est, ac nota, & indicium alicuius rei; quare signis omnibus conuenit hoc nomen. Definitur à Græcis, id quo aliquid coniectari, & cognoscere possumus. Quandoque significat tesseram militarem, aliàs hospitem; aliàs signum, quod æpistolæ, arcæ, vasi, & cæteris huius generis imprimitur, aliquando collectam à pluribus pecuniam ad epulas, & conuiuia celebranda; quæ Symbola, Collatio, & Collecta etiam

vocatur . Hoc loco Symbolum est signum , aliquid occultum ingeniosis intelligendum proponens .

Antiquissimam esse Symbolorum originem testantur Ægyptiorum mysticæ notæ , quibus diuinæ , humanæq; Sapientiæ arcana inuoluere solebant , ne imperito , profanoque vulgo paterent , ideo Hieroglyphica , sacras videlicet literas appellabant ; quorum mysteria luculentissimis Commentarijs Pierius Valerianus enucleauit . Antiquos præterea Bellatores , ac Principes viros Symbola quædam vsurpasse Historici , ac Poetæ docent . Hinc in vexillis Aquilæ , Cerni , Equi , Capri , Minotauri , & in galeis , & scutis variæ Ferrarum imagines . Sic Amphiaræus pictum in Clypeo Draconem prætulit , Capaneus Hydram , Vlysses Delphinem , Agamemnon Leonem , addito Carmine . *Hic pauor est hominum , manibus gerit hunc Agamemnon* . Annulorum quoque gemmis huiusmodi Schemata insculpta . Ita Sphingem Augustus , tum Alexandri Magni effigiem , Seleucus Anchoram , Mecænas Ranam habuere pro signis . Inde nata Insignia Gentium ; hinc varijs notata figuris Numismata ; hinc Emblemata denique , & præstantissima omnium Heroïca Symbola , quæ recentiores ab antiquis

quibz inchoata perficientes ad summam laudem euexere.

*Quid sit Impresia.*

## CAPVT SECVNDVM.

**L**atissimè sumpta *Impresia* est compositum ex *Figura*, & *Lemmate Symbolum*, aliquod mentis arcanum significans. At hæc Definitio perfectam non exprimit *Impresiam*, nec satis à cæteris Symbolis distinguit. Quare ex meliorum Authorum doctrina sic perfectiùs poterit definiri.

*Impresia* est insigne *Symbolum* à *Simili*, determinatum aliquem animi sensum indicans per *Figuram*, & *Lemma*. Dicitur *Symbolum*, quod genus est, per quod *Impresia* conuenit cum alijs Symbolorum speciebus. *Insigne*; hoc est ingeniosum præ cæteris, & argutum. A *Simili*; nam perfectæ *Impresia* significatio à Similitudine ducitur, quam alia Symbola non exigunt. *Determinatum aliquem animi sensum indicans*; quòd vniuersalia non spectat, vt *Emblema*; sed singularia hominum consilia. Per *Figuram*, & *Lemma*; his enim partibus constat; quarum altera deficiente mancum est, atque à sua specie degenerat. Et quanuis Ruscellus, &

alij senferint , vel fola Figura , vel folo Lemmate fubfiftere poffe , hanc reiicit opinionem eruditorum confenfus . Quales non effe debeant hæ partes inferius explicabo .

Imprefia itaque nihil aliud eft , quàm fubiecta oculis Metaphora , feu imperfecta Similitudo ; cuius tantum prima pars , hoc eft Protafis exprimitur , partim per Figuram , partim per Lemma ; pars altera , nempe Apodofis relinquitur , fpectatoris ingenio deducenda . Quod vt clariùs pateat , facili exemplo demonftrabo .

Excitanda fit Imprefia , qua Sapientis alicuius Viri virtutem commendes , inter aduerfa inconcuflam . Quare aptam huic firmiſſimæ Virtuti ſignificandæ Similitudinem , quæ effe poterit . *Sicuti Rupes inter fluctus ſuo pondere tuta eſt , ita Sapientis Viri Virtus propria firmitate tuta eſt inter aduerſa* . Hæc eſt perfecta Similitudo . Deme Apodofim , & ſine Similitudinis nota Protafim adhibe , quæ eſt . *Rupes inter fluctus ſuo pondere tuta eſt* . Hæc explicanda erit partim per Figuram , partim per Lemma .

Figura eſt imago rei , à qua ducitur Similitudo . *Rupes igitur inter fluctus illam quatientes* erit Figura pingenda . Lemma explicat eiufdem rei proprie-

tatem ; nempe *Suo pondere tuta est*, hæc eadem verba elegantius in hemistichium ita vertes . *Pondere tuta suo* . Idem fermè Ovidius habet 9. Metam.

*Hand secus , ac moles , quam magno  
murmure fluctus*

*Oppugnant ; manet illa , suoque est  
pondere tuta .*

Hercules Tassus , Aresius , & alij docent , non esse necessariam perfectæ Impressiæ Similitudinem , sed sufficere quanlibet Comparisonem , vel Parium , vel Maiorum , vel Minorum ; immò à Dissimili etiam , & à Contrario posse desumi . Paucos tamen iam habet sectatores hæc sententia , & recentiorum Academiæ suffragijs reprobatur . Omnes certè consentiunt Similitudine nixas Impressias esse perfectiores .

*De Figura , seu Corpore Impressia .*

### CAPVT TERTIVM.

**I**mpressiæ Figura , quam & Corpus vocant , à rebus tantum veris petenda est ; siue naturalibus , cuiusmodi sunt Montes , Arbores , Flores , Feræ , Volucres , Sidera ; vel arte factis , vt sunt Nauis , Turris , Columna , Horologium , Gladius &c. quare commentitia exclu-

H O

dun-

duntur, quæ in Emblemate, alijsque Symbolis possunt admitti. Cum enim Impresia veram Similitudinem requirat, & à veris rerum proprietatibus deductam, nequit falsis inniti. Reijciuntur ideo à Fabulis deprompta, ut Sirenes, Harpyæ, Sphinges: tum ex arbitrio ficta, quæ ita esse non solent; ut alata Testudo, Cutrus cum carbaso, Cancer Lunam chelis adstringens. Adde quæ Poetica Somatopœia exprimuntur: ut Fama, Victoria, Venti, Flumina humana specie.

Sunt verò incerta nonnulla, quæ vel propiora sunt Fabulis, vel miris proprietatibus celebrata, quarum veritas non constat: ut Phoenix e rogo renascens, Vrsa suos partus lambendo formans, Salamandra in igne viuens. Hæc in Impresijs ferenda potius esse, quòd fama fidem inuenerint, Thesaurus sentit, quàm laudanda.

Obscura, & ignota minimè probantur; ut peregrinæ aues, ac plantæ, solis fortasse familiares Indis, at ab auribus, ne dum oculis Orbis nostri adhuc remotæ; vel antiquiores machinæ quædam, quarum vix vlla memoria superfit. Nec admiserim monstrosa, quæ præter ordinem naturæ sunt. Immo Bargalius ne Historica quidem cenlet adhibenda, quæ rationem habent

bent singularis exempli; quòd ( vt ille ait ) nihil singularia probent: at insuper quòd ita exprimi non possunt, vt ab intuentibus cognoscantur. Quis enim Achillis hastam discernat à cæteris, aut Cleopatrarum Margaritam, aut annulum Gygis?

Eadem ratione reiiciuntur, quæ vel nimia paruitate, vel proxima rerum aliarum speciebus affinitate oculos fallunt: vt minutiora insecta, & herbæ, quibus inspiciendis, ac dispiciendis Microscopio, & Indice sit opus. Plerique Figuras omnes respuunt, quæ coloribus egent: volunt enim Impressæ Corpora in qualibet materie apparere posse; vt non picta solùm, sed etiam sculpta, vel impressa dignoscantur. Dissentit Aresius; quippe censet non conuenire quidem Symbolis, quæ in ligno ex. gr., marmore, aut metallo cælantur, pendentes à coloribus Figuras; non autem in illis damnandas esse, quæ pinguntur, præsertim si non opere alio in aliam debeant transferri materiam, quæ colores non ferat.

Inter Corpora præferuntur arte factis naturalia. Ex his tamen Humana communiori sententia eximuntur; siue quod nimis nota, siue quòd parùm ingeniosa sit ex his desumpta Similitudo, vt ex eadem specie deriuata,

ta, seu quòd Hominis consilia per Hominem explicare sit explicare idem per idem. Aliquæ tantum partes à toto corporæ seiunctæ admittuntur, cum ad aliquam spectant actionem, & rationem habent instrumenti, non primariæ Figuræ; vt manus, quæ malleum sustinet, acerram, ensem, facem.

Hæc de Impresiæ Corpore tradunt e recentioribus melioris notæ Authores. At neque desunt, qui aliter sentiant; nec fortasse inutile fuerit diuersas aliquorum sententias nosse. Iouius Humanas Figuras præceptis vetat, recipit exemplis. Ruscellus maximè laudat, peregrina tamen specie insignes, non quales quotidie veniunt sub oculos. hinc Historicæ, & Fabulosas præfert. Tales Picinellus probat (si quando Humanæ admittendæ sint) sed notiores, vt Hercules, Icarus, Atlantis, Iani. Aresius denique ostendit Humanas Figuras adhiberi posse salua Impresiæ natura, quanuis non integra illius perfectione: immò nullas putat excludendas, vel veras, vel fictas, nec alia corpora ab Historijs, & Fabulis deprompta reiicienda, præsertim celebriora, & quæ facile innotescant, vt Hydram Caduceum, Cornu Amalthææ, Iouis Aquilam fulmina gestantem &c. Quam sententiam suam rationibus



confirmat, & Symbolis illustrium Virorum, & Academiarum. Has autem Scriptorum opiniones huc affero, non quòd liberè his vtendum putem; sed vt scias, si quando vel tibi, vel alijs fauere videbuntur, ad quorum auctoritatem confugas. Vide Arelum *capite* 8., & 9. libri primi, quem de natura, & perfectione Impresiae acutissimè scripsit.

*Observanda in eligendis Figuris.*

## CAPVT QVARTVM.

1. **D**Ecorum spectetur, vt Figura fit Personæ, quam repræsentat, dignitati conueniens; quod tanti momenti est, vt huius defectus parum absit ab iniuria; vt si pro Symbolo Principis, aut præstantis Viri, bouem, siue Arcadicum pecus adhibeas. At sordida nunquam, vel turpia, vel quæ prauam interpretationem pati possint, usurpentur.

2. Accommodata sit Similitudini Figura; quare illa Corpora non probantur, quæ proprietates habent, Impresiae significationi repugnantes, aut dispares, aut dissimiles; vt Sol nubibus obscuratus, cum Lemmate *At mihi clarus*. Tum illa, quæ non per Me-

taphoram significant, sed per Metonymiam, suntque mera signa pro rebus signatis; vt Lauræa, & Cupressus, illa victoriæ, hæc mortis nota, cum hemistichio. *Erit altera merces.* Hæc enim Hieroglyphicis aptiora sunt, quàm Impressijs; quanuis hæc eadem ab Hercule Tasso, & Aresio admittantur.

3. Figurarum multiplicitas, quantum fieri possit, vitetur. Vnicam Thesaurus laudat, cuiusmodi est dimidia Henrici II. Luna cum Lemmate. *Donec totum impleat orbem.* Duas potius Aresius commendat, quod in his magis emicat actio, & passio; vt si pingatur Aquila in Draconem insurgens. Nec plures etiam repugnant; dum vna primaria sit, & omnes ad eandem significationem concurrant. Primaria Figura est, cui Similitudo innititur, & quam reliquæ, vt Symboli fundamentum respiciunt. Talis esset Corona Regia super incudem, propè fabrilem foculum, cum malleo, forcipe, alijsque huius generis instrumentis, inscripta Epigraphe *Per ferrum, & ignes.* Vbi plures Figuræ fuerint, monet sæpe laudatus Aresius præcipuam ad læuam esse collocandam; cum ad eam spectet Lemma, quod à læua scribere incipimus, & legere. Nulla certè superflua

**Figura sit :** quamobrem nec otiosa quædam ornamenta in Impresis disco ferenda, quæ perperam à Pictoribus adduntur, vt Arbores, Flumina, Montes, ad regionis amœnitatem importunè ingerendam.

4. Non trita nimis, & vulgaria Corpora adhibeantur. Laudem habent nobilia, mirabilia, noua. Sed hæc non semper, nec omnibus erunt in promptu; nec tam facilè inuenire serò natis, quæ tot adhuc ingenia non attigerint. Saltem nouæ proprietates quærendæ, quæ sæpius eodem prorsus Corpore permanente, vel aliquo tantùm immutato Adiuncto, noua Sym-bola efficiant; vt sequentia docebunt in Lunam, cuius eadem in omnibus seruata Figura, tantùm varijs illius proprietatibus consideratis, mutato Lemmate plures Impresis fiunt. 1. *Aliena luce.* 2. *Completur cursu.* 3. *Crescit, vt desinat.* 4. *Accipit, non adimit.* Noscere tamen reconditas rerum proprietates, ac exquisita tot Artium inuenta non puerilis est, ac leuiter inspersi literis ingenij. Proderit quidem meditatio, sed magis lectio, & vsus. Consule Aristotelem, Theophrastum, Plinium de rerum natura, tum Vlyssis Aldrouandi opera, & huius notæ Authorum, qui de Historia naturali, quique

de

de Artibus varia eruditione ſcripſere. Interim ijs vtere, quorum tulerit ætas notitiã, ſuiſque potuerit ſtudijs comparare.

*De Lemmate.*

CAPVT QVINTVM.

**O**btinuit uſus, vt quemadmodum Figura Corpus, ita Lemma, ſeu Epigraphe metaphoricè anima dicatur. Figura enim inſtar Promethei ſimulacri exanime iacet, mutumque Corpus, donec vitalis accedat Lemmatifacula, quæ illud animet, reddatque vocale. An verò tantùm Figuræ anima ſit, an totius Heroici Symboli, non leuis quæſtio eſt apud Artis magiſtros. Plerique tamen Impreſiæ formam negant eſſe Lemma, ſed tranſlatam ſignificationem, vel Similitudinem eſſe volunt, per quam exprimit animi ſenſum. Tu hæc aliàs cum Philoſophis agitabis: quòd ſi iam es inſtructus ad aciem, & mentem libet immiſcere diſſidijs, adi Bargalium, Ferrum, Taſſum, & præ cæteris doctiſſimum Arefium.

At nunquam illis aſſenſerim, qui docent Heroicum Symbolum ſine Lemmate ſubſiſtere poſſe; hoc enim deficiente

ciente nec intelligi potest, nec à Symbolis alijs distingui. Pinge ex. gr. sine vlla Epigraphe Leonem. Quid inde conijciam? cur non potius Hieroglyphicum, vel Schema gentilitium putem, immò etiam meram Leonis imaginem ex ingenio Pictoris expressam? Necessarium igitur omnino Lemma est, cum Impresia non sit ex eorum genere Symbolorum, quæ solis sunt Figuris, sed ex Figura, & Lemmate compositum; quarum partium concursus ad significationem ita exigit, vt neutra seorsum illius sensum perficiat.

Munus Lemmatis est exprimere paucis Figuræ proprietatem, cui Similitudo innititur, non autem Figuram ipsam, saltem primariam, aut aliquam ipsius actionem, quæ intuentibus pateat; neq; debet complere sententiam, & Similitudinem, seu sensum metaphoricum explicare: quare vitiosa sunt hæc Lemmata. In Adamantem. *Semper Adamas*. In Aquilam in sublime volantem. *Alta petit*. In Scorpionem. *Qui vivens ladit, morte medetur*. Primum, quia nominat Figuram: Secundum manifestam illius actionem attingit: Tertium sententiam complet, ac explicat sensum.

Omnino Lemma sit Figuræ conueniens, & verum de illa dicat. Non  
con-

conuenit illud Vespertilioni. *Lumine gaudet*. Non verum dicit Epigraphe contractis arcubus, & spiculis in fasciculum colligatis inscripta. *Fracta magis feriunt*. Quauis enim aliquando id verè contingere potuerit, ita communiter esse non solet.

Eò maiorem laudem Lemmata merebuntur, quò magis erunt propria. Communiora quædam vitentur; vt *Natura dictante. Iuuante Deo*. Et iam ab alijs adhibita, vbi fuerit eadem, vel similis Imprefiæ Figura, idem, vel similis sensus. Cæterùm vix posse inueniri cenfeo tam proprium Lemma, quod vni tantùm Corpori conueniat; cùm enim plura sæpius eandem proprietatem habeant, possunt eadem Epigraphe animari. Illud ipsum tam celebre in Histricem. *Eminus, & Cominus* quot alijs animantibus, bellicis tormentis, machinis inscribi potest, quibus eadem proprietas est, vt longè & propè feriant? quot verò sunt, quæ cominus, eminus agunt, resonant, olent, apparent, quibus idem Lemma quadrabit?

Quod attinet ad Lemmatis breuitatem, non alia illius mensura est, quàm quæ cæterorum; hoc est, vt nihil superfluum habeat. Duo, vel tria verba; vel hemistichium Latinum admittit,  
in-

integrum etiam quandoque carmen Italicum : nam Italica lingua non tam pressa est , quàm Latina , ut plura paucioribus exprimat . Sic Horologio Scolari Carmen inscriptum . *Sol quando fabel tempo ogn' un mi guarda . Alibi . Son pur l'hore serene ombre fugaci .* Et alibi núbilo Cælo . *Senza lume del Cielo si perde il tempo .* Cauendum , ne affectata breuitate mutiletur Epigraphæ , & dum nimiam claritatem vitat , incidat in obscuritatem , quæ multò deterior est .

Omnia Tempora , & omnes Modos admittit Lemma . Eleganter prima vitur persona , inducendo Figuram loquentem per Prosopopœiam . Tale est illud in Arborem à reciso stipite repullulantem . *Vici mea fata superstes .* Vel tertiam personam adhibet , quidquam de Figura affirmando , vel negando . Affirmando ex. gr. de Ala . *Aggrauat , & allenat .* Negando : de sagitta in scopum tendente . *Nec citra , nec ultra .* Affirmando , & negando : de Cygno in undis . *Abluor , non obruor .* Secunda persona vix est in usu , & à plebisque reprobatur . Quandoque Epigraphæ solis Verbis constat , quandoque Nominibus , vel Substantiuis , vel Adiectiuis , siue Participijs , aut Gerundijs , Aliquando sola pro Lemmate sufficiunt

ciunt Aduerbia, vt in exemplis aduer-  
tes. Bargalius, & alij particulas illas  
reijciunt *Hic, hinc, hoc, ita, sic*, quæ  
Corpus notant, vel Similitudinem at-  
tingunt: quanuis non alia Monosylla-  
ba excludant; immò censet Picinellus,  
hæc esse Lemmati commodiora: vt in  
Typographicum prælum. *Premat,*  
*dum imprimat*: multò elegantius, quàm  
*Premat, modo imprimat*.

Frequentissima est in Epigraphe Fi-  
gura Eclipsis, quæ Verbum supprimit,  
aut aliquam aliam Orationis partem,  
quam facilè subaudiat Lector, vel quam  
suppleat Figura; vt de Vertago cap.  
tum lepusculum ferente. *Non sibi, sed*  
*Domino. Ex Martial. l. 14.*, vbi subin-  
telligitur. *Fert prædæ*. Sed Figura  
fatis innuit, quod Lemma tacet. Lau-  
dantur arguta Schemata, vt Annomi-  
natio, Antithesis, Æquiucum. Anno-  
minatio; in Laurum ardentem. *Fra-*  
*grat, dum Flagrat*. Antithesis, in Cir-  
cinum, altera cuspide in centro fixa, al-  
tera circulum describente. *Non vagus*  
*vagor*. Æquiucum: in equum extra  
Circum exilientem. *Non sufficit orbis*,  
Ex Iuuenali Sat. 10. *Vnus Pelleo inueni*  
*non sufficit orbis*. Duplicem sensum ha-  
bet in Lemmate vox *Orbis*; nam, &  
Circum significat, & terrarum ambi-  
um. Erectum verò fuit hoc Symbo-  
lum



lum pro Philippo Secundo Hispaniarum Rege ad exprimendam illius animi magnitudinem, cui non satis erat Orbis noster.

Iouius & alij peregrina idiomata in Lemmate desiderant. Sed inueniendi erunt Mithridates, qui plures calleant linguas. Præstat itaque idiomate vti Latino, nostratibus, & exteris communi, aut popularibus noto; Italo apud Italos, Hispano apud Hispanos &c. ne Impresiae spectatores interpretem quærant.

Commendatur Lemma à celebri Authore, maximè Poeta depromptum. Et magnum quidem hoc affert ornamentum eruditionis, & quoddam velut authoritatis præsidium, atque ingenij sagacitatem ostendit, quod aliena, & sæpe remota in rem suam aptè traducat. Non ideo tamen improbauerim Epigraphem proprio Marte inuentam, si alioqui præstet, ac reliquas condiciones, quæ illi præscribuntur, habeat, præter nomen Authoris. Laudabilius sane est idoneam inuenire, quàm aliunde minùs aptam detorquere. Contendunt aliqui Lemma vel soluta prorsus Oratione scribendum esse, vel, si manarit à carmine, sequi debere Prosodiae leges. Ego verò non video, cur etiam Rhythmum imitari non

non possit ; præsertim si fuerit à Poetæ  
deriuatum , sed aliqua voce inani abla-  
ta, vel in aptiorem mutata ; curque tam  
seuerè sit metri legibus adstringendum .  
Sacris porrò Symbolis Lemmata magis  
conuenient à Sacris Libris , vel S. S. Pa-  
tribus , quàm à profanis Authoribus  
excerpta . Vt Poetica facilè inuenias ,  
nisi horum copiam paratterit lectio ,  
quæ certior est eruditionis magistra ,  
consules Parnassum Poeticum , vocum  
sylum ex Virgilij operibus ab Ery-  
thræo collectam , aliosque huius generis  
Indices , Poetis adiectos ; & linguæ La-  
tinæ Thesaurum . Pro Sacris Bibliorum  
Concordantias percurres .

*Quæ Impresiam maximè laudabilem  
reddant.*

## CAPVT SEXTVM.

Cùm ad Impresiae perfectionem tam  
multa concurrant , vt hæcenus  
vidimus , siue Figura , siue Lemma  
spectetur , hæc summam collecta  
obseruabis , quibus illius pretium auge-  
tur .

1. Si nouitatem habeat , hoc est si  
vel nouo , egregio , ac mirabili Corpore  
constet ; aut proprietatem , nondum ab  
alijs obseruatam attingat .

2 Si

2. Si minus popularis sit, nec adeò patens, vt imperitis etiam illius sensus primo intuitu innotescat; nec adeò sit reconditæ significationis, vt vel eruditissimos tantùm exigat Spectatores, vel speciem ænigmatis referat, quod explanatorem desideret.

3. Si sit propria, atque ita Personæ, ac præsentibus rebus accommodata, vt alijs æquè conuenire non possit. Quare non probatur Iouij, & aliorum opinio, qui maiori dignam laude arbitrantur, si plures habeat sensus, & varias interpretationes ferat.

4. Si Corpus desumptum fuerit à Schemate gentilitio, vel ab insignibus dignitatis, aut Epigraphæ alludat ad nomen, cognomen, aut munus aliquod illius, pro quo Symbolum excitatur, tunc enim & singularis videtur, & Authoris ingenium commendat. Huc pertinet argutia Lemmatis; quod si præterea contigerit ab insigni Poeta, vel idoneo Scriptore deriuari, omne feret punctum.

Pro Symbolis Heroicis, quæ Academiæ communia eligere Academici solent, hæc præcipit Bargalius. Primò, vt Virtutem respiciant. Secundò, vt nomini assumpto ab Academicis conueniant. Tertiò, vt imperfectum aliquid innuant, studio, ac opera perfici-

ciendum. Sic infœcundorum insignis Academia Romæ, sub tutela Deiparæ Virginis, quam à Niuibus vocant, erecta, pro Symbolo pinxit opertum niuibus campum, cum breuissimo Lemmate *Germinabit*. Hoc, vt vides, Infœcundorum nomini respondet; alludit ad Virginis niues, ac tutelam; sterilitatem præfert, sed ingeniorum cultura futura Virtutis germina pollicetur. In huiusmodi Academicarum Impresijs laudat, quantum non exigit, Aresius Corpora, quæ plurium rerum vnionem ostendant, ad eandem actionem spectantium, & Lemmata, quæ communem consensum innuant, ex. gr. si pingatur Alueus cum Apibus ad mellificium conuolantibus, qualem Vnanimis Salodienses præferunt, impendente Virgiliano homestichio. *Omnes idem ardor*.

Hæc de Impresijs Tirocinio tuo sufficiant; neque te deterreat operis difficultas, & Artis apex. Enitere, quæ potes, aliquando meliora daturus; non enim statim optima nascuntur. Duo tantum postremò te moneo. Primum, vt vel nunquam, vel semper mitius de Symbolis alienis Iudices: multa quippe ferenda potiùs, quàm carpenda; cum vix vllum reperiri possit ex omni parte beatum. Nec omnium eadem sententia

tia est, nec vlla opinio patrocinijs caret ; quanuis rectè sentienti eligenda tutiora sint, & meliorum consensu probata. Secundum, si quando pro ingenioli tui tenuitate aliqua edideris, ne summam laudem affectes ; immò, si me audis, vt Impresijs tuis consulas, eludasque acutiorum censuram, magnificum illis adimes Epithetum, & non Heroica, sed communiori vocabulo Symbola, nuncupabis.

Impresiarum affluentissima exempla dabunt Philippus Picinellus in Mundo Symbolico, Paulus Aresius, & alij, qui de illarum Arte scripsere. Quòd si non passim tam multa inuenies Heroica Symbola, quæ omnino excellant, ea seliges, quæ proximius accedunt ad optima ; immò cum perfectissima frustra quæsiueris, bona pro optimis erunt, pro bonis non prorsus mala.

*De alijs Symbolorum Speciebus.*

CAPVT SEPTIMVM.

**N**ON de Symbolis ago, quæ solis verbis constant, vt sunt Ænigmata, & Pythagorica Symbola ; quædam scilicet Allegoricæ sententiæ, quibus Pythagoras Virtutum præcepta inuoluit. Ex. gr. *Ignem gladio ne fodire,*  
I 2 idest

idest iratum hominem ne laceffas. *Stateram ne transilias*, hoc est moderatorem serua in rebus gerendis. Ea tantum huc affero, quæ Figuris vtuntur; vt Emblemata, Hieroglyphica, Schemata, seu Insignia Gentilitia, Numismata, & Characteres.

Emblema significat vermiculatum opus, tessellis insititijs confectum, & omne ornamentum exemptile, quod parietibus, pauimentis, vasis, pateris, vestibus, rebusque alijs inferitur; cuiusmodi sunt clauiculi, aut imagines aureæ, vel argentæ, vniones, gemmæ &c. Hic Emblema est Symbolum, ad formandos plerunq; mores accommodatum, aliquando solis Figuris, aliquando Figuris constans, & verbis differt ab Heroico Symbolo, quod Lemma necessario non requirit; aut clarum adhibet, eoque sensum aperit, aut subiecto Epigrammate legentibus explicat. Nullas respuit Figuras, humanas, historicas, fabulosas, fictitias; denique generalia tradit morum documenta, quæ Impresix non conueniunt. Emblematis exemplum sit illud ex Alciato, in quo pictus Bellerophon insidens Pegaso in Chimæram pugnat, cum inscriptione. *Consilio, & virtute Chimæram superari, idest fortiores, & deceptores. En fabulosum Corpus, perfectam in In-*  
scrip-



scriptione sententiam , generatim pertinentem ad mores, omnemque significationem prorsus explicatam , quæ ab Impresia perfectione valde dissentiunt . Verùm eruditissima Emblemata sinosse desideras eundem lege Alciatum, quo nullus hoc Symbolorum genere magis excelluit .

Hieroglyphica sunt sacra Symbola, quæ sculptis, vel pictis imaginibus occultum aliquid intelligendum designant . Hæc, vt diximus, ab Ægyptijs primùm inuenta feruntur, quibus utebantur pro literis, ad Religionis, ac Sapientiæ mysteria subobscurè notanda, vt imperitis laterent: quare nulla inscriptione animantur; cùm ipsæ mutæ imagines suam habeant, licet reconditam, significationem; siue ex hominum instituto, vt Olea pacem, Laurus doctrinam significat; siue ex ipsa rerum natura, vt cùm Leo, vel Gallus pingitur ad Vigilantiam indicandam .

Insignia Nobilitatis apud Veteres fuere Stemmata, siue potius ( vt (a) Alciatus notat ) Schemata, hoc est Figuræ Maiorum . Cereas enim horum imagines in armarijs dispositas seruabant in atrijs, ad auitæ gloriæ memoriam. Cùm autem illas coronis ornare solerent, quas Græci Stemmata vocant, hæc

I 3

etiam

a Lib. 4. de Verborum significatione .

etiam translata sumuntur , vt inclyta  
stirpis argumenta .

Hinc Iuuenialis Sat. 8.

Stemmata quid faciunt , quid  
prodest Pontice longo  
Sanguine censerì ? &c.

Tota licet veteres exornent vndiq;  
ceræ

Atria , nobilitas sola est , atque  
vnica virtus .

Frequentissimè verò Scriptores fumo-  
sas Maiorum imagines ponunt ad expri-  
mendam Generis claritatem . His Gen-  
tilitia Symbola, seu Insignia succedere,  
quæ vocantur ab Italis *Arme* ; fortasse  
quòd primum fuere clypeis , & armis  
impressa . Hæc varijs rerum Figuris, &  
coloribus Familias distinguunt , vel à  
Principibus data ad testimonium meri-  
torum , vel ab euentu , vel ab Auorum  
insigni aliquo facto desumpta, seu elec-  
ta eorum arbitrio , atque ad posteros  
transmissa ; quare certis regulis non te-  
nentur . De horum origine , vsu , ac  
præstantia plura dignissima lectu colle-  
git Vlysses Aldrouandus lib. 1. Ornitho-  
logiæ capite vltimo .

Numismata differunt à minoribus  
numis , quorum in commercijs vsus  
est ; quanuis , & eodem nomine  
pecuniæ vocentur . Hinc Hor. lib. 2.  
Epist. 1.

Chæ




Charilus, incultis qui versibus, & malè natis

Rettulit acceptos regale numisma Philippos.

Numismata igitur propriè sunt ad præstantium Virorum, ac præclarè gestorum memoriâ signata metalla, quæ à Nostratibus dicuntur *Medaglie*. Ex vna parte illius effigiem referunt, in cuius honorem cuduntur, ex altera vel Inscriptionem, vel Figuras, aut Symbole. Sic Augusti Cæsaris Numismati Papilio impressus, cum fluuiatili Cancro, quorum alter celeritatis, alter tarditatis nota vnitim Symbolum fuere maturitatis. Hæc pariter maximè libera sunt, nec Impresæ legibus adstringuntur. Non leue quidem afferunt adiumentum eruditioni comparandæ. Sed eorum cognitio à studiosis Antiquitatis petenda est. Lege Sebastianum Erizzium, Antonium Augustinum, Carolum Patinum, & alios.

Characteres, Italicè *Cifere*, sunt rerum Figuræ pro Verbis: vt si pingas fasciculum tritici, trabem, & allium ad exprimenda nostro idiomate hæc verba *Grana, trauaglio*. Hæc olim ab alijs quæres, cum nugari libuerit; nunc enim leuioribus istis, & huius notæ Symbolis alijs explicandis tempus conterendum non puto, studijs melioribus impendendum.

*Breue Corollarium.*



Vanuis ea sit Historiæ amplitudo, vt Scholæ nostræ angustias, atque hæc prima dicendi, scribendique Præludia excedere videatur; attamen, vt cœptum opus absoluum, non prorsus omittendum. censui præstantissimum hoc styli exercendi genus; præsertim, quòd Historiæ cognitio maximum affert Eloquentiæ emolumentum. Immò Ars vtræque ita mutuo nexu coniuncta est, vt alteram ex altera nasci affirmet Robertellus. Rhetorica quippe Historiam parit, atque alit, tanquam mater; ea rursus, tanquam optimæ matri, à qua fuit educata, parem gratiam refert; nam suppetitat exempla, ex quibus suas argumentationes conficit Rhetorica. Quare si non plenior de Arte Historica tractatum, saltem breuem aliquam illius notitiam hic trado, tanquam Coronidem Præludiorum.



*Quid*

*Quid sit Historia, quinam eius finis,  
qua species.*

CAPVT PRIMVM.

**H**istoria est rerum verè gestarum expositio, vt alibi diximus in prima Præludiorum parte: (a) quare distinguitur à Poetica, & fabulosa Narratione, vt ibidem docuimus. In veris igitur tantùm enarrandis versatur, neq; commentitia admittit, aut ad veri similitudinem adornata, ne in Tragœdiam Historia mutetur, quod maximum Historici vitium esse pluribus docet Polybius *lib.2.* idque notat in Philarcho Plutarchus in scribenda Themistoclis vita. Ideò etiam Xenophontis Cyrum Tullius damnat, quòd, vt in eo exprimeret perfecti Regis formam, veris verisimilia commiscuit, (b) *non ad Historiæ fidem, sed ad effigiem iusti imperij.*

Historiæ finis est rerum gestarum memoriam literarum monumentis perennem reddere ad posteritatem erudiendam. Nullus itaque maiorem affert utilitatem styli labor; cùm inde hauriatur vberima rerum omnium, præteritarum etiam, & longissimè

I 5

di-

a Cap.pr. de Narratione.

b Lib.pr.ep. pr. ad Q. Fratrem.

distantium cognitio. Hinc discimus maiorum exemplis, quæ imitanda sint, quæ vitanda; & cùm in hominum animis vim maximam habeat famæ perennitas, vbi videmus extare continuò immortalem in paginis proborum, fortiumque Virorum gloriam, simulq; perpetuam improborum ignominiam, illa nos vehementiùs ad Virtutem accendit, hæc à prauitate deterret. Nec minùs utilis Historia est ad vniuersas pacis, & belli artes sincerè comparandas, ad tuenda Regnorum iura, ad Rempublicam rectè administrandam, immò etiam ad seruandam Religionis integritatem. Quantæ verò voluptatis est Historicorum lectione in retrò acta sæcula, quasi manuduci, & ea, quæ gesta sunt ab antiquis, tanquam præsentia spectare; tum ignotos populos, & remotissimas regiones sine molesta peregrinatione lustrare, tandem quidquid vbique terrarum est noscè, compendio? Non est cur plura de Historiæ laudibus afferam, cùm & se ipsa utilitate, ac voluptate Lectorum satis commendet, cùmque amplissima illius encomia in Scriptorum paginis passim affluant, eorum præsertim, qui vel Historias, vel Historicæ artis præcepta scripsere.

Diuiditur Historia in Vniuersalem,  
quæ

quæ plurimum Populorum, ac illustrium Virorum monumenta complectitur, qualem ex Trogo Pompeio scripsit Iustinus, & particularem, quæ aut unius tantum Gentis, aut unius Viri facta enarrat, qualis ea est Q. Curtij de Alexandro Magno.

Ad Historiam referuntur Annales, qui per singulos annos, & Ephemerides, seu Diaria, quæ per singulos dies res gestas recensent. Sic à diuersitate materiæ, vel diuersa ratione scribendi diuersa sortiuntur nomina plures Historiæ species, seu potius partes. Hinc dicuntur Chronologicæ, quæ temporum ordinem sequuntur, Chorographiæ, quæ regiones, Topographiæ, quæ particulares locos, Genealogicæ, quæ familias describunt. His adduntur Commentarios, Fastos, Epitomas, Miscellanea, Tabulas, & plures alias Inscriptiones huiusmodi operum, quas ad rem suam adhibent Scriptores; quanuis non his omnibus scribendi generibus conuenire censeatur iustæ Historiæ nomen, cum sint potius, ut diximus, eiusdem partes. Verum de illius definitione, diuisione, ac fine plura sunt inter Artis magistros dissidia, de quibus per me iudicent acuti censores; mihi enim satis est, ea tantum, pro instituto meo summam col-

204 *De scribenda Historia :*  
ligere, quæ sint ad scribendum utilia,  
non quæ ad disputandum subtilia.

*Historia materia.*

## CAPVT SECVNDVM.

**E**X definitione, & fine Historiæ col-  
ligi potest illius materiam esse res  
gestas, non qualescunque, sed insignio-  
res, & quæ afferre utilitatem lecturis  
possint.

Aliqui volunt Historiæ materiam,  
solum ab antiquis esse petendam, Tul-  
lij nimirum autoritate nitentes, à quo  
*lib. pr. de Inventione* Historia definitur  
*res gesta ab ætatis nostra memoria remo-  
ta*. Sed illic Tullius Historiam definit,  
ut pertinet ad tertium illud Narratio-  
nis genus, quod in Rhetorum tiroci-  
nio *delectationis causa non inutili cum  
exercitatione dicitur, & scribitur*.  
Huius autem est *receptas exponere Hi-  
storias, aut certè à claris Authoribus  
memoratas*, ut docet Quintilianus *lib. 1.  
cap. 8*. Cæterum manifestum est, ab  
Historicis non tantum antiqua, sed  
etiam nouissima describi, & quæ illo-  
rum etiam ætate contingere.

Alij contra sentiunt earum propriè  
rerum Historiam esse, (a) quibus ge-  
ren-

2 *A. Gellius lib. 5. c. 18.*

rendis interfuerit is, qui narrat; quòd si seruandum esset, paucos admodum haberemus Historicòs. Dicitur quidem Salustius Bellum Romanorum in Iugurtham Numidarum Regem scribere aggressus Numidiam perlustrasse, quod tamen falso inniti fundamento (a) Vossius ostendit; at quanuis omnes illius regionis fines permeauerit, certè bella omnia non vidit in ea gesta; neque tot peregrinationibus, tot periculis damnandus est Historicus. Sufficit autem, quanuis non spectauerit ipse, quæ scribit, ut ab ijs, qui præsentibus viderint, aut à Viris fide dignis, & probatis Authoribus accepta narret, tum quæ vera, & quantum assequi humana diligentia potest, certa cognouerit pro certis afferat, dubia pro dubijs. Ita Q. Curtius lib. 9. Indica describens Equidem, ait, *plura transcribo, quàm creda: nam nec affirmare sustineo, de quibus dubito, nec subducere, quæ accepi.* Quis verò, ut cum Seneca (b) loquar. *Quis unquam ab Historico fidem iuratis exegit?*

(c) Franciscus Patritius Historiæ materiam solis hominum actionibus definit. At non tam angustis limitibus concludi docet Vossius (d) idque probat

I 7

plures

a Art. Hist. c. 11. b In Apocol. Claudij.

c In Dial. de Hist. d Artis Hist. c. 4.



plures memorans Historicos, qui non solum de rerum natura scripsere, deq; his inferioribus, at de cælestibus etiam, de prodigijs, ac miris euentibus, quæ Dei profectò, non hominum sunt opera: hinc Historiam diuidit in Diuinam, Humanam, & Naturalem. Nos Diuinam Sacris Scriptoribus, ac Theologis, Naturalem Physicis relinquentes hîc agimus de Humana, & Historiæ nomine illam tantùm intelligimus, quæ res continet ab hominibus gestas.

*Historia leges.*

CAPVT TERTIVM.

**P**Rima, & præcipua Historiæ lex est; *ne quid falsi dicere audeat, deinde, ne quid veri non audeat; ne qua suspicio gratia sit in scribendo, ne qua similitatis,* ita Cicero lib. 2. de Oratore. Sanè veritas censetur anima Historiæ, qua deficiente inanis narratio est, si adsit, vna sufficere videatur; adeò vt ad scribendam Historiam satis esse affirmaverit Catulus non esse mendacem. Ita verò temperanda est in scribenda veritate sinceritas, vt modum seruet, neque immodicis, merentium etiam, laudationibus nimium aliquibus, in quos magis propendat, fauere videatur.



tur, neque exaggeratis acrius aliorum vitijs infensum scribentis animum prodatur. Immò atrociora quædam, ac turpia facinora præstat, si commodè fieri potest, præterire silentio, vel si necessario referenda sint, cursim attingere; non fusiùs explicare, & quasi subijcere oculis legentium; ne Historia, quæ deberet esse incitamentum ad virtutem, fiat exemplar, & fomes nequitiae.

Secunda est Historiæ lex, ne manca sit, aut exuberans. Manca est, si non eas afferat, quas exigit, notitias; non enim satis est ad illius munus integrè implendum, rerum gestarum summam pressè colligere, vt Ephemeridum, & Annalium Scriptores facere solent; sed antecedentia, & consequentia spectanda; declarandum, quo tempore, quo loco, quomodo, quibus consilijs res gesta sit. Quare multiplici eruditione instructus esse debet Historiarum scriptor, & regionum, populorum, Principum, tum ciuiliū, militarium, naturalium etiam rerum cognitione præstare, vt hæc, vbi opus fuerit, explicare sciat, ac docere Lectorem.

At in his etiam tractandis aliud vitandum est vitium, ne certos fines excedat Historia; nec enim minùs vitiosa est, si exuberet. Id autem euenit, cum  
mi-

minutiora quæque confectatur, cum sæpius in descriptionum, concionum, quæstionumque diuerticula dilabitur, cum frequentior est in examinandis consilijs, ferendisque iudicijs, cum passim præcepta ingerit, ac sententias, ut Scriptor Philosophum, vel Politicum potius agere videatur, quàm Historicum.

Tertia Historiæ lex est; ut sit perspicua. Hæc autem perspicuitas partim oritur ex ordine rerum, quæ narrantur; ut ea præcedant, à quibus pendeat subsequentiū cognitio, subinde reliqua, ut euenere, succedant; partim à sincera, & dilucida elocutione; atque huc pertinent, quæ in sequenti capite dicemus, tum etiam quæ de virtutibus elocutionis alibi diximus in prima Præludiorum parte *capite primo*.

### *De Stylo Historico.*

## CAPVT QVARTVM.

**S**I quod est Scriptorum genus, quod emendatam maximè, & perspicuam elocutionem desideret, hoc utique est, quo traditur posteris rerum gestarum memoria. Cum verò non ad probandum, sed ad narrandum scribatur Historia, stylus illi conuenit æquabiliter fluens,

fluens, non Oratorio ambitu circumductus, non validioribus ijs vtens figuris, quæ attinent ad motum animorum, non nimis ornatus, non tumens; nec tamen incultus, & rudis, medius inter sublimem, & humilem; in descriptionibus tamen, & concionibus aliquantò liberior. In his autem quauis habere Historia dicatur multa cum Poesi communia, adeò vt eam(a) Quintilianus appellauerit *quodammodo carmen solutum*, attamen intra suos limites continenda est, ne in Poeticam licentiam efferatur, ac pompam; sicuti etiam cauendum est, ne conciones, quas inducit, fufis Orationibus, aut declamationibus propiores videantur; immò potius obliquas, quàm directas aliqui probant ex Trogi Pompei sententia in Liuium, & Salustium, eamque refert Iustinus *lib. 38.*

Contra Vossius (b) ostendit æquè directas, ac obliquas conciones ab Historicis vsurpari posse, idque plurimum Scriptorum exemplis confirmat. *Vide, qua de sermocinatione habentur in prima Præludiorum parte de Figuris tertij ordinis.*

Verùm ad formandum stylum, ad Artis leges tutiore magisterio addiscendas, nihil est præstantium Authorum

ac-

a *Lib. I. c. 10.* b *Art. Hist. c. 20., & 21.*

accurata lectione, ac imitatione utiliùs.

Inter Latinos Historicos maximè commendatur Iulius Cæsar ob puritatem, & proprietatem Latinæ Linguæ, ob exactam rerum explicationem, & eam Orationis elegantiam, quam admittit Historia, non studiosè elaboratam. (a) Tullius quidem ita eum scripsisse affirmat, *ut sanos homines deteruerit à scribendo.*

In Crispo Salustio laudatur castigata seueritas, & breuitas. At in eo quædam notantur vocabula nouata, quædam ab antiquiore sæculo decerpta. Neque ab omnibus probatur nimis pressa, & arida illa breuitas, *quantquam in ipso virtutis locum obtineat*, ut ait (b) Quintilianus, eamque fusæ Historiæ scribendæ minus aptam Foxius docet.

Titum Liuium lacteum eloquentiæ fontem vocat (c) D. Hieronymus, & lacteam pariter vbertatem illi (d) Quintilianus adscribit. Sed aliquando nimis affluere dicitur, aliquando etiam luxuriare, & in Poeticum stylum; immò interdum, & numerum incidere; insuper immania interdum portenta referre, quæ superant fidem.

Quam

a *Cic. in Bruto.* b *Lib. 4. c. 2.*

c *In Epist. ad Paulinum.* d *Lib. 10. c. 1.*

Quàm verò frequentia ista sunt in superstitionis antiquitatis monumentis?

Cornelius Tacitus magno Vir ingenio, & eloquentissimus Orator, ut Plinius iunior illius æqualis testatur, in scribendis suis Annalibus, ac Historijs graue quidem, & grande, sed asperum, durum, obscurumque styli genus adhibuit, & sæpe à Latini sermonis candore discedens; fortassè, quòd ipsa obscuritas, & peregrinitas, ut sentit Muretus, dignitatem, maiestatemque conciliet, sitque tanquam velum, quod profanis obtenditur, ad Politica mysteria inuoluenda. Redarguitur insuper Tacitus, ut minimè verax; immò *mendaciorum loquacissimum* cum (a) Tertullianus appellat, quòd falsa quædam, & impia in Sacram Historiam, & Christianam Religionem scripserit; quanuis mirandum non est, Scriptorem Ethnicum malè de vera Religione sensisse. Hunc tamen ab omnibus criminationibus vindicare, ac tueri acerrimè conatur (b) Muretus, præsertim contra Criticos Ciceronianos, qui nihil in Latinis locutionibus approbant, quod ipsi non legerint in Tullio.

Q. Curtius Iusti Lipsij testimonio probatus est, legitimusque Historicus;

*mira*

a *In Apol. adu. Gentes c. 16.*

b *Orat. secunda in Tacitum.*

mira in sermone eius facilitas, in narrationibus lepos; astrictus idem, & profluens, ut lectores valde oblectet. Non desunt tamen, qui nimiam in eo deprehendant elegantiam, & numerum curam, tum paucas aliquas voces sæculi deterioris.

Iustinus è quadraginta quatuor voluminibus, quibus Trogus Pompeius totius Orbis Historias descripserat, breue florum corpusculum fecisse se profitetur, quæ cognitione digniora fuerant excerptendo. Aliter aliqui sentiunt Historicorum censores: illum enim aiunt, non tam contraxisse Trogum, quàm malè mutilasse, ac perdidisse. Eundem præterea minùs nitidum Scriptorem appellat (a) Ludquicus Viues.

Suetonium Tranquillum emendatissimum, & candidissimum Scriptorem vocat Flavius Vopiscus, Plinius iunior eruditissimum, alij sincerum, & accuratum. Non placet alijs tenuis, & inornata elocutio, & in leuissimis rebus explicandis inutilis mora; multòque magis damnatur, quòd fœda quædam Cæsarium flagitia nimis apertè, ac diligentèr narret, ut docere videatur. Ita Franciscus Balduinus *de institutione Historia lib. 1.*

Va-

a *De tradendis disciplinis lib. 3.*

Valerium Maximum inter Historicos numerandum non esse probat (a) Antonius Viperanus; quippe nullam perpetuam narrationem tenet; at quæ apud plures Historicos latius diffusa sunt multarum gentium facta, & dicta ita collegit, ut ad inuenienda facile insignia Virtutum, vitiorumque exempla vnus esse possit pro multis. Quare quàm iucunda, tam utilis est tot Historiarum cum breuitate congeſta varietas, grauib, acutisque ſententijs inſperſa; quanuis aliquando à puritate Latinæ locutionis, & elegantiâ deficiat.

L. Florus, præter Liuianæ Historiæ compendium, quod (b) Martialis carmine poteſt inſcribi *Pellibus exiguis arctatus Liuius ingens*, elegantiffimum illud ſcripſit opusculum, quo Romanorum geſta, hoc eſt, ut ille ait, generis humani facta, breui, ſed dilucido, acuto, floridoque ſtylo complexus egregium reliquit ad texendas Epitomas exemplum.

Notiores ex antiquis, quos habemus, & illuſtiores Historicos Latinos attingi; omnes autem recensere, ac ſingillatim examinare meum non eſt. Illud certum ſit, ſpectandos eſſe meliores, & quæ magis laudantur in ſingulis imitanda.



da. Neque id statim legenti persuasum sit, omnia, quæ magni Authores dixerint, utique esse perfecta. Nam & labuntur aliquando, & oneri cedunt, & indulgent ingeniorum suorum voluptati. Denique summi sunt, homines tamen. Hactenus (a) Quintilianus. Addo ego, varia esse scribendi genera, varios item hominum gustus, nec omnibus eadem placere. Hinc euenit, ut aliqui deprauato sæpe stomacho in probatis etiam Authoribus reproben quæcunque illorum palato non sapiunt; quare prudenter admonet idem Quintilianus: *modeste, & circumspecto iudicio de tantis Viris pronuntiandum est; ne (quod plerisque accidit) damnent, quæ non intelligunt. Ac si necesse est in alteram errare partem, omnia eorum legentibus placere, quàm multa displicere maluerim.*

De scribenda Historia si plura desideras (ut Lucianum, & antiquiores omittam) consule Gerardum Vossium, Antonium Viperanum, Patritium, Pontanum, Balduinum, Robertellum, Riccobonum, Foxium, & eruditos alios huius notæ Authores, qui vberior de hac Arte doctrinam tradidere. Interim tibi pauca ista sufficiant pro Præludiorum Corollario, saltem ne

pror-



prorsus ignores, quid sit Historia; donec accedat maturiori ætate cum studio, usuque rerum maior illorum cognitio, quæ ad eam scribendam requiruntur; nam, ut grauitè ex Græcorum sententia Catulus admonet. (a) *Summi hominis est scribere Historiam.*



LAUS

a. *Apud Cic. lib. 2. de Oratore.*

LAUS DEO,  
SCIENTIARUM DOMINO,  
DEIPARÆ VIRGINI,  
SAPIENTIÆ MATRI;  
D. PAULO APOSTOLO,  
GENTIUM DOCTORI.

IN-

## INDEX RERVM,

Quæ in secunda parte  
continentur.

<b>A</b>	<i>Affectus, eorumque mouendorum ratio.</i> 61., & seq.	
	<i>Argumentum.</i>	14
	<i>Argumenta à Locis deducta.</i>	25
	<i>Argumentatio.</i> 17. <i>Illius species.</i>	18
	<i>Argutia quid sit, &amp; quoduplex.</i>	134
	<i>Illius ars antiquis nota.</i>	136
	<i>Argutiarum fontes Tropi.</i> 138. <i>Figurae.</i>	
	143. <i>Loci intrinseci.</i> 151. <i>Extrinseci.</i>	
	163. <i>Absurda arguta.</i>	149
	<i>Adagia argutè adhibita.</i>	167
	<i>Argumentationes.</i>	169
	<i>Ars definita.</i>	11
<b>C</b>	<i>Characteres vulgò Cifere.</i>	199
	<i>Confirmatio.</i>	54
	<i>Confutatio.</i>	55
<b>D</b>	<i>dicendi triplex genus.</i>	67
	<i>Digressio.</i>	48
	<i>Dilemma.</i>	21
	<i>Dispositio partium Orationis.</i>	28
<b>E</b>	<i>Elogium quid sit, &amp; quæ illius materia,</i> 92. <i>Quoduplex sit.</i>	94
	<i>Elogij stylus.</i> 95. <i>Illius scribendi ratio.</i>	99
	<i>Elogium Sepulcræle.</i> 100. <i>Formula Sepulcræles.</i>	106
	<i>Elo-</i>	

Elogiorum exempla.	108. usque ad	132
Emblema.		196
Enthymema.		21
Epicherema.		20
Epitaphia, & funebres inscriptiones.	116.,	
& seq.		
Exemplum species Argumentationis.		24
Exercitatio.		11
Exordium quid, & quotuplex.		30
Exordiorum fontes.	34. Observanda pro conficiendis <u>Exordijs</u> .	38
Exordij mensura, & artificium.		41
<b>G</b> enus Demonstrativum.		72
Deliberativum.		77
Judiciale.		84
<b>H</b> ieroglyphica.		197
Historia	200. Quid sit, qui nam eius finis, quae species.	201
Historia materia.	204. leges. 206. Stylus.	208
<b>I</b> mitatio.		11
Impressa origo, & nomen.		173
Illius Definitio.	177. Exemplum.	178
De Figura seu Corpore Impressa.		179
Observanda in eligendis Figuris.		183
De Lemmate.	186. Quae Impressam maximè laudabilem reddant.	192
Inductio species Argumentationis.		22
Inscriptiones antiquae.		111
Inscriptiones varia.		113
Inventio.		14

<b>N</b>	Arratio pars Oratoris.	48
	Noema Figura Argutius apta.	148
	Numismata.	197
<b>O</b>	Ratio quid sit, & quae illius partes.	28
	Orationes Generis Demonstratiui.	75
	Deliberatiui. <u>83. Iudicialis.</u>	85
<b>P</b>	Peroratio.	59
	Propositio Orationis pars. <u>49.</u> quomodo plausibilis fiat.	51
<b>Q</b>	Vastio quid sit, & quotuplex.	7
<b>R</b>	Hetorica Definitio. <u>5.</u> Illius materia. <u>7.</u> Partes.	9
<b>S</b>	Orites species Argumentationis.	22
	Status <u>Causae.</u>	14
	Symbola Gentilitia.	198
	Styli diuersitas.	71
	Syllogismus.	19
	Symbolum quid significet, & quid sit.	175



Pag. 27 mentem habetat

62 Longum esse

94 à praspicua

236 Principem oratorem

mentem hebetat

Longum esset

à perspicua

Principem oratorum

MAG 20.11003

